

STENOGRAM
22. RADNE SJEDNICE SKUPŠTINE KANTONA SARAJEVO
ODRŽANE 23.05.2025.GODINE

Elvedin Okerić (predsjedavajući)

Otvaram 22. Radnu sjednicu Skupštine Kantona Sarajevo. Himna Bosne i Hercegovine.

Pozivam sve prisutne da svako na svoj način odamo počast svima onima koji su dali svoje živote za odbranu Bosne i Hercegovine od agresije.

Pozdravljam uvažene kolegice i kolege zastupnike, članove Vlade, uvažene goste, kao i predstavnike medija koji prate rad današnje sjednice. Svima nama želim uspješan rad i ugodnu radnu atmosferu.

Prema evidenciji službe sjednici prisustvuje 27 zastupnika, što je dovoljan broj za punovažan rad i odlučivanja. Izostanak sa ove sjednice pravdao je zastupnik Jasmin Šaljić.

Na osnovu člana 74. Poslovnika Skupštine Kantona Sarajevo, Kolegij Skupštine Kantona Sarajeva na sjednici održanoj 14. 5. 2025. godine utvrdio je Prijedlog dnevnog reda današnje, 22. radne sjednice koji glasi:

1. Poslanička/zastupnička pitanja inicijative i odgovori;
2. Nacrt Zakona o Registru finansijskih potraživanja u Kantonu Sarajevo;
3. Prijedlog Odluke o davanju saglasnosti na pripajanje Javne ustanove „Fond Memorijala Kantona Sarajevo“ Javnoj ustanovi „Memorijalni centar Sarajevo“;
4. Prijedlog Odluke o davanju saglasnosti za zaključivanje ugovora o naknadi troškova na ime plaćenog poreza sa primaocem naknade Kukuljac Zehrom, u svrhu izgradnje dionice „I transverzale“ - Poddionica Tunel Kobilja Glava –Hotonj;
5. Prijedlog Odluke o davanju saglasnosti za zaključivanje ugovora o naknadi troškova na ime plaćenog poreza sa primaocem naknade Kukuljac Džibom, u svrhu izgradnje dionice „I transverzale“ - Poddionica Tunel Kobilja Glava – Hotonj;
6. Prijedlog Odluke o davanju saglasnosti za zaključivanje ugovora o kupoprodaji bespravno sagrađenog objekta na parceli označenoj kao k.č. broj 767/1 K.O. SP_Koševo, što po novom premjeru odgovara k.č. broj 686 K.O. Hotonj, radi rušenja, vanknjižno vlasništvo Klanco Al Mulki Fatime u svrhu izgradnje dionice „I transverzale“ - Poddionica Tunel Kobilja Glava – Hotonj;
7. Prijedlog Odluke o imenovanju članova Vijeća nacionalnih manjina Kantona Sarajevo;
8. Prijedlog Odluke o dopunama Odluke o utvrđivanju osnovica, stopa i načinu obračunavanja i uplate naknada za obavezno zdravstveno osiguranje na području Kantona Sarajevo;
9. Prijedlog Odluke o davanju saglasnosti na Izmjene i dopune Finansijskog plana prihoda i rashoda za 2024. godinu Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe;
10. Prijedlog Odluke o davanju saglasnosti na Program rada Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe za 2025. godinu;
11. Prijedlog Odluke o davanju saglasnosti na Finansijski plan prihoda i rashoda za 2025. godinu Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe;
12. Izvještaj o radu sa finansijskim izvještajem, na koje je prethodno dato mišljenje ovlaštenog revizora, Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe za 2023. godinu;
13. Nacrt Strategije razvoja turizma u Kantonu Sarajevo do 2030. godine.

Molim zastupnike da se izjasne o predloženom dnevnom redu. Zaključujem glasanje.

Za je glasala 24 zastupnika, protiv 1, suzdržana 2. Konstatujem da je Skupština za 22. Radnu sjednicu Skupštine Kantona Sarajevo usvojila dnevni red kako je i predložena.

Također, uz poziv za sjednicu dostavljeni su vam sljedeći informativni materijali:

- Izvještaj o radu Kantonalnog suda u Sarajevu za 2024. godinu i Izvještaj o radu Općinskog suda u Sarajevu za 2024. godinu;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec februar 2025. godine;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec mart 2025. godine;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za period januar - mart 2025. godine;
- Izvještaj o korištenju sredstava Tekuće rezerve iz Budžeta Kantona Sarajevo za period od 01.01. do 31.12.2024. godine;
- Izvještaj Ministarstva privrede Kantona Sarajevo o realizaciji novčanih podsticaja u poljoprivredi na području Kantona Sarajevo za 2024. godinu.
- Izvještaj o finansijskoj reviziji Javne ustanove Opća bolnica „Prim. dr. Abdulah Nakaš“ za 2023. godinu;
- Izvještaj o finansijskoj reviziji Javne ustanove „Služba za zapošljavanje Kantona Sarajevo“ za 2023. godinu;
- Izvještaj o finansijskoj reviziji Zavoda zdravstvenog osiguranja Kantona Sarajevo za 2023. godinu;
- Izvještaj o finansijskoj reviziji Ministarstva za odgoj i obrazovanje Kantona Sarajevo za 2023. godinu;
- Izvještaj o finansijskoj reviziji o praćenju postupanja po preporukama iz izvještaja o finansijskoj reviziji Kantonalnog javnog komunalnog preduzeća „Gradski saobraćaj“ d.o.o. Sarajevo za 2018. godinu;
- Izvještaj o finansijskoj reviziji o praćenju postupanja po preporukama iz izvještaja o finansijskoj reviziji Zavoda za izgradnju Kantona Sarajevo za 2019. godinu;
- Izvještaj o finansijskoj reviziji Kantona Sarajevo za 2023. godinu;
- Izvještaj o poduzetim aktivnostima po preporukama Ureda za reviziju u FBiH, iz Konačnog izvještaja o finansijskoj reviziji Budžeta Kantona Sarajevo za 2023. godinu.

Prije nego što predemo na realizaciju prve tačke dnevnog reda, obavezni smo da razmatramo zapisnike sa stenogramima 20. i 21. Radne sjednice i Treće hitne sjednice Skupštine Kantona Sarajevo. Ukoliko nema nekih primjedbi i sugestija, na ove zapisnike, stavio bih zapisnike ne glasanje. Nema.

a)

Molim vas da se izjasnite o Zapisniku sa 20. Radne sjednice Skupštine Kantona Sarajevo.

Zaključujem glasanje. Za je glasalo 26 zastupnika, protiv ništa, suzdržan 1. Konstatujem da je Skupština potvrdila Zapisnik sa 20. radne sjednice Skupštine Kantona Sarajevo održane 14.03. i 28.03.2025.godine.

b)

Molim vas da se izjasnite o Zapisniku sa 21. Radne sjednice Skupštine Kantona Sarajevo.

Zaključujem glasanje. Za je glasalo 26 zastupnika, protiv ništa, suzdržan 1. Konstatujem da je Skupština potvrdila Zapisnik sa 21. Radne sjednice Skupštine Kantona Sarajevo održane 28.03.2025.godine.

c)

I zamolio bih zastupnike da se izjasne o Zapisniku sa Treće hitne sjednice Skupštine Kantona Sarajevo.

Zaključujem glasanje. Za je glasalo 24 zastupnika, protiv ništa, suzdržan 1.

Konstatujem da je Skupština potvrdila Zapisnik sa Treće hitne sjednice Skupštine Kantona Sarajevo održane 17.04.2025.godine

Prelazimo na prvu tačku dnevnog reda. Sada je tačno 9 sati i 29 minuta.

AD-1.

Poslanička/zastupnička pitanja, inicijative i odgovori

Zastupnica Fatima Gavrankapetanović-Smailbegović se javila za riječ. Izvolite.

Fatima Gavrankapetanović-Smailbegović (zastupnica)

Zahvaljujem se predsjedavajući, sve vas srdačno pozdravljam, kao i gledaoce kraj malih ekrana. Ja danas podnosim inicijativu ministru zdravstva Kantona Sarajevo dr. Enisu Hasanoviću, kojim tražim da Ministarstvo zdravstva razmotri mogućnost proširenja postojećih terapijskih protokola kroz uvrštavanje lijeka, Anakinra u kliničku praksu tamo gdje zato postoje medicinske indikacije. Trenutno u Kantonu Sarajevo troje djece koristi ovu terapiju i, nažalost, roditelji kupuju ovaj lijek i daju ogroman novac za to. Svaki mjesec odvajaju 2900 konvertibilnih maraka. Njihova djeca bi bez ovog lijeka ostali trajni invalidi i bio bi im narušen kvalitet života. Lijek Anakinra pokazao je značajnu učinkovitost u liječenju određenih upalnih stanja, uključujući teže oblike reumatoidnog artritisa i Stilovu bolest. Mislim da se ova inicijativa, odnosno molim da se ova inicijativa uputi odgovarajućim stručnim komisijama i tijelima unutar Ministarstva zdravstva kako bi se donijela odluka temeljena na stručnim i etičnim principima u interesu poboljšanja zdravstvene zaštite naših građana. Također, imam pitanje za ministra zdravstva da li je istina da je došlo do pojave Leptospiroze u Sarajevu? Ako jeste, da li znate koji je uzrok, koje su mjere poduzete i kako će se stanovnici Sarajeva zaštititi od ove zaraze? Zahvaljujem se i molim usmeni odgovor.

Elvedin Okerić (predsjedavajući)

Zahvaljujem se uvaženoj zastupnici. Za riječ se javila zastupnica Smiljana Viteškić.

Smiljana Viteškić (zastupnica)

Zahvaljujem predsjedavajući, dobar dan svima. Za današnju sjednicu imam dva pitanja. Prvo je za Vladu Kantona Sarajevo a ono glasi: u kojim javnim komunalnim i zdravstvenim ustanovama, osnovnim i srednjim školama su direktori koji su vršioći dužnosti i koliko svakom od njih do današnjeg dana traje taj mandat? Konkretna pitanja ću postaviti nakon dobivanja, naravno, pisanog odgovora. Moje drugo pitanje je slično kao pitanje zastupnice Gavrankapetanović. Znači interesuje me da nam ministar odgovori usmeno. Tiče se pojave bolesti Leptospiroze u Kantonu Sarajevo. Pitanja su kratka. Kako je uopće došlo do pojave ove

bolesti u Kantonu Sarajevo i šta se iz djelokruga Ministarstva radi na suzbijanju ove zarazne bolesti? Zahvaljujem.

Elvedin Okerić (predsjedavajući)

Zahvaljujem se uvaženoj zastupnici. Dopredsjedavajuća Danijela Kristić se javila za riječ.

Danijela Kristić (dopredsjedavajuća)

Zahvaljujem predsjedavajući. Pozdravljam sve prisutne i gledaoce kraj malih ekrana. Ja upućujem inicijativu prema Zavodu za javno zdravstvo Kantona Sarajevo, Vodovodu i kanalizaciji i Općini Novi Grad Sarajevo. U svjetlu nedavnih informacija objavljenih u medijima o pojavi više slučajeva zaraze Leptospirozom na području naselja Dobrinja u Općini Novi Grad ovim putem podnosim inicijativu i zahtjev za hitno ispitivanje zdravstvene ispravnosti vode za piće koja se isporučuje građanima na tom području. S obzirom na prirodu bolesti koja se može prenijeti putem kontaminirane vode, smatram neophodnim da se izvrši mikrobiološka i hemijska analiza uzoraka vode iz više je tačaka na Dobrinji, uključujući škole, vrtiće, javne objekte, javne česme, ukoliko ih ima i pojedina domaćinstva, posebno u blizini lokacija gdje su zabilježeni slučajevi bolesti, da se provjeri stanje lokalnih rezervoara i cjevovoda koji vode do naselja Dobrinja kako bi se isključila mogućnost kontaminacije unutar vodovodne mreže, da se izvrši sanitarni nadzor i deratizacija terena imajući u vidu da je izvor zaraze najčešće povezan s prisustvom glodara. Ukoliko su analize već u toku, molim vas da javnost bude pravovremeno informisana o rezultatima radi očuvanja povjerenja građana u institucije i sigurnost snabdijevanja vodom. Drugu inicijativu podnosim sa kolegicom Arijanom Memić. Podnosimo inicijativu da se u javnom gradskom prijevozu, u kojem je uvedena govorna navigacija na bosanskom jeziku o tramvajskim stanicama i nazivima istih, uvode i govorna navigacija na engleskom jeziku, kako bi turisti u Kantonu Sarajevo, koji koriste i tramvaj kao svoj prijevoz, znali gdje se nalaze i na kojoj lokaciji trebaju napustiti javni gradski prijevoz i uživati u ljepotama našeg Kantona. Također, uz govoru navigaciju na engleskom jeziku, potrebno je iznad vrata svih sredstava javnog gradskog prijevoza postaviti kartu to jeste mapu grada na kojoj se jasno vidi gdje se nalaze i koje znamenitosti postoje u blizini tih stanica. Zahvaljujem.

Elvedin Okerić (predsjedavajući)

Zahvaljujemo se uvaženoj dopredsjedavajućoj. Dopredsjedavajuća Jelena Pekić se javila za riječ.

Jelena Pekić (dopredsjedavajuća)

Zahvaljujem predsjedavajući. Moje pitanje za današnju sjednicu inicijativa se odnosi na sljedeće pa ukoliko stignem u ovih 3 minute. Naime, Ministarstvo za obrazovanje i odgoj 18.04.2025. godine donijelo akt o stavljanju van snage saglasnosti za raspisivanje javnog oglasa za popnu upražnjenih pozicija u Javnoj ustanovi Djeca Sarajeva. Moje pitanje šta je razlog povlačenja saglasnosti i poništenja konkursa? I dalje u javnom pozivu za ovaj konkurs kao mjesto rada navode se vrtići Djeca Sarajeva, pri čemu se to odnosi na sve organizacione jedinice ove ustanove. S obzirom na to da su opis poslova osnovni i posebni uslovi identični za sve pozicije, tražim pojašnjenje zbog čega se radna mjesta nisu objedinjeno prikazala pod jednim rednim brojem sa naznačenim brojem izvršilaca, npr. 21 izvršilac već su prikazana kao 21 odvojena pozicija, svaka za po jednog izvršioca. Također, zbog čega se provodi 21 zaseban konkursni postupak, kada bi se u cilju racionalizacije mogao provesti jedinstven postupak selekcije sa rang listom 21 najuspješnijeg kandidata. Odgajatelj koji se prijavi mora izaći na 21 usmeni i 21 pismeni ispit da ne bi bio eliminisan iz konkursne procedure, koje su potpuno

identična samo sa različitim pitanjima. Realno, da bi ispitali da bi ispratili sva ta testiranja, odgajatelji bi realno trebali uzeti godišnji odmor, a zamislite samo taj nivo stresa izaći na, rekla bih, isto testiranje 21 put, što zaista mislim da nije ni praktično ni efikasno. I da li će zbog poništenja konkursa neki vrtići ostati bez odgajatelja budući da je nekima ističe ugovor na određeno koji iz potpisali ili je nekima već istekao. I također upućujem inicijativu koja je isto tako vezano za ovu problematiku, da Vlada Kantona Sarajevo i resorno ministarstvo pronade sistemsko rješenje koje bi im omogućilo trajno zaposlenje kvalificiranih odgajatelja koji kontinuirano ispunjavaju profesionalne obaveze i standarde jer je ovo posebno važno i u interesu djece i koja pohađaju naše vrtiće, s obzirom da dosadašnji model koji se dominantno oslanja na zapošljavanje odgajatelja po osnovu ugovora na određeno vrijeme generira značajne negativne posljedice na psihosocijalni razvoj djece. A ostalo ću dostaviti ostatak i tekst ove inicijative i pitanja ću dostaviti u pismenoj formi. Zahvaljujem.

Elvedin Okerić (predsjedavajući)

Zahvaljujemo se uvaženoj dopredsjedavajućoj. Za riječ se javio zastupnik Ilijaz Pilav, izvolite, imate riječ.

Ilijaz Pilav (zastupnik)

Pozdravljam sve prisutne. Ja imam inicijativu koju upućujem prema Ministarstvu zdravstva Kantona Sarajevo, a ona se odnosi na usvajanje nove indikacione liste za onkološke pacijente u Kantonu Sarajevo. Obrazloženje je malo šire s obzirom da na važnost ove teme pa ću zamoliti da mi se dopusti da ga iznesem do kraja. Onkolozi u Bosni i Hercegovini svakodnevno se suočavaju sa izazovom optimizacije liječenja solidnih malignih tumora zbog ograničene dostupnosti terapijskih opcija. Iako su nove terapijske opcije dokazale svoju efikasnost u randamiziranim kliničkim studijama i predstavljaju standard njege u međunarodnim smjernicama, veliki dio pacijenata u BiH ne može pravovremeno započeti optimalni tretman. Prema važećim propisima, Fond solidarnosti financira sistemsko onkološko liječenje, međutim lista dostupnih lijekova posljednji put je ažurirana u maju 2019. godine. Od tada je Europska agencija za lijekove odobrila desetine inovativnih terapijskih opcija, uključujući imunoterapije, ciljane terapije itd. sa stotinama novih indikacija, liječenje dodatno komplicira činjenica da pacijenti često ne dobiju ni ove opsoletne terapijske opcije pravovremeno, već se optimalna terapijska opcija uvodi tek u kasnijem linijama liječenja. Od oktobra 2024. godine usvajanjem prioritetnog programa lijekova, Ministarstvo zdravstva Kantona Sarajevo omogućilo je da nijedan osiguranik ne čeka na započinjanje terapije duže od 60 dana od uvrštavanja na Listu čekanja Federalnog zavoda zdravstvenog osiguranja i reosiguranja, pri čemu je preko 300 pacijenata pravovremeno započelo liječenje. To je važan korak, ali nije dovoljan. Na temelju ovih činjenica predlaže se kreiranje nove indikacione liste koju su izradili onkolozi sa ciljem osiguravanja pravovremenog liječenja prema najvišim naučnim i stručnim standardima. Terapijske opcije predložene za novu indikacionu listu odabrane su prema jasnim objektivnim kriterijima, a ti kriteriji uključuju sljedeće: lijek mora imati ocjenu A ili 5 prema ESMO-"Magnitude of Clinical Benefit Scale", čime se potvrđuje značajna klinička korist. Lijek mora biti registrovan u EU ili u BiH, čime se osigurava njegova dostupnost u zdravstvenom sistemu. ESMO MCBS alat koje je razvilo Europsko medicinsko onkološko društvo radi objektivne procjene kliničke korisnosti onkoloških terapija ocjena A se dodjeljuje terapijskim opcijama koje imaju visoki potencijal za potpuno izlječenje ili značajno produženje preživljavanja . Ocjena 5 se dodjeljuje terapijskim opcijama u nekurativnom setingu kod kojih je dokazano statistički značajno poboljšanje ukupnog preživljenja i kvaliteta života. Na osnovu podataka Zavoda za statistiku napravljena je projekcija broja pacijenata na godišnjem nivou koji bi imali medicinsku indikaciju za terapiju uključenu u ovu indikacionu listu. U zaključku, već

uvođenjem prioritarnog programa lijekova Ministarstva zdravstva Kantona Sarajevo u kliničkoj praksi postignut je značajan pomak u pravovremenom započinjanju liječenja. Usvajanjem nove indikacione liste pacijentima u Kantonu Sarajevo bi bio omogućen savremeni tretman usklađen sa standardima vodećih europskih zemalja, čime bi se značajno poboljšali ishodi onkološkog liječenja i kvalitet života pacijenata. Kao sastavni dio ove inicijative, Ministarstvu zdravstva proslijedit ću prijedlog kreirane nove indikacione liste, vjerujući da će sa apsolutnim razumijevanjem ministra biti i usvojena u što kraćem roku na dobrobit svih onkoloških pacijenata koji se nalaze na onim najtežim listama koje često zovu i "liste smrti". Usvajanjem ove nove indikacione liste podigli bi kvalitet i rezultate liječenja na zavidan nivo kakav je trenutno u svijetu. Hvala.

Elvedin Okerić (predsjedavajući)

Zahvaljujemo uvaženom zastupniku. Za riječ se javio zastupnik Faruk Selmanović.

Faruk Selmanović (zastupnik)

Zahvaljujem predsjedavajući, sve vas srdačno selamim i pozdravljam kolegice i kolege u zastupničkim klupama, kao i naše gledaoce kraj malih ekrana. Moje prvo pitanje odnosi se na Ministarstvo za prostorno uređenje i komunalnu privredu. Interesuje me da li je išta poduzeto povodom povećanog broja pasa lualica u Kantonu Sarajevo, te ako nije, da li će se poduzeti i da li su planirane slične aktivnosti, cijeneći da je ogroman broj pasa lualica se pojavio u zadnje vrijeme na ulicama i da su građani uznemireni. Moje drugo pitanje je za Ministarstvo unutrašnjih poslova Kantona Sarajevo, odnosi se na informaciju o postavljanju kamera na stajalištima u Kantonu Sarajevo. Pa evo da nam ministar usmeno i pismeno pojasni tačno kada će se i na koji će se način izricati kazne i da li će se kazne izricati za zaustavljanje na ta proširenja prilikom prijema, odnosno puštanja putnika iz vozila, a naročito ako se radi o taksi vozilima. Zahvaljujem.

Elvedin Okerić (predsjedavajući)

Zahvaljujem uvaženom zastupniku. Zastupnica Arijana Memić se javila za riječ.

Arijana Memić (zastupnica)

Zahvaljujem predsjedavajući. Pozdravljam sve prisutne građane koji prati naš današnji rad. Moje prvo pitanje upućeno je Upravi policije MUP-a Kantona Sarajevo. Interesuje me koji su konkretni kriteriji i postupak za dodjelu priznanja i policijskih znački, konkretno na osnovu kojih zasluga i čijeg prijedloga su dodijeljena priznanja Džaferu Hrvatcu i tužiteljicama Kantonalnog tužilaštva, Aidi Topalović i Šejli Heljić? Napominjem da na ovo pitanje tražim pismeni odgovor. Drugo pitanje upućeno je Kliničkom centru Univerziteta u Sarajevu. Kantonalni sud u Sarajevu je donio presudu kojom je odbio žalbu Kliničkog centra protiv presude Općinskog suda u Sarajevu u kojem je Klinički centar odgovoran za povredu prava na privatnost porodice Smajlović. Interesuje me zbog čega Klinički centar nije postupio u roku od 30 dana od kada je presuda dostavljena? I također, Klinički centar je bio u obavezi, a i danas je, da objavi javno izvinjenje porodici Smajlovića di nezakonite obrade ličnih podataka. I molim za informacije zašto to do danas nije učinjeno? Zahvaljujem.

Elvedin Okerić (predsjedavajući)

Zahvaljujemo se uvaženoj zastupnici. Za riječ se javila zastupnica Vedrana Vujović.

Vedrana Vujović (zastupnica)

Zahvaljujem predsjedavajući. Dobar dan svima, kolegama i kolegicama u skupštinskoj sali, kao i građanima koji prate naš današnji rad. Ja sam danas pripremila nekoliko zastupničkih pitanja i inicijative, ali, evo, prezentovat ću dvije ili tri koliko mi vrijeme bude dozvoljavalo. Svakako, evo, kao i pojedine kolegice, tražim informaciju od premijera, ministra zdravstva i ministra komunalne privrede da se očituju o stanju sa zarazom Leptospirozom. Mediji su prije zvaničnih institucija informisali javnost o tome da je zaraza krenula iz Opštine Novi Grad, kao i da je nekoliko stanovnika naselja Dobrinja hospitalizovano na Klinici za infektivne bolesti. Odgovor tražim usmeno i odmah, a u o pismenoj formi svakako detaljnije o svim koracima koji su do sada poduzeti, kako je došlo do toga i kako Vlada Kantona Sarajevo namjerava konačno očistiti Kanton i grad, osigurati redovan odvoz smeća i prevenirati druge potencijalne zaraze i epidemije.

Zastupničko pitanje također, upućujem Vladi Kantona Sarajevo, Ministarstvu kulture i sporta, ali i rukovodstvu Skupštine Kantona Sarajevo. Prije nekoliko dana iz Košarkaškog saveza objavljeno je da muške i ženski reprezentacija, omladinske do 18 do 16 godina ove godine ne učestvuju na europskim prvenstvima. Detalji obrazloženje ove za ove godine, gdje nije bilo okupljanja omladinskih reprezentacija, niti se uspjelo organizovati Liga Bosne i Hercegovine, a napominju da je bilo interesovanja, ali da je to spalo na nekoliko klubova. Također, za odlazak muških i ženskih reprezentacija do 16. i do 18 godina, potrebno 400.000 maraka, a još od države ništa nisu dobili. Ostali su dugovi iz prethodne godine u iznosu od 200 000 maraka. Moje zastupničko pitanje upućujem između ostalog, kao što sam rekla i Vladi, ali i rukovodstvu Skupštine koji na poziciji u budžetu imaju osiguranih 206 000 maraka tekućih transfera, pa me zanima da li su planirali, kako su, koliko su spremni izdvojiti novca za omladinske košarkaške reprezentacije Bosne i Hercegovine i generalno košarkaške klubove u Kantona Sarajevo? Omladinski pogoni košarkaški klubova i omladinske reprezentacije imaju ključnu ulogu u budućnosti svih seniorskih timova i razvoja vrhunskog sporta u cijeloj državi. Kao Kanton sa budžetom od 1 milijardom i 888 miliona ja očekujem zaista mnogo veću odgovornost prema sportu, ali i prema mladima. Toliko, ostalo ću poslati svakako pismeno.

Elvedin Okerić (predsjedavajući)

Zahvaljujemo se uvaženoj zastupnici. Za riječ se javila zastupnica Vildana Bešlija.

Vildana Bešlija (zastupnica)

Hvala predsjedavajući. Pozdravljam sve koji prate današnji naš rad. Ja bih postavila pitanje Vladi, Ministarstvu zdravstva i svim ostalim zdravstvenim ustanovama, odnosno Zavodu zdravstvenog osiguranja, Općoj bolnici, KCUS-u jer sam prije par godina u stvari pokrenula inicijativu o uspostavljanju hospisa u Kantonu Sarajevo. Naime, kao što znamo, uz pomoć Zavoda zdravstvenog osiguranja, mi imamo već hospis, međutim koji je privatni i o tomu sam govorila prije par mjeseci ponovo smatrajući da hospis mora biti sistemski uređen i dio javnog zdravstva. S tim u vezi sam željela da se pokrene određena zajednička inicijativa, pa ako iziskuje i određene napore sa federalnim nivoom zajedno da se pokuša pronaći adekvatan prostor i, naravno, finansijska sredstva za uspostavljanje takvog hospisa. Zato bi željela informaciju u kojoj su fazi aktivnosti poduzete na tom polju, eventualne prijedloge pronalaska adekvatnog prostora, tj. zgrade za njegov smještaj u krugu, ne znam, Opšte bolnice, KCUS-a, ili ako treba saradnju i pomoć Federacije, kako sam to i ranije navodila, i kao i obezbeđenje finansijskih sredstava, jer smatram da je ovo pitanje veoma važno i potrebno da se svi uključe u ovu realizaciju, a naravno, ovo ću pitanje ukoliko je potrebno još jednom pokrenuti i na federalnom nivou. Također bih zamolila informaciju o ukupnom broju djece koja idu u produženi boravak, razvrstanu po školama i uzrastu, i također molim informaciju o školama

koje nemaju produženi boravak, brojem zainteresovane djece i razlogom takve odluke, naravno, za svaku školu. I prije par godina je također usvajanja inicijativa koju sam podnijela, a tiče se uvođenja skraćenog programa prekvalifikacije i dokvalifikacije za stjecanje stručnih zvanja i propisa tradicionalnih starih obrta u srednjim strukovnim školama. I zamolila bih podatke, s obzirom da je prošlo par godina, kakav je odziv, koliko smo imali do sada polaznika i kakav je status ovog programa trenutno? Hvala.

Elvedin Okerić (predsjedavajući)

Zahvaljujem se uvaženoj zastupnici. Za riječ se javila zastupnica Marijela Hašimbegović.

Marijela Hašimbegović (zastupnica)

Zahvaljujem se predsjedavajući, sve vas srdačno pozdravljam, posebno naše sugrađane. Današnju inicijativu upućujem budžetskom inspektor i Ministarstvu kulture i sporta radi izvršenja budžetskog nadzora uslijed blokade transfera sredstava sa pozicije "JU ustanove kulture" koja se nalazi na analitičkoj kartici Ministarstva kulture i sporta, dokumenta Prijedloga budžeta za 2025. godinu u iznosu od 800.000 pravna regulativa kojom je regulisano ovo pitanje privremenog financiranja institucija kulture i obrazovanja od državnog značaja bez statusa definisana su Zakonom o privremenom preuzimanju sufinansiranja institucija kulture i obrazovanja čiji je osnivač Bosna i Hercegovina. Dokument usvojen od strane Skupštine Kantona Sarajevo. Ovaj Zakon kao posebni zakon jasno definiše privremeno preuzimanje, sufinansiranje institucija iz Budžeta Kantona Sarajevo do donošenja konačnog rješenja definiše status i način financiranja i poslovanja kako bi se osigurao opstanak, funkcionisanje i svakodnevni rad ovih institucija, sprječavajući njihovo ugrožavanje. Obzirom na obustavu isplate sredstava za Biblioteku za slijepa i slabovidna lica Bosne i Hercegovine tražim budžetski nadzor navedene pozicije sa ciljem utvrđivanje zakonitog poslovanja Ministarstva kulture i sporta. Također, očekujem od resornog Ministarstva žurno reagovanje i isplatu zakonom definisanih sredstava na koje vas se obavezuje i dokument Prijedloga izvršenja budžeta za 2025. godinu. Hvala.

Elvedin Okerić (predsjedavajući)

Zahvaljujem se uvaženoj zastupnici. Za riječ se javila zastupnica Belma Kapo.

Belma Kapo (zastupnica)

Hvala. Pozdravljam sve prisutne i naše drage građanke i građane. Inicijativu koju ću ja sada kratko prezentirati podnosimo kolega Aljoša Čampara, Vibor Handžić i ja, a odnosi se na Ministarstvo zdravstva Kantona Sarajevo. Ja vas zaista molim da proširimo Prioritetni program liječenja za onkološke pacijente koji je donesen prošle godine i na osnovu kojeg smo uspjeli 327 pacijenata iz Kantona Sarajevo skinuti sa liste čekanja Fonda solidarnosti i time spasiti 327 ljudi u Kantonu Sarajevo. Na toj listi je ostalo još oko 200 pacijenata iz našeg Kantona koji sami sebi finansiraju terapiju. Predlažemo da i ove pacijente uključimo u Prioritetni program liječenja po indikacijama koje su registrovani od strane Agencije za lijekove i medicinska sredstva u Bosni i Hercegovini. Novca zasigurno ima, jer u prošloj godini odvojeno 5 000.000, 25 000 000 je odvojeno za 2025. godinu. Prema našim informacijama, do sada je potrošeno oko 7,5 miliona, što znači da sigurno ima prostora, pa vas molim da se nađe način da što prije i ove pacijente zbrinemo. Jedan od takvih primjera je bila, nažalost, i mlada doktorica koja je nedavno preminula jer nije dobila odgovarajući lijek u momentu kada joj je trebalo. I ovo je sigurno prilika i znam da će Ministarstvo zdravstva učiniti sve što može da zbrinemo i ove pacijente. Druga inicijativa se odnosi na Ministarstvo za odgoj i obrazovanje Kantona Sarajevo. Ja molim ministricu da se malo više uključi vezano za probleme koji se dešavaju u Osnovnoj

školi Šip u Sarajevu. Naime, roditelji su dobili pismo od škole, od uprave škole u kojima ih obavještavaju da će u narednoj školskoj godini doći do problema u radu produženog boravka na način da će ono biti vjerojatno omogućeno samo za učenike prvog i drugog razreda. Ja molim ministricu da se pokuša malo više aktivirati, ja ću poslati svakako i pismeno u ovaj problem, jer tu je nova škola, u nju je jako puno uloženo, ne može biti razlog neadekvatnog rada produženog boravka kadar u toj školi, nedostatak kadra u toj školi. Ima sasvim dovoljno prostora da se zaposli odgovarajući kadar do septembra iduće godine jer roditelji su, podsjetit ću vas, iz drugih osnovnih škola, na primjer iz osnovne škole Hasan Kikić, prošle godine prebacili svoju djecu u područnu svoju školu, osnovnu školu Šip. Ako sada se ponovno zatvore vrata produženog boravka za djecu, trećeg i starije razrede, onda ćemo ponovo doći u situaciju da roditelji moraju djecu premještati u druge škole. Hvala.

Elvedin Okerić (predsjedavajući)

Zahvaljujemo se uvaženoj zastupnici. Za riječ javila zastupnica Mersiha Mehmedagić.

Mersiha Mehmedagić (zastupnica)

Zahvaljujem uvaženi predsjedavajući, pozdravljam sve prisutne, kao i građane Kantona Sarajevo koje prate današnje zasjedanje. Imam jedno pitanje koje upućujem Ministarstvu saobraćaja Kantona Sarajevo. Interesuje me u čijem vlasništvu su kiosci na tramvajskim stajalištima, koliko ih ukupno ima i šta se planira činiti sa tim kioscima zato što je najveći broj njih u zapuštenom stanju, neiskorišteni su i čak su ruglo i svojevrsne deponije na stajalištima, pa molim da mi se čim prije odgovori šta se planira sa ovim kioscima? Ostalo ću dostaviti pismeno. Hvala.

Elvedin Okerić (predsjedavajući)

Zahvaljujem se uvaženoj zastupnici. Za riječ se javio zastupnik Adi Kalem.

Adi Kalem (zastupnik)

Zahvaljujem predsjedavajući. Selamim i pozdravljam sve prisutne, selamim i pozdravljam sve gledaoca pored malih ekrana. Ja za danas imam dva pitanja za Ministarstvo za boračka pitanja Kantona Sarajevo. Jedno pitanje se može preformulisati kao inicijativa. Ovim putem podnosim inicijativu i postavljam pitanje Ministarstvu za boračka pitanja, a cilj je pojednostavljena administrativne procedure za ostvarivanje prava na jednokratne pomoći pripadnicima boračke populacije. Naime, u dosadašnjoj praksi uz zahtjev za ostvarivanje navedenog prava obavezno je dostavljanje uvjerenja o tome da li podnosilac, da li se podnosilac nalazi na evidenciji Službe za boračka i invalidsku zaštitu. Smatram da je ovo nepotrebno i budući da Ministarstvo za boračka pitanja Kantona Sarajevo već ima pristup tim evidencija, i može samostalno izvršiti provjeru statusa podnosioca zahtjeva. Predlažem da se pripadnici boračke populacije oslobode ovakve obaveze dostavljanja ovog uvjerenja, a da nadležno Ministarstvo podatke pribavlja službenim putem iz postojećih evidencija. Ako se ne može ovo realizovati, predlažem alternativno rješenje da se korisnicima omogući izdavanje uvjerenja bez navođenja svrhe na samom dokumentu, kako bi jedno uvjerenje mogli koristiti prilikom apliciranja na više javnih poziva i programa pomoći, bez potrebe za ponovnim izdavanjem. Prednosti su višestruke; smanjilo bi sa administrativno opterećenje, uštedjelo vrijeme i sredstva, te doprinijelo manjem, efikasnijem pristupu prema pripadnicima boračke populacije. Postavljam pitanje da li je Ministarstvo za boračka pitanja Kantona Sarajevo planiralo u narednom periodu olakšati ove procedure i ako jeste, na koji način? I također postavljam pitanje, a tiče se isplate jednokratne pomoći, odnosno, prosljeđujem pitanje zabrinute boračke populacije koja mi se svakodnevno

obraća i pita kada će biti i kada se planiraju isplatiti ove naknade, to je ujedno i moje pitanje i molit ću pismeni odgovor obzirom da ministar danas nije sa nama. Zahvaljujem.

Elvedin Okerić (predsjedavajući)

Zahvaljujem se uvaženom zastupniku Kalemu. Za riječ se javila zastupnica Admela Hodžić.

Admela Hodžić (zastupnica)

Zahvaljujem predsjedavajući, pozdravljam sve prisutne, kao i naše gledaoce. Za danas imam jedno pitanje i dvije inicijative. Prvo pitanje odnosi se na inicijativu koju smo podnijeli još u decembru mjesecu Ministarstvu privrede za poduzimanje aktivnosti za regulaciju vodotoka Crna Rijeka. Mi još uvijek nismo dobili odgovor od decembra mjeseca, pa evo može usmeni odgovor kad ćemo dobiti odgovor i zašto još uvijek nismo? Za regulaciju korita, jeste i vodotoka i projekta realizacije tog projekta Crna Rijeka. Podnosim inicijativu Ministarstvu saobraćaja Kantona Sarajevo i KJKP Gras Sarajevo da hitno poduzmu sve potrebne mjere i radnje kako bi se autobusi i minibusi sa linija javnog gradskog prijevoza na području gradskih općina za koje su u prethodnom periodu nabavljena nova vozila, tramvaji i trolejbusi preraspodijelili na linije javnog prijevoza na području općine Hadžići i druge rubne Općine u Kantonu Sarajevo, gdje je to potrebno. Obrazloženje. Naime, zbog pritužbi građana da zbog učestalih kvarova na dotrajalim vozilima, autobusima i minibusima na linijama javnog gradskog prijevoza KJKP Gras Sarajevo na području općine Hadžići, gdje dolazi do ispuštanja linija zbog nedostajućih zamjenskih vozila ovom inicijativom tražim da se uradi svojevrsna analiza na linijama gradskih općina gdje su nabavljeni novi tramvaji, trolejbusi, a samim tim i poboljšana usluga KJKP Grasa javnim gradskim prijevozom građanima. Građani u pojedinim gradskim općinama bukvalno svaki minut imaju na raspolaganju više vrsta vozila javnog prijevoza, dok sa druge strane, građani rubnih općina, a samim time i Hadžića, čekaju po sat ili dva, a nekada i duže na sljedeći autobus kada jedno vozilo ostane u kvaru. Svi smo očekivali okončanje procedura javnih nabavki za potrebe nedostajućih vozila, ali s obzirom na to da je tender oboren i procedura kreće iznova, koja bi mogla opet trajati mjesecima, moramo tražiti alternativna rješenja kako građani ne bi ispaštali zbog osnovanih ili neosnovanih žalbi na svaki tender kojim Ministarstvo saobraćaja Kantona Sarajevo i KJKP Gras Sarajevo pokušavaju riješiti problem nedostatka vozila za javni gradski prijevoz u Kantonu Sarajevo. Smatram sasvim opravdano ovu inicijativu i tražim od nadležnih da što prije pristupe njenoj realizaciji te da u narednom periodu prezentuju mapu sa egzaktnim podacima pokrivenosti linija vozilima Grasa Sarajevo, javnim gradskim prijevozom i drugim prijevoznicima sa brojem vozila, brojem linija, vremenskim pokazateljima, koliko u prosjeku na svakoj općini u Kantonu Sarajevo građani čekaju na sljedeći autobus, tramvaj ili trolejbus ili neku drugu vrstu gradskog prijevoza i to objave na web stranici. Molim nadležne da što prije razmotre ovu inicijativu kao moguće trajno rješenje sa tačnim podacima kako bi se moglo efikasnije upravljati vozilima javnog gradskog prijevoza i jednostavnije vršiti eventualne preraspodjele vozila tamo gdje je to potrebno u KJKP Gras Sarajevo, na teritoriji Kantona Sarajeva. Toliko zahvaljujem. Ostalo ću predati u pisanoj formi. Hvala.

Elvedin Okerić (predsjedavajući)

Zahvaljujem se uvaženoj zastupnici. Za riječ se javila zastupnica Elza Gaković.

Elza Gaković (zastupnica)

Zahvaljujem predsjedavajući, pozdravljam i selamim sve prisutne u sali, kao i građane koji prate naš današnji rad. Ja ću za danas uputiti inicijativu i pitanja. Inicijativa se odnosi na uvođenje registraciju minibuske linije koja bi se trasirala u obuhvatu Donja Jošanica, Krše,

Ugorsku i centar Vogošća. Obzirom da je riječ o gusto naseljenim dijelovima općine Vogošća i velikom broju školske djece koja nemaju liniju javnog gradskog prijevoza ili đачkog za svakodnevni odlazak u školu i povratak iz škole, neophodno je, također, taj red vožnje prilagoditi rasporedu nastave. Trasa kojom djeca pješāče je jako nesigurna, a dužina nje najveća od 2 km. Također, građani koji svakodnevno se suočavaju sa poteškoćama odlaska na posao i povratka, kao i građani treće životne dobi pri svakodnevnom funkcionisanju prema osnovnim životnim potrebama zahtijevaju uvođenje ove nove linije. Ovom prilikom su mi se i obratili sa ovim zahtjevom. S tim u vezi, neophodno je hitno postupanje svih nadležnih kako bi se registrovali i uspostavila nova linija javnog gradskog prijevoza Donja Jošanica, Krše, Ugorsko i centar Općine Vogošća.

Pitanje. Shodno održanim sastancima, nizom sastanaka sa predstavnicima Kantonalnog javnog komunalnog preduzeća ViK i građanima sa lokaliteta Tjepovački put, Doljanska, Biočki put i 14. juni upućujem pitanje prema Kantonalnom javnom komunalnom preduzeću ViK. Da li je moguće rješenje izgradnje rezervoara Gornji Mihaljevići na koti većoj od 680 m? Ukoliko je to rješenje izvodivo, tražim da se u saradnji sa svim subjektima planiranja pristupi ka hitnoj izradi idejnog rješenje i realizacije jer redovno vodosnabdijevanje je osnovno ljudsko pravo, ne luksuz. Izgradnje rezervoara na koti nižoj od 680 m prema potrebama stanovništva neće riješiti njihove osnovne potrebe. Ovakvim predloženim idejnim rješenjem riješilo bi se dugogodišnji problem vodosnabdijevanja ovog lokaliteta velikog broja građana i samim tim omogućilo bi se da sva domaćinstva na ovom području budu priključena na javnu vodovodnu mrežu. Zahvaljujem.

Elvedin Okerić (predsjedavajući)

Zahvaljujemo se uvaženom zastupnici. Za riječ se javila zastupnica Miomirka Melank.

Miomirka Melank (zastupnica)

Hvala predsjedavajući. Dobar dan želim svima, posebno strpljivim gledaocima koji nas prate. Ja smatram da treba zaštititi kompleks kao memorijalni kompleks groblja koja se nalaze na Koševu, to se odnosi na groblja Sveti Mihovil, Sveti Josip, Sveti Marko, groblje Stadion i groblje Lav. Ta groblja su dugo u memoriji grada, postoje kao takva i smatram da i sada njihovo održavanje odlično i u velikoj mjeri se posvećuje pažnja izgledu, ali bi neki nivo zaštite doprinio tome da ljudi koji su tamo sahranjeni, građani Sarajeva, budu na neki još značajniji način poštovani, po ugledu na slična groblja u velikim gradovima, na primjer Pariski Perlašez, koji je zaštićen kao kulturna baština. Takva mjesta govore o istoriji grada i o ljudima koji su živjeli na ovom terenu. Također bi htjela postaviti pitanje šta se dešava i u kojoj fazi je izgradnja ili planiranje krematorija koji je najavljen u jednom momentu, šta se sada dešava i da li ćemo uskoro dobiti takav jedan objekat? Zahvaljujem.

Elvedin Okerić (predsjedavajući)

Zahvaljujemo se uvaženoj zastupnici. Za riječ se javio zastupnik Muamer Bandić.

Muamer Bandić (zastupnik)

Zahvaljujem. Selamim i pozdravljam sve oni koji, sve prisutne i koji nas prate putem malih ekrana. Upućujem jednu inicijativu kojom Skupština Kantona Sarajevo obavezuje Vladu Kantona Sarajevo, Ministarstvo privrede Kantona Sarajevo, KJP Centar Skenderija da bez odlaganja, u šta kraćem roku, upute zahtjev za produženje roka za izvršenje upravne mjere utvrđene rješenjem Inspektorata Općine Centar Sarajevo 23.04.2025. godine. Predmetnim rješenjem i subjektu nadzora Centra Skenderija d.o.o. Sarajevo naređena je zabrana upotrebe dijela poslovnog objekta oznake "B" privrednog grada koji je sastavni dio kompleksa Centar

Skenderija d.o.o. Sarajevo, sa rokom izvršenja od 30 dana od dana prijema predmetnog rješenja. Ovom inicijativom zahtjeva se da ovo preduzeće Skenderija zatraži produženje roka za izvršenje navedene mjere do 31.12.2025 godine, u skladu sa članom 87. stav (4) Zakona o inspekcijama Kantona Sarajevo. Također, traži se da Centar Skenderija d.o.o Sarajevo preispita mogućnost preventivnog djelovanja do konačne sanacije ploče i čeličnih nosača ispod ispod trgovinki, uz prethodnu hidroizolaciju na platou na način kojim će minimalizirati gubitak prihoda Centar Skenderija do.o.o Sarajevo zbog obustave poslovne aktivnosti, kao i nastanak materijalne štete na strani zakupca. Dakle, ovim Rješenjem je ovom javnom preduzeću naložena upravna mjera zabrane korištenja dijela poslovnog objekta Privrednog grada Skenderija pod oznakom "B", sa rokom izvršenja od 30 dana od dana prijema rješenja. Međutim, uprava KJP Skenderija nije iskoristila pravni lijek, nije podnijela žalbu na Rješenje niti je djelovala u duhu načela savjesnosti i poštenja prema pravno zainteresiranih zakupcima na koje se odnosi predmetna upravna mjera. Usprkos zahtjevima zakupaca da se uloži i žalba, uprava preduzeća je ostala pasivna, čime je dodatno pogoršala situaciju. Takvo ponašanje ne odražava standarde odgovornog upravljanja niti uvažavanja interesa ugovorenih strana. S obzirom na to, predlažem da Skupština Kantona Sarajevo ovom inicijativu obaveže Centar Skenderija da podnese zahtjev za produženje roka za izvršenje upravne mjere do 31.12.2025 godine u skladu sa članom zakona, kako sam naveo. Imam jedno pitanje, odnosi se na sve organe uprave i službe u Kantonu Sarajevo, Ministarstvo pravde i uprave, Ministarstvo komunalne privrede, Ministarstvo za nauku, visoko obrazovanje i mlade, Ministarstvo saobraćaja, Ministarstvo unutrašnjih poslova, Ministarstvo privrede i Ministarstvo financija, Ministarstvo zdravstva, Ministarstvo za odgoj i obrazovanje, Ministarstvo kulture i sporta, Ministarstvo za rad, socijalnu politiku, Ministarstvo za boračka pitanja, Kantona uprava za inspeksijske poslove, Kantonalna Uprava civilne zaštite, Zavod za planiranje razvoja Kantona Sarajevo, Zavod za izgradnju Kantona Sarajevo, Zavod za informatiku i statistiku Kantona Sarajevo, Direkcija za robne rezerve, Kantonalni zavod za pružanje besplatne pravne pomoći, Stručna služba za zajedničke poslove, stručna služba Vlade Kantona Sarajevo, Kabinet premijera Kantona Sarajevo, Ured za zakonodavstvo Vlade Kantona Sarajevo, Služba za protokol i pres Kantona Sarajevo, Ured za borbu protiv korupcije Kantona Sarajevo, Služba za skupštinske poslove Skupštine Kantona Sarajevo, Javna ustanova Institut za razvoj predniverzitetskog obrazovanja Kantona Sarajevo, Kabinet predsjedavajućeg i zamjenika predsjedavajućeg, i Ured Vlade Kantona Sarajeva za dijasporu. Molim da svi navedeni organi uprave i službe Kantona Sarajevo pojedinačno dostave pisani odgovor na sljedeće: koliki broj zaposlenika je imao zasnovan radni odnos i u ovim organima uprave i službama Kantona Sarajevo u 2024 godini sa tačnim navođenjem ukupnog broja zaposlenih, broj zaposlenih po vrstama ugovora npr. neodređeno, određeno, pripravnici i slično i, dakle, koji je bio pravni osnov za zasnivanje takvog radnog odnosa? Uz pisani odgovor zahtijevamo od svih navedenih organa i službi Kantona Sarajevo da dostavi kopiju Pravilnika o unutrašnjoj organizaciji i sistematizaciji radnih mjesta koji je bio važeći u periodu od 01.01.2024 do 31.12.2024.godine. Hvala.

Elvedin Okerić (predsjedavajući)

Zahvaljujem se uvaženom zastupniku. Za riječ javio zastupnik Faruk Kapidžić.

Faruk Kapidžić (zastupnik)

Zahvaljujem, imam dva pitanja. Prvo pitanje za Ministarstvo privrede i Vladu Kantona Sarajevo, kao i za direktora Skenderije. Zbog čega se raskidaju ugovori sa zakupcima poslovnih prostora u Privrednom gradu Skenderija ispod platoa, ako znamo da je elaboratom o statičkoj stabilnosti iskazana potreba za konstruktivnom sanacijom, što može trajati kraći vremenski

period te se rad zakupaca mogao samo privremeno obustaviti u tom periodu koji može biti od 30 do maksimalno 60 dana. Tim raskidom ugovora nanosi se ogromna financijska šteta Skenderiji kao zakupodavcu i Vladi Kantona Sarajevo, koja će u konačnici izgubiti sudske sporove sa zakupcima u vjerojatno milionskim iznosima. Drugo pitanje za Ministarstvo saobraćaja ministra Štetu i premijera Vlade Kantona Sarajevo gospodina Uka. Da li se sanacija saobraćajnice u ulici Obala Kulina bana od Skenderije do mosta Ćumurija u dužini od cc-a 1 km i širini od cc-a 12 m radi po nekoj projektnoj dokumentaciji za sanaciju? Ako da, zahtijevam da se ta dokumentacija da na uvid javnosti, kao i dokumentacija po kojoj se radila rekonstrukcija iste saobraćajnice prije desetak mjeseci. Također zahtijevam da se uz usmeno i pismeno obrazloženje pokažu ugovori sa izvođačem radova i za rekonstrukciju i za sanaciju, da bi znali koliko je koštalo i jedno i drugo, bez obzira da li je ovo drugo rađeno, bez plaćanja ili sa plaćanjem, obzirom da cijeni vrijednost ovih radova preko pola miliona maraka. Hvala.

Elvedin Okerić (predsjedavajući)

Zahvaljujem se uvaženom zastupniku. Za riječ se javio zastupnik Mahir Dević.

Mahir Dević (zastupnik)

Hvala. Za danas imam jednu inicijativu i dva pitanja. Inicijativa se odnosi na Ministarstvo pravde i uprave koje je bilo predlagač Zakona o prevenciji, suzbijanju korupcije u Kantonu Sarajevo. Primjena tog zakona u Kantonu Sarajevo je napravila jednu koliziju pravnu između Izbornog zakona Bosne i Hercegovine i onoga što se dešava u praksi. S tim u vezi hoću da vjerujem da je ministrica ozbiljna i da je zaista sazrijelo vrijeme da se po hitnoj proceduri pristupi izmjenama i dopunama navedenog zakona, posebno kada je u pitanju utvrđivanje sukoba interesa. Radi informacije prema zastupnicima, vjerovatno u ovoj Skupštini, onako kako piše u tom zakonu ne postoji ni jedan zastupnik koji nije glasao za neki materijal, a da se ne bi našao u sukobu interesa. Znači, u praksi imate sljedeće stanje da vam se šalju dopisi ispred Ureda za borbu protiv korupcije prema vijećnicima da ih se upozorava da ne mogu glasati ne znam za izvještaje nekih preduzeća u kojim osnivači nemaju nikakve financijske efekte zato što u tim preduzećima rade njihove majke, braća, sestre itd, itd. O konkretnom slučaju ću, naravno, razgovarati direktno sa ministricom da vidim da li je u pitanju jedna politička hajka koju ste organizirali zajedno na relaciji Ministarstvo pravde i uprave, ili je zaista ovo stanje u praksi tako. Ako je takvo kako ste poslali dokument, onda je to u praksi jedan potpuni haos koji treba da se uredi i da bude u skladu sa Izbornim zakonom Bosne i Hercegovine. Evo hoću da vjerujem da je ministrica, barem do sada, pokazala ozbiljnost, barem u komunikaciji, da se ove stvari izmjeni pod hitno, jer one prave pravne probleme cijelom Kantonu. Ja ću sada pokrenuti pojedinačno za sva općinska vijeća u Kantonu Sarajevo, za sve zastupnike, za svako glasanje u zadnjih, od kada je usvojen taj zakon. I vidjet ćete na što ćete onda izaći, što će biti jedan potpuni pravni haos. Prema tome, pozivam vas da predložite izmjenu tih članova i da ih uskladite sa Izbornim zakonom Bosne i Hercegovine. To je inicijativa da to bude po hitnoj proceduri, skraćeno, znači ne redovno, najbržoj mogućoj. Druga stvar, pitanje za ministra visokog obrazovanja i rukovodstvo Skupštine Kantona Sarajevo. Kada ćemo, onoga ko obnaša sada tu funkciju, mora neko obnašati, neko je obnaša. Kada ćemo dobiti izvještaj Javne ustanove Studentski centar na dnevni red Skupštine Kantona Sarajevo? Znači taj izvještaj od kada ja sjedim ovdje nije došao na ovu Skupštinu. Kako je to moguće ljudi? Jel vi to krijete na kolegiju tamo radi određenih kriminalnih koruptivnih radnji u kojim, evo, sada nam govori i sudovi i tužilaštva? Kako je ta stvar moguća?

Elvedin Okerić (predsjedavajući)

Vrijeme kolega Deviću.

Mahir Dević (zastupnik)

Mogu li završiti samo još drugo pitanje? I druga stvar, kako je moguće da čovjek provede mandat na poziciji direktora Sarajevo šuma od 4 godine, a da Skupština razmatra njegov izvještaj. To je za vas predsjedavajući pitanje direktno. Kako su te stvari moguće da se događaju? Hvala.

Elvedin Okerić (predsjedavajući)

Svi materijali koji se nalaze u službi, članovi kolegija imaju uvid i vi dobro znate da ovo, pošto ste meni postavili pitanje rukovodstvu, da vam kratko odgovorim, vi dobro znate da to što govorite nema na stranici. Što znači da od Vlade nije došlo nikad prema Skupštini, tako da nemojte pitati predsjedavajućeg, pitajte premijera, pitajte Vladu i nemojte imputirati Kolegiju da nešto Kolegij krije. Zastupnik Damir Marjanović. Izvolite, imate riječ.

Damir Marjanović (zastupnik)

Ništa, sačekat će dok vi završite. Dobar dan svima. Pozdravljam sve prisutne kolegice i kolege, kao i sve one koji prate ovu Skupštinu. Jedno od najvećih dostignuća ove Vlade u prošloj godini je bilo fenomenalno i najveće izdvajanje za naučno istraživačku djelatnost od 4 300 000 konvertibilnih maraka. Koliko znam, taj iznos je i ove godine pripremljen. Ono što je bilo još jedno od velikih dostignuća profesorice Mesihović u tom periodu je što je vrlo brzo raspisala konkurse i uspješno ih sprovela tako da su već u šestom mjesecu bili realizirani isplate za te projekte. Ohrabrujem Vladu uvažavajući specifičnu trenutno situaciju, ohrabrujem Vladu, ohrabrujem i trenutno vd ministricu na poziciji ministrice obrazovanja, nauke visokog obrazovanja, nauke, mladih da te projekte pokrene što prije zato što postoje mehanizmi, modeli koji se već godinama koriste i ako se ne pokrenu na vrijeme, moglo bi se desiti da naučna zajednica Kantona Sarajevo ne bude mogla konzumirati ono što je predviđeno u Budžetu Kantona Sarajevo. Hvala.

Elvedin Okerić (predsjedavajući)

Zahvaljujem se uvaženom zastupniku. Za riječ se javio zastupnik Samir Avdić.

Samir Avdić (zastupnik)

Zahvaljujem predsjedavajući. Pozdrav svima prisutnima i ljudima koji prate naš rad putem medija. Pitanje za Ministarstvo odgoja i obrazovanja da li Ministarstvo raspolaže informacijama o eventualnim poskupljenjima u vrtićima u Kantonu Sarajevo, mislim na vrtiće koji su sistemu EMIS za 2025. godinu i da li su eventualna poskupljenja u skladu sa ugovornim obavezama vrtića i sistema EMIS-a prema Ministarstvu? Kako Ministarstvo posmatra novu praksu u nekim vrtićima, da dosadašnje redovne programe pretvaraju u specijalizirane programe i posebno ih naplaćuju, poput programa engleskog jezika, sekcija sporta, muzičkog i sličnih sekcija. I da li je takva praksa u skladu sa pravilnicima Ministarstva o učešću vrtića u sistemu EMIS? Smatram da takva razdvajanja djece čiji roditelji ne mogu plaćati specijalizirane programe od djece čiji roditelji plaćaju u istim vrtićima, nije dobra pojava u kontekstu jednakosti djece i Konvencija o dječjim pravima. Zahvaljujem.

Elvedin Okerić (predsjedavajući)

Poslovnička intervencija zastupnik Mahir Dević.

Mahir Dević (zastupnik)

Samo da dopunim ovo da ne bilo nejasno. Znači ovo vezano za Studentski centar, pošto na poziciji je ministrica Darija Jel obavlja funkciju ministrice visokog obrazovanja, usmeno da mi se odgovori znači zašto nikada do sada nismo imali i kada ćemo imati izvještaj o radu Studentskog centra na Skupštini Kantona Sarajevo? Hvala.

Elvedin Okerić (predsjedavajući)

Zahvaljujemo. Zastupnik Elvis Vreto se javio za riječ.

Elvis Vreto (zastupnik)

Hvala predsjedavajući. Pa evo, imam namjeru da uputim jednu inicijativu, naravno, nju ću uputi u pisanoj formi i obzirom da je kompleksna, sačekat ću i pisani odgovor. Prije svega odnosi se na činjenicu, obzirom da Kanton Sarajevo, odnosno sam Grad Sarajevo, u 2024. godini je imao u ljetnom periodu najviše, naravno, jednu od najposjećeniju godinu po pitanju dolazaka turista. Obzirom da je Vlada Kantona Sarajeva puno napora uložila kada i Ministarstva privrede po pitanju otvaranja i subvencioniranja novih aviolinija, postavljam jednu zaista jedno pitanje koje bih želio da Vlada. Naravno, resorno i onaj sa više ministarstava razmotri prije svega Ministarstvo za građenje i prostorno uređenje, Ministarstva saobraćaja, a naravno u saradnji i sa opštinama da se u nekom ljetnom periodu, kad s obzirom na te posjete i obzirom na ogroman broj turista koji su u ovom gradu, pokuša donijeti odluka privremeno i djelomično zabrane određenih radova, građenja, sanacije određenih cesta. Ja znam da je ova oblast po pitanju Kantona Sarajevo i obzirom i geografskog položaja, kompleksna, uzimajući u obzir i zimski period kad nije baš moguće vršiti te radove kao u nekim drugim zemljama, kao što to radi Hrvatska, gdje u ljetnoj sezoni, kako regije, gradovi zabranjuju bilo kakvu vrstu građevinskih radova, ja svjestan činjenice da ovdje to nije moguće uraditi na takav način zbog je li vremenskih uslova i dinamike radova, ali zaista tražim ovom inicijativom da se pokuša u saradnji sa lokalnim zajednicama i nadležnim ministarstvima pokušati naći najbolji način donijeti određena privremena odluka ili mjera kako bi se izbjeglo da imamo je li u tom periodu gdje je neminovno zbog broja ljudi koji dolaze, ogromne gužve. Obzirom da je Sarajevo, evo se, našlo i na listi najpoznatijih svjetskih magazina kao preporuke u 2025. godini da se posjeti ovaj grad. Evo ovo je neka stvar koju želim da Vlada razmotri. Moguće je da oni određene aktivnosti rade i bez te odluke i planiraju, ali da se ti neki glavni radovi, gdje god je moguće, u suradnji sa lokalnim zajednicama, kako bi se te gužve svele na minimum. A i, naravno, ispunio i onaj ispunili oni ciljevi koji su planirani po pitanju tih radova u nekom drugom terminu.

Elvedin Okerić (predsjedavajući)

Vrijeme kolega.

Zahvaljujemo se uvažanim zastupnicama i zastupnicima na postavljenim pitanjima. Je li vi kolega Čičiću. Izvolite, imate riječ? Zastupnik Davor Čičić.

Davor Čičić (zastupnik)

Zahvaljujem predsjedavajući. Pozdravljam sve prisutne i sve građane koji nas danas gledaju. Ja ću podnijeti jednu inicijativu prema Kantonalnom javnom komunalnom preduzeću Toplane, radi se o inicijativi za preuzimanje i upravljanje energetskim postrojenjem, energetskim postrojenjem Dnevnog centra za djecu za poteškoćama u razvoju "Denis". Predlažem da postrojenje podstanice Dnevnog centra "Denis" preuzme na upravljanje i održavanje od strane KJKP Toplane Sarajevo. Ovim bi se omogućilo profesionalno vođenje tehničkih postrojenja, bolji nadzor nad potrošnjom, energijom i optimizacijom troškova. Toplane kao stručni

upravljač energetskih sistema mogu osigurati redovno održavanje, bržu intervenciju u slučaju kvara, smanjenje troškova upravljanja te modernizaciju sistema npr. prelazak na obnovljive izvore energije i nove tehnologije grijanja i hlađenja. Mislim da bi uz podršku Vlade i Skupštine i Toplane ovakav model predstavljaju dugoročno održivo rješenje za grijanje i hlađenja objekta Dnevnog centra "Denis", a taj objekat je, kao da vas podsjetim, i u vlasništvu Kantona Sarajevo. Zahvaljujem.

Elvedin Okerić (predsjedavajući)

Ministar Enis Hasanović se javio za riječ da ponudi odgovore na postavljena pitanja. Izvolite, imate riječ.

Enis Hasanović (ministar)

Zahvaljujem predsjedavajući, pozdravljam rukovodstvo Skupštine, zastupnice i zastupnike i gledaoce. Uvaženi zastupnik Ilijaz Pilav je podnio inicijativu za indikaciono područje za onkološke lijekove. Zadnji put je lista ažurirana federalna lista 2019. godine. Zastupnica Belma Kapo je to nešto isto ili slično podnijela. Da vam objasnim, kao što znate Skupština je upoznata sa tim da je Ministarstvo zdravstva pripremilo prioritetni program, Vlada Kantona Sarajevo usvojila i ZZO odvojio novce za onkološke pacijente sa područja Kantona Sarajevo. Do danas je 375 pacijenata skinuto sa te liste čekanja Federalnog zavoda zdravstvenog osiguranja. U Kantonu Sarajevo nema niko ko je na listi ko ne dobija lijekove. Međutim, to je odlična stvar bila. Mislim da je neko od zastupnika već rekao da je to i manje novca nego što smo planirali, međutim postoji jedan drugi problem da zastupnici razumiju i gledaoci. Postoje lijekovi koji su odobreni od te komisije Federalnog zavoda zdravstvenog osiguranja i reosiguranja, odobreni samo za 1 ili 2 karcinoma. U međuvremenu, kako je i dr Pilav rekao, i puno, puno toga je medicina, naravno, promijenila, napredovala, imaju lijekovi koji su se pokazali kao izvrsni za metastatske promjene kod drugih karcinoma, međutim, oni po nekom pravilniku i nekoj indikacionoj listi, koja je od 2019. godine, nisu za to odobreni, tako da pacijenti koji imaju određen karcinom, recimo jajnika ili prostate, ne mogu dobiti lijek koji nije za njih odobren, a ponavljam, to je 2019. godine zadnji put urađeno. To bi normalno i redovno trebao raditi 2 ili 3 od 4 puta godišnje. Mi te pacijente ne možemo u ovaj program uvrstiti trenutno koji je Vlada usvojila zato što oni nisu uopće na listi čekanja. Na listi čekanja su pacijenti za koje su odobreni te indikaciona područja. Inače bi mi to skinuli do sada. S obzirom da su nama onkolozi govorili za taj problem s obzirom da smo mi probali sa Federalnim zavodom ubrzati to i Federalno ministarstvo zdravstva da imenuje Komisiju koja bi to promijenila, čija je to isključiva ingerencija i nadležnost, to se nije desilo do danas i mi smo krenuli sa tom inicijativom već prema ZZO-u. Mi imamo komisiju koja prati provođenje ovog prioritelnog programa koja stavlja pacijente na te liste, to su onkolozi naši i predstavnici Ministarstva zdravstva i Zavoda za zdravstvenog osiguranja Kantona Sarajeva, Apoteka Sarajevo. I oni rade redovno i odlično, rade svoj posao i oni su nam predložili ta komisija i Onkološka klinika prije nekih dvadesetak dana da mi preuzmemo i ovaj dio posla koje apsolutno nije u nadležnosti Ministarstva zdravstva, Kantona Sarajevo, Vlade ili našeg Zavoda zdravstvenog osiguranja. Iako nije u nadležnosti, pacijenti i dalje imaju potrebu za to. Kao što je neko rekao, bilo je i takvih slučajeva koji, nažalost nisu mogli dobiti te lijekove. Mi smo obavili razgovore i sa direktorom ZZO-a, sa pravnicima u ZZO-u, one mogu naći pravni način kako da to rade, a u svakom slučaju mi idemo dalje. Nama su tražili i pacijenti, udruženje pacijenata to. Mi ćemo to i dalje nastaviti pokušavati naći način. Ja vam se iskreno zahvaljujem za ovu inicijativu i Ilijaz Pilav, i Belma i troje ih je bilo tamo u toj u toj inicijativi. A da vam kažem da smo mi već poslali, mi imamo, 05.05. smo poslali prema ZZO-u zahtjev i inicijativu da oni ovo urade, ovo što vi tražite i mi ćemo se dalje boriti za to i za pacijente i ostalo, probati, iako, ponavljam, to je isključiva

nadležnost Federacije i to ni jedan drugi Kanton nije ni uradio. Nismo sigurni da možemo mi mijenjati te indikaciona područja koja oni rade, ali ću nastaviti pokušavati to. Ja vjerujem da ćemo mi uspjeti. Svakako, vaše inicijative nas mogu pogurati u tome i podržati. Hvala svima koji ste to uradili. Zastupnica Arijana Memić, Klinički centar. Pitanje za objavu informacija, izvinjenje. I ja znam o tome samo iz medija. Mi ćemo proslijediti ovo pitanje u Kliničkom centru i tražiti odgovor.

Zastupnica Vildana Bešlija hospis Klinički centar i Opća bolnica. Tako je, u Kantonu Sarajevo je otvoren prije 2 godine, mislim prije mog dolaska neki privatni hospis jedan. Ima jako velika potreba za hospis u javnom vlasništvu. Pričao sam i sa zastupnicom i sa drugima prije, mi ćemo pokušati to riješiti, potreban je prostor, ali potrebna je registracija nove firme. Direktor Opće bolnice, „doktor Abdulah Nakaš“, direktor Ismet Gavrankapetanović me zvao da probamo to riješiti u krugu Opće bolnice imaju zgrade koje pripadaju Federaciji koje se sada ne koriste, gdje bi mogao biti smješten hospisa. Apsolutno podržavam inicijativu, podržavamo taj dio. On je uputio i mi smo prosljedili federalnoj Vladi zahtjev da nam se daju na korištenje ti objekti. Onda bi išli vjerojatno u registraciju novog subjekta jer je upitno da li možemo u okviru Opće bolnice postajati to ili kao poseban subjekt, ali najlakše bi nam bilo u okviru Opće bolnice, ako bude moglo, mi ćemo to završiti uraditi kada dobijemo te objekte. U svakom slučaju radimo na tome i slažem se da je to velika potreba i mislim da ćemo to riješiti.

Zastupnica Vedrana Vujović pitanja o Leptospirozi i Zavodu za javno zdravstvo. Od jutros svi pišu o tome, za sat i po će biti konferencija za štampu Zavoda za javno zdravstvo Kantona Sarajevo. Pozvani su svi mediji. Ja mogu reći ono što i već i poznato u javnosti, da ne bude nesporazuma. Do prošle godine, sjećate se na Skupštini bila i jedan dan, cijeli dan rasprava oko Pravilnika o deratizaciji, dezinfekciji i ostalo što, onda smo mi usvojili taj Pravilnik i nakon 2,5 godine uradili prvi put jesenju redovnu deratizaciju. Dva puta, godišnje se radi redovno, mi smo jesenju uradili, sada je urađeno, upravo je završena i proljetna deratizacija. Znači, nije se zakasnilo, sve to odrađeno i upravo i prije ovih izlaska u javnost ovo na tom području se radila korektivna deratizacija zato što se pojavilo dosta tamo mjesta gdje ima nepokošene trave, gdje ima otpada, gdje ima odlaganja, svakakvog i životinjskog i ostalog materijala, mjesta gdje su zapuštena i isto tako nedostatak kontejnera, tako da ima smeća okolo i pa se javila potreba za dodatnom deratizacijom. Pored ove obavezne redovne, dužni su i vlasnici svojih objekata to da rade, duži su i etažni vlasnici, pogotovo šupe, podrumi i ostalo gdje ima mjesta za gdje se glodari skrivaju, gdje mogu ostati van doseg ovih sredstava kada se radi deratizacija. Upućeni su na vrijeme dopisi svima, i općinskim organizacijama i ostalima da to urade. Zavod za javno zdravstvo će izaći sa tačnim konkretnim podacima. 10 pacijenata je bilo pregledano u Kliničkom centru, kod 10 je dokazana laboratorijski Leptospiroza. Trenutno je samo 1 pacijent na Infektivnoj klinici na Kliničkom centru i nije bio ni jedan sa težom kliničkom slikom. U svakom slučaju, kažem, sve pojedinačne i konkretne informacije će danas u 12 predstavi Zavod za javno zdravstvo. On jutros tražio proglašenje epidemije na tom uskom području na Dobrinji. To je proces koji ide prema nama, mi federalnom ministru tražimo, ali u smislu da se poduzmu vanredne mjere košenja trave, odvoz smeća i čišćenja terena. I ponovna je, kažem, koja se svakako radi, deratizacija, a već urađena i redovna tu. To se javlja ponekad u nekim područjima gdje imamo takve uslove trava je nepokošena i ostale stvari za razvoj glodara. To je to. Kolega, ja se izvinjavam ako nisam zapisao prije toga, ja ću vam pismeno odgovoriti inicijativu i pitanje što je neko bilo zato što sam bio na sastanku upravo ovim povodom, pa sam malo zakasnio. Mi ćemo vam to odgovoriti pismeno. Hvala.

Elvedin Okerić (predsjedavajući)

Ministrica Darja Softić-Kadenić, hoćete vi ponuditi? Ok. Ministrica Darja Softić. Izvolite, imate riječ.

Darja Softić-Kadenić (ministrica)

Izvinite, iskoristila sam ovu, nema ove moje kartice gore. Pitanje je bilo vezano, pitanje je bilo vezano za izmjene i dopune Zakona o suzbijanju i prevenciji korupcije. Moram reći da sa sadržajem dopisa koje eventualno šalje pojedinačno Ured za borbu protiv korupcije, nisam upoznata niti, Ured ovaj zakon primjenjuje potpuno samostalno i nezavisno, tako da mi ne kontrolišemo Ured, niti ja znam u konkretnim postupcima kako izgleda dopis koji bi Ured eventualno poslao postupajući po nekoj odredbi zakona. Ali generalno gledano, moram reći, ako sam dobro razumjela vaš upit i dilemu koja je eventualno nastala član 9, odnosno kad čitate definicije u Zakonu u kojem je jasno razgraničen pojam javnog preduzeća i privrednog društva, član 9. reguliše samo privredna društva i obavezu izuzimanja u slučaju postojanja finansijskog interesa u privrednom društvu, a ne u javnim, ne u javnim preduzećima. S obzirom da su ovi pojmovi razgraničeni kroz definicije u Zakonu. Ali evo, da sad ne bih prejudicirala previše, razmotrit ćemo, ovo shvatam kao inicijativu, razmotrit ćemo inicijativu. Što se tiče ja, moram reći da postoje također, s obzirom na vrijeme koje je u međuvremenu odmaklo od usvajanja ovog Zakona, postoje i neki drugi razlozi zbog kojih bi bilo opravdano ići u izmjene i dopune. Nisam sigurna da je to moguće raditi u hitnom postupku, ali u nekom ovaj, evo kako bih rekla, prihvatam da razmotrimo i ovu inicijativu. A što se tiče konkretnog postupanja Ureda, tu stvarno ne mogu niti želim niti mogu davati bilo kakve komentare. Drugo pitanje je bilo vezano za izvještaje o radu Studentskog centra. Moram unaprijed reći da stvarno lično ne znam koji su razlozi, evo, pitala sam službenike u ministarstvu da li je i kada je bio ovaj izvještaj, da li je zaprimljen i dobila sam informaciju koju, evo, direktno vam ovaj prenosim kao takvu da je u jednom trenutku bio predat neka vrsta kumulativnog izvještaja koji je zapravo bio jedan objedinjeni dokument za nekoliko godina, pa su iz Ministarstva to vratili sa uputom da se dostave pojedinačni izvještaji, da to nije učinjeno i da je to trenutno stanje. Evo, to je sve što u ovom momentu znam na tu temu. Izvinjavam se s obzirom da zaista tek sam preuzela ovaj resor i nisam upoznato sa ovim stvarima od ranije.

Elvedin Okerić (predsjedavajući)

Zahvaljujemo se ministrici Darii Softić-Kadenić. Ministar privrede je na službenom putu. Ostali zastupnici i zastupnici će dobiti će svoje odgovore pismenim putem.

Zastupnica Admela Hodžić, poslovnička intervencija, izvolite imate riječ.

Admela Hodžić (zastupnica)

Zahvaljujem se na informaciji, predsjedavajući, da je ministar na službenom putu, ali vjerovatno ima zamjenik ili neko ko bi mogao ostati u kabinetu da ga mijenja, znalo se da je sjednica i da ćemo vjerovatno tražiti usmeni odgovor, ovo je sat Vlade, pa ne vidim razloga da neko ne bude zamjena, da da odgovore na koje tražimo usmeni odgovor. Zahvaljujem.

Elvedin Okerić (predsjedavajući)

Prenijet ćemo ministrima u Vladi ovu poruku, a svakako ćete svi dobiti odgovore na svoja pitanja pismenim putem.

Prelazimo na tačku dva.

AD-2.

NACRT ZAKONA O REGISTRU FINANCIJSKIH POTRAŽIVANJA U KANTONU SARAJEVO

Materijal ste dobili uz poziv za sjednicu. Molim predstavnika predlagača da podnese uvodne napomene. Ministar financija Afan Kalamujić. Izvolite, imate riječ?

Afan Kalamujić (ministar)

Zahvaljujem predsjedavajući. Želim da pozdravim sve. OK, evo želim da pozdravim sve uvažene zastupnike, zastupnice, kao i građane koji nas prate putem malih ekrana. Danas imamo na redu znači, Nacrt Zakona o Registru financijskih potraživanja Kantona Sarajevo. Analogno ranijem Zakonu o registru financijskih obaveza u Kantonu Sarajevo, kako sam i najavio, pravni osnov za donošenje Zakona o Registru financijskih potraživanja u Kantonu Sarajevo sadržan je u odredbama člana 12. tačka m) Ustava Kantona Sarajevo, kojim je uređeno da Kanton Sarajevo ima sve nadležnosti koje nisu izričito povjerene federalnoj vlasti ili koje ne spadaju u vlastite nadležnosti jedinica lokalne samouprave, a posebno je nadležan za financiranje djelatnosti Kantonalnih vlasti ili Kantonalnih agencija oporezivanjem zaduživanja ili drugim sredstvima, kao i člana 18. tačka b) kojim je utvrđeno da je u nadležnosti Skupštine Kantona Sarajevo, između ostalog i donošenje zakona i drugih propisa u okviru izvršavanja nadležnosti Kantona. Razlog za donošenje ovog zakona, kako sam i rekao ranije, da se na nivou Kantona Sarajevo uspostavi jedinstvena baza podataka o svim potraživanjima Kantonalnih ministarstava Kantonalnih uprava, Kantonalnih upravnih organizacija i drugih službi, organa zakonodavnih i izvršne vlasti, kao i drugih budžetskih korisnika Kantona Sarajevo, vanbudžetskih fondova, jedinica lokalne samouprave, javnih ustanova, javnih preduzeća čiji je osnivač Kanton Sarajevo, te javnih preduzeća i javnih ustanova čiji osnivači su jedinice lokalne samouprave u Kantonu Sarajevo, te pravnih lica u kojima Kanton Sarajevo i/ili jedinica lokalne uprave u Kantonu Sarajevo učestvuje sa više od 50 % ukupnog kapitala. Dakle potraživanja po osnovu javnih prihoda, potraživanja po osnovu zaključenih ugovora, potraživanja po osnovu režijskih troškova i drugo. Registar financijskih potraživanja će se, u skladu sa ovim Zakonom, uspostaviti i voditi u Ministarstvu financija Kantona Sarajevo. Jedinstvena evidencija takvih podataka je podloga temeljem koje bi bilo moguće vršiti potrebne analize, predlagati i donositi odgovarajuće politike, strategije i mjere, a sa ciljem da se konačno obezbijedi efikasnije uprave financijskim potraživanjima u Kantonu Sarajevo. Objedinjenost podataka je od posebne koristi za praćenje i dijagnostiku problematike naplate potraživanja po različitim osnovama koje postoje, te služi kao okidač za blagovremeno djelovanje i minimiziranje štetnih posljedica po budžet Kantona Sarajevo. Na osnovu svega navedenog, Ministarstvo financija Kantona Sarajevo procjenjuje da uspotavljen jedinstveni Registar financijskih potraživanja u Kantonu Sarajevo je od izuzetnog značaja te predlažemo Skupštini Kantona Sarajeva utvrdi Nacrt zakon o Registru financijskih potraživanja. Ja vam unaprijed zahvaljujem za podršku. Te nakon ovoga jel slijedi javna rasprava 30 dana i pozivam sviju da daju svoje konstruktivne prijedloge ukoliko prepoznaje da u Zakonu nešto nedostaje ili se može unaprijediti, mi ćemo rado isti razmotriti do prijedloga zakona. Zahvaljujem.

Elvedin Okerić (predsjedavajući)

Zahvaljujemo se uvaženom ministru Afanu Kalamujiću. Možete se vratiti na sve mjesto. Otvaram raspravu, možete se samo prijaviti. Kolega Dević je tražio pauzu, možda nam samo kazati jel ovo klupska od 15 minuta ili ne? Mislio sam da radimo tamo do pola 1 do džume, onda da napravimo veću pauzu, pa zbog toga. Oko 15 minuta pauza u ime Kluba SDA.

NASTAVAK NAKON PAUZE

Elvedin Okerić (predsjedavajući)

Nastavljamo sa sjednicom Skupštine Kantona Sarajevo. Otvorena je rasprava. S obzirom da se niko nije prijavio za raspravu, a imamo. Zastupnik Faruk Selmanović. Izvolite, imate riječ.

Faruk Selmanović (zastupnik)

Danas ovdje pred nama zastupnicima se nalazi Nacrt zakona o Registru financijskih potraživanja u Kantonu Sarajevo. Zakonski prijedlog koji na prvi pogled je nešto što trebamo da pohvalimo i što donosi neke pozitivne cjeline i promjene tipa digitalizacije, transparentnosti, efikasnosti, upravljanje javnih potraživanja. Međutim, kao zastupnici moramo da skrenemo pažnju da ovaj sam Nacrt zakona ima i određene manjkavosti i one predstavljaju ozbiljnu prijetnju i mogu biti predmet možda kasnije neke manipulaciju. Vlada Kantona Sarajevo na 33. Sjednici, održanoj 18.07.2024 godine donijela je zaključak kojim se utvrđuje Nacrt zakona o Registru financijskih potraživanja u Kantonu Sarajevo koji je predložen Skupštini Kantona Sarajeva da u skladu sa Poslovnikom Skupštine Kantona Sarajevo utvrdi nacrt Zakona o Registru financijskih potraživanja, te isti i dostavila predsjedavajućem, Skupštini Kantona Sarajeva i zamjenici predsjedavajućeg Skupštine Kantona Sarajevo. Dakle prije gotovo godinu dana Vlada Kantona Sarajevo utvrdila nacrt i dostavila predsjedavajućem i zamjenicima predsjedavajućeg Skupštine, a mi tek danas raspravljamo o ovom Zakonu. S tim u vezi postavljam pitanje šta je razlog zašto je tek danas, godinu dana nakon od 23., godinu dana nakon 23. 5. razmatrano na Skupštini. Članom 136. Poslovnika Skupštine je propisano da se Nacrt zakona dostavlja predsjedavajućem i njegovim zamjenicima, a predsjedavajući Skupštine upućuje nacrt poslanicima radi razmatranja u komisijama Skupštine. U skladu sa navedenim, nacrt zakona je trebao biti razmatran u Skupštini mnogo ranije, odnosno po prijemu nacrta, kako je utvrdila Vlada, ne čekajući da se protekne godina dana i postavlja se pitanje šta je zakon radio godinu dana u nekoj ladici. E sad, ako pročitamo kompletan Nacrt zakona, možemo vidjeti da otvaraju se određena pitanja, sumnje, nedostatke. Prva od pitanja: ko su obveznici unosa podataka, ko ima pristup Registru i u kojem obimu, ko će provjeravati tačnost unosa i ko snosi odgovornost za pogrešan ili selektivan unos? Pazite, jer bez instrumenata kontrole i sankcije ovo se ne može nazvati zakonom već eventualno administrativni pokušaj koji se lako može pretvoriti u alat za politička filtriranje i ne do Bog obračuna. Dakle, članom 1 stav 1 Nacrta zakona propisano je da ovim zakonom utvrđuje predmet, odnosno način uspostave sadržaja i vođenja jedinstvenog registra financijskih potraživanja u Kantonu Sarajevo. Međutim, trenutno u Ministarstvu financija već postoji sektor za upravljanje dugom, pa se pitamo šta je do sada radio taj sektor, koje registre vodi i kako će se ovaj novi registar uklopiti u tu strukturu? Da li se ovim zakonom dupliraju i nadležnosti ili se otvara prostor za neefikasnost, dodatnu birokratiju, pa da onda imamo i dodatno zapošljavanje jer će neko trebati da vodi i sam Registar. U članu 13. Registra se proglašava ne javnim, ali isti član dopušta ministru da određene podatke koristi u statističke ili istraživačke svrhe. Tu dolazimo do ozbiljne pravne kolizije; da li ovim postoji mogućnost selektivnog otvaranja podataka i ko garantuje da podaci fizičkih i pravnih lica neće biti zloupotrebjeni. Zakon o zaštiti ličnih podataka ne poznaje naučni izgovore za narušavanje privatnosti građana. Onda imamo ovdje ozbiljan propust- izostanak konsultacije sa lokalnim zajednicama. Zakon nije izrađen, u konsultaciji sa jedinicama lokalne samouprave, svedeno je na slanje dopisa bez ikakvog inzistiranja na povratnim informacijama i samim tim onda nije ispoštovan duh člana. Stav 5 Europske povelje o lokalnoj samoupravi, član 56. Zakona o principima lokalne samouprave Federacije Bosne i Hercegovine. Ne smijemo ignorisati zakonsku obavezu i biti nezainteresovani prema stavovima lokalnih nivoa vlasti, moramo ih uključiti u donošenje samog ovakvog zakona ako zakon implementiramo bez nezavisnog nadzora, rizik je očigledan, registar može postati politički instrument, a to ne smijemo dopustiti. Pa onda možemo imati odabir pogodnih, prepisivanje neugodnih potraživanja prema partnerima na tenderima, udruženjima, pa i političkim bliskim firmama i to se ne smije dopustiti i ovaj zakon ne smije to postati. Zakonu fale i jasne sankcije, nema kazni za neažurno, netačno ili selektivno unošenje podataka nema odgovornosti, nema posljedice i samim tim nema i stvarne obaveze. I onda se postavlja pitanje da li je registar sredstvo transparentnosti ili sredstvo birokratske šminke. Jer

ako nemate sankcija, šta onda dobijemo sa ovim registrom? Pa pazite, ovaj registar sam po sebi ne trebamo ga odbaciti, ali moramo biti svjesni da kada se zakon donose, bez ozbiljne analize, bez uvida u stvarne kapacitete, bez javne kontrole i uz proceduralne propuste, građani imaju pravo na sumnju. Sve ovo moramo ispraviti. Da *a priori* ne odbacujemo registar, ali evo da iskoristimo naredni period da njegove ozbiljne prepravke kako bi uključili učešće Skupštine, lokalne zajednice, struke i građana, da ovo ne bude samo jedna birokratska šminka, nego doista da ovaj zakon bude sredstvo kako bi se dug Kantona Sarajevo unutrašnji dug stavio pod kontrolu i kako bi istinski bio alat u rukama Vlade za poboljšanje kvaliteta života u Kantonu Sarajevo, a ne da se pokaže da je to samo još jedan propust u upravljanju sistemom, možda ne iz zle namjere, evo ne kažemo da je bilo zre namjere, ali nedostatak, nedostatak kompetencija, u čemu leži najviša opasnost ako se ovakav zakon, odnosno u ovakvom tekstu, prođe bez izmjena do stvarno donošenja zakona. Zahvaljujem.

Elvedin Okerić (predsjedavajući)

Replika zastupnica Mersiha Mehmedagić, izvolite, imate riječ.

Mersiha Mehmedagić (zastupnica)

Zahvaljujem predsjedavajući. Repliciram kolegi na navode da, ustvari, nekoliko puta je to ponovio, da nema odgovornosti ukoliko se unesu netačni podaci ili se ne unesu nikako pa ću pročitati član 16. Kaznene odredbe koji u svom stavu (1) kaže odgovorno i ovlašteno lice iz člana 7. Stav (2) ovog zakona koji namjerno ili iz nepažnje propusti da unese podatke ili izvrši unos netačnih podataka o finansijskim potraživanjima obveznika unosa podataka, ukoliko radnje ne sadrži obilježja krivičnog djela, kaznit će se novčanom kaznom od 500 do 1000 KM. I dalje u stavu 2. Za ponovljeni prekršaj iz stava 1 ovog člana odgovorno je ovlašteno lice kaznit će se novčanom kaznom od 2 do 3000 KM. Dalje, za nepotpuni ili netačan unos podataka i stava 1 ovog člana i ne postupanje u skladu sa članom 7 stav 2 i 4 ovog Zakona kaznit će se rukovodilac obveznika unosa podataka novčanom kaznom od 1000 do 2000 KM, a za ponovljeni prekršaj iz stava 3 ovog člana rukovodilac obveznika unosa podataka kaznit će se novčanom kaznom od 3 do 5000 KM. Znači, nije tačno ovo što je kolega naveo. Hvala.

Elvedin Okerić (predsjedavajući)

Zahvaljujemo se zastupnici Mehmedagić na pojašnjenju. Znači samo treba čitati.

Odgovor na repliku. Da vidimo šta piše u vašem materijalu. Izvolite, kolega Selmanoviću.

Faruk Selmanović (zastupnik)

A zahvaljujem kolega, pošto vidim volite da čitate, dat ću vam ja materijal da pročitate, nije problem. Zahvaljujem se kolegici. Naravno, to su kazne koje su simbolične, a ovdje se radi o ozbiljnim dugovima i ozbiljnim sredstvima koje je interni dug u Kantona Sarajevu. Samim tim i kazne trebaju biti puno veće, odgovornost puno veća i ne, svesti se samo na onoga koji upisuje tamo podatke, kazna od 500 do 1000 maraka je potpuno nerazmjerna za količinu duga ili onoga što se može postići ne unošenjem samih podataka. Na to se odnosila moja diskusija. Zahvaljujem.

Elvedin Okerić (predsjedavajući)

Imamo repliku zastupnik Davor Čičić, pa zastupnik Muamer Bandić, replika.

Davor Čičić (zastupnik)

Zahvaljujem predsjedavajući, replika kolegi Selmanoviću. Pa u svakom slučaju vaša rasprava se može smatrati prilogom odnosno javnoj raspravi koja će uslijediti u daljnjem i u svakom slučaju, svaka diskusija svih zastupnika u smjeru onom u kojim želim unaprijediti bilo koji nacrt zakona ona je dobrodošla i u svakom slučaju će se, evo, ministar i ministarstvo, i ne samo da li oni žele ili ne žele, imaju obavezu da svaku raspravu zastupnika uzmu kao prilog javnoj raspravi. Ono što bih ja želio da skrenem pažnju, vi ste spomenuli par puta, evo da ministarstvo ima odjel za dug i zaduživanje, pa samo želim da skrenem pažnju ovoj Zakon o potraživanjima. Znači vi malo brkate, dug i zaduživanje sa potraživanjima. Znači, nije to ista stvar. Taj odjel radi o zaduživanju i uzimanju kredita za Kanton Sarajevo, a ne onaj potraživanjima. I druga stvar, ovaj zakon se donosi zato što Ministarstvo do sada nije imalo zakonsko uporište i nadležnosti da sve ovo provodi na način kako je ovdje definisano. U svakom slučaju, ja se slažem s vama da ima prostora za unaprjeđenje, da treba uključiti u javnu raspravu i pošto se ovdje odnosi i na lokalnu samoupravu, onaj i jedinice lokalne samouprave. Ali morao sam skrenuti pažnju da znači vi u vašoj raspravi brkate dug, zaduživanje i potraživanja, što apsolutno nije isto, a ovo je Zakon o registru finansijskih potraživanja. Hvala.

Elvedin Okerić (predsjedavajući)

Odgovor na repliku zastupnik Faruk Selmanović.

Faruk Selmanović (zastupnik)

Zahvaljujem se kolegi. Naravno, ovakav zakon je nešto što nam je potrebno i ovakav registar je nešto što je pohvalno naročito u ovom dijelu koji se odnosi i na digitalizaciju i ubravanje samih procesa. Ali prilikom donošenja ovakvih zakona moramo voditi računa da upravo ovakve stvari ispravimo, popravimo i unaprijedimo jer doista mislimo da ovako ovo nešto, ako se isprati do kraja i bude urađeno u standardima struke, može itekako pomoći Kantonu Sarajevo. Naravno, ima odjel i zahvaljujem se kolegi na pojašnjenju. Ipak je kolega bio ministar, zahvaljujem.

Elvedin Okerić (predsjedavajući)

Zahvaljujem se. Zastupnik Muamer Bandić se javio za riječ. Replika.

Muamer Bandić (zastupnik)

Zahvaljujem se. Kolega Selmanović je u svom izlaganju naveo da ovim zakonom nisu propisane sankcije. I ja se s njim slažem. Kolegica Mehmedagić je taksativno nabrojala u stvari obilježja određenih radnji koje predstavljaju prekršaj, međutim ova obilježja prekršaja su ustvari samo nagrada za one koji to urade. Ukoliko izbijemo ove sankcije sada, ova djela će biti propisana kao krivična djela, to je mnogo veća odgovornost, mnogo veća sankcija. Kad je u pitanju disciplinska odgovornost, disciplinska odgovornost i ne treba da uređuju ovim zakonom to će se urediti vjerojatno naknadno Zakonom o državnoj službi, odnosno pravilnicima, unutarnjom sistematizacijom i podzakonskim aktima kojim se utvrđuju ustvari disciplinska odgovornost. Tako da sugestija kolege Selmanovića je odlična, mada, evo i kolegica Mehmedagić je u pravu on jeste rekao da ne postoji ta sankcija i da nije propisana. Ona jeste propisana, ali ovo je u principu jedna vrsta nagrade za ovakvu učinjeno teško djelo koje bi ustvari trebalo da ima obilježje krivičnog djela. Iz tih razloga radi se o zakonu koji je tek u javnoj raspravi, imamo svi mogućnost da utičemo na njega. Ja ću u svojoj diskusiju se osvrnuti ustvari na ovaj dio zakona. Hvala.

Elvedin Okerić (predsjedavajući)

Odgovor na repliku zastupnik Selmanović.

Faruk Selmanović (zastupnik)

Zahvaljujem se kolegi Muameru Bandiću jer upravo je ovo što je i kolega kazao jako bitno da vodimo računa prilikom nastavka rada na ovom zakonu, da kazne koje su propisane u samom zakonu ne budu tako minimalne i beznačajne da one izgledaju kao nagrada za onoga ko uradi takvo djelo. Ipak se radi o potraživanjima koja dosežu milionske iznose. Zahvaljujem.

Elvedin Okerić (predsjedavajući)

Zastupnica Marijela Hašimbegović se javila za riječ.

Marijela Hašimbegović (zastupnica)

Zahvaljujem se predsjedavajući. Ja želim izraziti svoje zadovoljstvo sa radom i djelovanjem Ministarstva financija jer su, evo, slijedom svih aktivnosti koje su do sada urađene, evo i po pitanju registra koji se tiče zaduživanja, a sada evo i registra potraživanja ustvari govori da žele zaista disciplinirati aktivnosti Ministarstva financija, žele urediti određena polja koja su očigledno do sada tražila da se na ovaj način informacije koje se tiču ranije zaduživanja, sada evo potraživanja da budu u jednom jedinstvenom dokumentu koji se, evo, naziva registar o potraživanjima, jer su očigledno informacije o potraživanjima ranije bile arhaično raspoređene, a na ovaj način sada ćemo imati jednu centraliziranu informaciju koja će doprinijeti ne samo transparentnosti financijskih tokova, nego ja, evo, želim čvrsto da vjerujem da će na neki način donijeti stabilnosti javnog sektora, kao i nekog boljeg upravljanja poslovnim okruženjem. Međutim, ono što se tiče transparentnosti samog dokumenta za mene je problematičan tekst člana 13. koji govori da zakon nije javan, odnosno da registar nije javan. Kolega Selmanović je istakao da u ovom kontekstu je postavio pitanje ko ima pristup registru i u kojem obimu. Ja bi to definisala na ovaj način: ako smo naznačili u tekstu da registar nije javan, ipak trebamo na neki način precizirati za koga je javan, a za koga ne, jer postoje zaista akteri u procesima djelovanja koje moraju imati određenu vrstu informacija i da se ne bi manipuliralo sa ovom informacijom i sa tekstom koji je sadržan u ovom članu, mislim da bi bilo dobro precizirati, dakle, kome su ove informacije dostupne i na koji način. Evo, to bi bila neka moja zamjerka. Naravno, iskoristit ćemo vrijeme koje se tiče vremena javne rasprave, ali u ovom trenutku Klub Demokratske fronte će podržati Nacrt ovog zakona. Hvala lijepa.

Elvedin Okerić (predsjedavajući)

Replika zastupnica Admela Hodžić. Izvolite imate riječ.

Admela Hodžić (zastupnica)

Zahvaljujem. Pa evo replika samo u smislu pojašnjenja, pošto smo imali ovakva pitanja i na komisijama, pitali smo gospođu iz Ministarstva financija koja je došla kao predlagatelj da prezentuje ovaj materijal. I svi smo nekako imali primjedbe na to što registar nije javan, ali pojasnila nam je da je registar samo skup podataka koji stoje na jednom mjestu, koji se mogu koristiti, a da su vlasnici informacija i podataka ovlaštena, odnosno nadležna ministarstva i da u skladu sa Zakonom o pristupu informacijama možete podnijeti zahtjev i tražiti tražiti podatak iz svakog ministarstva ono što vas zanima. Zbog toga sam se i javila da pojasnim jer smo već to pitali. Eto, toliko.

Elvedin Okerić (predsjedavajući)

Zahvaljujemo se. Odgovor na repliku zastupnica Marijela Hašimbegović. Minut, izvolite.

Marijela Hašimbegović (zastupnica)

Evo ja se zahvaljujem zaista kolegici. Važno je u našem dijalogu između zastupnika da razjasnimo određene okolnosti kako bi dobili što kvalitetniji materijal u konačnici koji će jel disciplinirati sve aktere koji se tiču ovog registra, kako i dužnika, kako i onih koji upisuju ove podatke, a isto tako i one kojima će kasnije koristiti ovaj registar za ostala planiranja i aktivnosti. Toliko. Hvala lijepo.

Elvedin Okerić (predsjedavajući)

Zastupnik Muamer Bandić. Rasprava. Izvolite, imate riječ.

Muamer Bandić (zastupnik)

Zahvaljujem. Pred nama je zakon koji u svojoj suštini ne bi smio ostati puka administrativna procedura niti tehnički registar. Ovo je ključni instrument financijski odgovornosti i pravne sigurnosti zaštite javnog interesa u Kantonu Sarajevo. Dakle, ovdje se radi o Zakonu o registru financijskih potraživanja čija je osnovna svrha uspostavljanje centralizovanog, ažurnog i transparentnog evidencionog sistema svih novčanih obaveza koje prema trećim licima imaju budžetski korisnici, vanbudžetski fondovi, javne ustanove i javne procedure u vlasništvu, javna preduzeća, oprostite, u vlasništvu Kantona. Ovaj Zakon nam je potreban ili nije, može se postaviti pitanje i imamo možda dilemu. Mi trenutno imamo situaciju da ne znamo u svakom trenutku koliki su tačni dugovi javnog sektora, povjerioci nemaju pravnu sigurnost da će im potraživanja biti izmirena na transparentan način, a Vlada i resorna ministarstva ne mogu baš na adekvatan način i odgovoran način planirati rashode jer ne postoji pouzdana evidencija o postojećim obavezama. Okolnost da se stalno mijenjaju skupštinske većine i da stalno se donose podzakonski propisi koji na neki način utječu na vrstu ovih podataka postojala je do sada nesigurnost i nestabilnost u smislu ažuriranja i pronalaženja ovakvih podataka na jednom mjestu. To ustvari stvara kaos, pogoduje netransparentnim praksama, otvara prostor za zloupotrebe i direktno ugrožava budžetsku stabilnost Kantona. Kada govorim o pravnom osnovu za donošenje ovakvog zakona, on je utvrđen u Ustavu Federacije Bosne i Hercegovini, koji garantuje vladavinu prava i odgovorno upravljanje javnim sredstvima. Pored Ustava Federacije Bosne i Hercegovine i Kantona postoji zakonski propis koji nas upućuje na jednu ovakvu vrstu odgovornosti, to je Zakon o trezoru Federacije Bosne i Hercegovine koji traži tačne i pravovremeno evidentiranje budžetskih obaveza, zatim Zakona o budžetima Federacije koji predviđa transparentnost i odgovornost u planiranju i izvršavanju javnih rashoda. Šta nam u konačnici će ovaj zakon donijeti? Obavezu svih javnih subjekata da u jasno propisanom roku unesu podatke po svojim potraživanjima i obavezama, javno dostupnu evidenciju potraživanja za institucije, nadzorne organe, povjerioce, pa čak i građane. Onemogućava novo ugovaranje bez prethodnog izvršavanja postojećih obaveza. To bi trebao da bude princip ustvari, temeljni princip ovog Zakona. Sankcije za one koji izbjegavaju unose ili daju netačne podatke, jer zakon bez sankcija, on je ustvari obična fikcija. Kada su u pitanju ove sankcije koje su propisane, evo, ja sam već naglasio u svojoj diskusiji, odnosno u replici, kolegi Selmanoviću, ja sam imao jednu situaciju gdje u ustvari budžetski inspektor utvrdi obilježje nekog prekršajnog postupka koji stvarno na kraju utvrdi i sud, odnosno tužilaštvo, da postoji obilježje krivičnog djela, ali okolnost da se vodio postupak po prekršaju o radovima koje predstavlja obilježje, istog krivičnog, istog djela, nije se, dakle, tužilaštvo opredijelilo da pokrene krivični postupak. I to je možda jedno od loših, odnosno od zamjerki ovom zakonu. Okolnost da se zakon nalazi u fazi javne rasprave, imamo mogućnost da na taj način utičemo i na sam zakon i ovaj možda da

u tom kontekstu određene izmjene zakona uredimo. Šta postizemo usvajanjem ovakvog jednog zakona? Prvo, mi ćemo štititi budžet Kantona Sarajevo jer se sprječava gomilanje dugova bez pokrića. Drugo, štitimo povjeroce, odnosno firme koje isporučuju robu i usluge javnim institucijama koje danas često ne znaju kada i da li će biti plaćene. A ono što jeste bitno kada se radi u dostupnosti ovih javnih podataka, ovi podaci, dakle, nisu, nisu ničije vlasništvo, dakle samo neko od njih može neko, odnosno od osnivača, može biti posjednik tih podataka, ustupiti ih na, putem, dakle zahtjeva za javnim, pristup informacijama i na taj način može doći do ovih, dakle i podataka i u ovom dijelu ovo nije tako, da kažem loše uređeno kako je sada već ministar to i predložio. Ja bih se, dakle, samo još postavio jedno pitanje, da li se ovakva vrsta podataka će još voditi u printanoj formi, ono što mene zanima jer se radi o podacima koji se vode elektronski, da li će ovakva vrsta podataka biti vođena i u printanoj formi? Kada je u pitanju disciplinska odgovornost, ovaj zakon ne treba da propisuje disciplinsku odgovornost državnih službenika, državni službenici imaju zakon kao temeljni osnov za zasnivanje radnog odnosa i prestanak radnog odnosa, eventualno kažnjavanje. Ovi prekršajni koji su propisani, oni mogu biti uneseni, dakle u neki podzakonski akt kao neka disciplinska mjera ili disciplinska odgovornost državnih službenika, ali u svakom slučaju državne službenike ne trebamo dodatno opterećivati dodatnim zakonskim propisima, dodatnim zakonima u kojima ćemo regulisati ustvari obilježje njihovog ponašanja koje će biti detektovano kao neka disciplinska mjera. Kao što sam već rekao, Zakon se nalazi u formi nacrtu i bit ću u javnoj raspravi, a svi ćemo imati priliku da utičemo na taj zakon i Klub Stranke za Bosnu i Hercegovinu će podržati ovaj nacrt i evo pozdravljamo ministra na ovakvom Prijedlogu nacrtu zakona. Hvala.

Elvedin Okerić (predsjedavajući)

Za riječ se javio zastupnik Mahir Dević, rasprava.

Mahir Dević (zastupnik)

Mislim da su kolege već kazale najveći dio zamjerki koje bi mogle da se daju na određen nacrt. S obzirom da je u pitanju nacrt, vjerojatno će biti dovoljno vremena do prijedloga da se ove stvari razgraniče. Pitanje prekršajne i krivične odgovornosti unutar kaznenih odredbi, evo, mislim, ministre, da to pitanje trebate razriješiti, ovakve prekršajne odredbe koje ste predvidjeli, one mogu biti stimulirajuće za Vlade kakvi ste vi i Vlada. Znači ovo će vama koristiti super da vi to ponovo sakrijete sve za 500 konvertibilnih maraka. Pitanje Zakona o pristupu informacijama i vašeg sakrivanja ugovora tajnih, pošto ste vi skupštinska većina i Vlada tajnih ugovora koja krije od građana 300 miliona konvertibilnih maraka utroška sredstava, treba biti jasno precizirano, jer vi ne da krijete samo od građana, vi krijete te informacije od zastupnika, još se smijete na to. Znači pitanje pristupa tim podacima i baze podataka treba, odnosno s njom ko upravlja treba biti jasno riješeno. I mogu na kraju kazati sljedeću stvar, žao mi je što mi nismo ovakav zakon imali još dobrano ranije, na primjer da je bio usvojen negdje 2016. i 17. godine, mislim da bi on na najadekvatniji, najbolji način pokazao šta ste vi uradili sa Kantona Sarajevo za ovih 8 godina. Ovako, znamo to mi zastupnici i ljudi koji su vezani za ovaj rad u Skupštini, u Vladi, u ministarstvima itd. Međutim, obični građani ne prate jel ono što se kod vas dešava i kakva ste vi proizveli potraživanja u Kantonalnim javnim komunalnim preduzećima, koliko ste, naravno drugi je zakon u pitanju, podigli kredita, dugova itd. Sve u svemu, mi kao Klub SDA u suštini vama ne podržavamo ni nacrt zakona jer smatramo da vi kad predložite i nacrt zakona, da oni su u pravilu nakaradni. Ovaj put ćemo napraviti izuzetak, dat ćemo priliku da se ove odredbe o kojim je govorio kolega Selmanović, kolega Bandić, ovaj urede, jasno definiše ko ima pristup informacijama, na koji način će biti barem zastupnici u Skupštini Kantona Sarajevo, informisani o ovome, predložite li nam u zakonu da se mi vama trebamo kao zastupnici za ove stvari obraćati po Zakonu o pristupu

informacijama, odmah vam kažem da ćemo glasati protiv takvog zakona. Znači zastupnici u Skupštini su neko ko bi morao imati pristup takvoj vrsti podataka, barem interno, ako ne javno, da bi mogli se adekvatno pripremiti za sjednice Skupštine Kantona Sarajevo, da bi mogli adekvatno pratiti rad Vlade, Kantonalnih javnih komunalnih preduzeća, ministarstava itd itd. Riješite pitanje prekršajne i krivične odgovornosti, unosa podataka, transparentnosti i imat ćete podršku Kluba SDA do prijedloga. Pretpostavljam da ćete organizirati neku vrstu javne rasprave, dal sada unutar klubova ili će to biti neka javna rasprava koja što je, evo, i sastavni dio, sama ova sjednica. Ukoliko riješite takve stvari, dat ćemo vam podršku za ovakav zakon, ukoliko ne riješite ove primjedbe koje su danas iznešene, naravno, mi nećemo dati podršku ovaj takvom prijedlogu zakona. Hvala.

Elvedin Okerić (predsjedavajući)

Za riječ se javila zastupnica Mersiha Mehmedagić, pretpostavljam replika, kome.

Mersiha Mehmedagić (zastupnica)

Nije replika, rasprava.

Elvedin Okerić (predsjedavajući)

Ok, izvolite, imate riječ.

Mersiha Mehmedagić (zastupnica)

Zahvaljujem predsjedavajući. Pa želim samo naglasiti nekoliko bitnih činjenica vezano za ovaj zakon, što će možda, evo, pomoći i u boljem razumijevanju istog. Znači, njega zaista treba posmatrati kao jedan dodatni alat za disciplinu svakog obveznika ovog zakona. Zašto kažem dodatni? Zato što već po uzusima struke, po Zakonu o računovodstvu i reviziji Federacije Bosne i Hercegovine u članu 21. vi ste obavezni da prilikom popisa jednom znači godišnje, na kraju poslovne godine, a možete i uraditi to i bilo kada se ukaže za to potreba, znači dužni ste izvršiti konfirmaciju i potraživanja i obaveza. Vi ste u svakom trenutku u toku poslovne godine, u mogućnosti da jednim klikom izvučete i vaše obaveze i vaša potraživanja i dužnom pažnjom biste trebali, sa dužnom pažnjom biste trebali postupati i o jednim i sa jednim i sa drugim podacima zato što, posebno kad su potraživanja u pitanju, znači vi biste morali da vodite računa da vam ne izmaknu rokovi, odnosno da vam određena potraživanja ne zastare, znači trebate da određene aktivnosti poduzmete da bi prekinuli tu zastaru, odnosno naplatili svoje potraživanje na vrijeme. E, šta radi sada ovaj zakon? I naravno, i kaznenim odredbama ovog istog Zakona o računovodstvu i onaj revizije Federacije BiH stoji da ukoliko to ne uradite, znači ako ne izvršite konfirmaciju potraživanja i obaveza jednom godišnje, vi ste po tom osnovu dužni, odnosno imate platiti kaznu koja se kreće od 5 do 15 000 KM za pravno lice. Znači, ovaj Zakon je dodatni mehanizam onima koji se ogluše o ove propise u svom redovnom poslovanju da imaju jedan dodatni čeking, pa da imaju dodatni registar u koji će ovlaštena osoba unositi ove podatke, pa će, znači, neko dodatno pratiti da li je poduzeo sve aktivnosti da naplati u zakonskom roku svoje potraživanje, odnosno da na kraju onaj ne izgubi tu mogućnost da se naplati kroz sudski postupak. Zato me raduje da nakon Zakona o registru obaveza idemo i sa ovim zakonom kako bismo imali dodatno mehanizme da podstaknemo sve obveznike i jednog i drugog zakona, odnosno i jednog i drugog registra, da budu odgovorniji u postupanju i da prate bolje rokove koje zakon propisuje. Toliko. Hvala.

Elvedin Okerić (predsjedavajući)

Za riječ se javila zastupnica Admela Hodžić. Može, prvo replika zastupnik Muamer Bandić, pa onda diskusija zastupnica Hodžić.

Muamer Bandić (zastupnik)

Samo kratko. Kolegica Mehmedagić je u jednom samo momentu spomenula da ovaj zakon treba biti alat. Zakoni nikad nisu alati, oni moraju biti instrumenti za provođenje jednakopravnosti, za provođenje pravne sigurnosti, postizanje svrhe i cilja zakona, dakle, ovim zakonom ne može biti samo tretiran ono kako je, mislim, ništa pogrešno nije rekla, ali eto, jedan termin je upotrijebila da zakon treba da bude alat. Dakle, zakon treba biti instrument za uspostavljanje pravnog sistema i sistema sigurnosti, a ne nikako na način, dakle, da bude alat za discipliniranje onih koji u stvari na koje se odnosi ovaj zakon. Hvala.

Elvedin Okerić (predsjedavajući)

Zastupnik, je li replika ili diskusija kolega? Zastupnica Admela Hodžić diskusija, pa onda zastupnik Davor Čičić.

Admela Hodžić (zastupnica)

Evo, ja ću kratko, samo. Što se tiče Nacrta zakona, generalno, ovaj dokument se može podržati zbog mjera koje će unaprijediti kontrolu dugovanja javnih preduzeća i ostalih institucija. Ja se nadam da ćemo koristiti takve podatke i u narednom periodu, kada budemo dodjeljivali neku vrstu pomoć ili subvencija, pa za one koji su dužni za komunalne usluge preko 100 000 konvertibilnih maraka, ja se nadam da ćemo ove podatke koristiti da do izmirenja duga Kantonu Sarajevo ili komunalnom preduzeću, neće moći koristiti pravo na bilo kakvu podršku ili subvenciju ili neki vid pomoći od Kantona Sarajevo i što se tiče budžeta Kantona Sarajevo. Druga stvar što je dobro što ćemo konačno na jednom mjestu imati pregled obaveza po koncesijama. Za sada možemo imati samo pregled ugovora, pregled obaveza, financija, potraživanja. S te strane do sada nismo imali, ja se nadam da ćemo vrlo skoro, kad ovaj zakon zaživi, imati pregled svih ugovora o koncesijama, obaveza, iznosa i prema općinama i prema Kantonu. I još jedna stvar što je ovdje dobra, da na jednom mjestu imamo evidenciju i pregled u narednim zaduživanjima, uzimanja kredita za određena javna preduzeća jer imamo kredite koji su rezervisani, na njih se plaćaju kamate, a ti krediti se ne koriste i to stoji, a sa druge strane imamo zahtjeve za financiranje i podršku za određene programe. Ono što je meni sporno u ovom Nacrtu zakona, to je i kolega Selmanović rekao, lokalne samouprave nisu kontaktirane, jer se nisu izjasnile i imaju pravo. Ja se nadam da će se aktivno uključiti da kažu svoj stav i svoje mišljenje jer nije prvi put da određujemo nadležnosti i da diktiramo neka prava i obaveze lokalnim samoupravama, s čime se one nekad u većim slučajevima i ne slažu. Nisam bila zadovoljna time što u dokumentu piše da ne iziskuje financijska sredstva, jer jasno nam je, ako nekome kažete da mora imati rukovodioca i osobe referente za unos podataka i obuku i obuku koja će biti provedena i tehničku podršku Zavoda za informatiku, znamo svi ugovorom o radnom mjestu, šta je kome je propisano da radi i svaka vrsta dodatnog posla iziskuje i dodatne obaveze poslodavca, bilo to da je općina, Kanton, Zavod. S te strane mislim da ovaj podatak nije tačan. Sljedeće što je meni sporno je ovaj član 5. Uspostava registra. Stav (1) "Registar uspostavlja i vodi Ministarstvo financija Kantona Sarajevo, u daljnjem tekstu Ministarstvo", pa u stavu (4) kaže: "Na osnovu podataka sadržanih u registru, Ministarstvo", što znači Ministarstvo financija, "u cilju efikasnijeg upravljanja financijskim potraživanjima, naplatom financijskih potraživanja kreira i predlaže politike, ministarstvo strategije i mjere koje razmatra i usvaja Vlada Kantona Sarajevo". Znači mi kada usvojimo ovaj zakon, ostalo sve prepuštamo ministarstvu i ministarstvo dalje traži podršku od Vlade što se tiče kreiranja i predlaganja politika i strategija, mi više, kako ovdje piše, nemamo s ovim zakonom ništa. "Za jedinice lokalne samouprave i pravobranilaštva jedinica lokalne samouprave, javna preduzeća, javne ustanove čiji je osnivač jedinica lokalne samouprave, te pravna lica u kojem jedinice lokalne samouprave u Kantonu Sarajevo učestvuju sa više od 50 % ukupnog kapitala, razmatra i usvaja

Gradsko, odnosno Općinsko vijeće", znači njihovo Općinsko vijeće usvaja dalje politike, mjere i strategije, a mi ovdje ovaj posao prepuštamo Vladi. Samo u tom segmentu, mislim da bi trebalo ovo dopustiti da imamo i mi barem uvid na ono i da damo komentar, podršku ili saglasnost što se toga tiče. Član 6. stav (4) "Ministarstvo financija Kantona Sarajevo može dopunjavati uspostavljeni registar, odnosno utvrđivati nove podregistre pored podregistratora iz stava (1) ovog člana", znači, nadalje, može da kreira podregistre i da proširuje, dopunjava ministarstvo u odnosu na ono za što misli da je bez opet saglasnost skupštine. I opet, nadalje, član 7. propisuje rokove u kojima se moraju dostaviti podaci, ovaj ažurirati. Smatram da se o ovome moraju očitovati također i lokalne samouprave. Član 8. "Osiguranje uslova za vođenje registra i edukaciju". Dakle i rukovodioc obaveznih lokalnih samouprava da učestvuje u ovome i da zaduže osobu referenta u lokalnoj samoupravi koja će raditi na ovim poslovima i to iziskuje, rekla sam, već dodatna sredstva i obaveze. Također, dalje rokovi za verifikaciju, i to se tiče lokalnih samouprava. I dalje što registar finansijski potraživanja, nije javan. To smo već na komisijama dobili odgovor zašto je to tako. I član 14. "Održavanje softverske aplikacije Zaštita podataka u registru" stav (1) "Za održavanje softverske aplikacije i očuvanje povjerljivosti integriteta i osiguranje dostupnosti podataka u registru odgovoran je Zavod", što će također iziskivati određena finansijska sredstva. I evo ostalo, "Razlozi donošenja", pa samo u jednom dijelu razlozi donošenja jedinstvena evidencija takvih podataka je podloga i temelj za naredne korake koje će poduzimati Ministarstvo koji se ne tiče Skupštine i na koje nadalje Skupština nema ovaj utjecaja. Ja sam već o tome rekla. Ako lokalne samouprave i vijeća mogu biti informisana i donositi mjere strategije, politike za dalji korake, ja smatram da i Skupština treba da učestvuje nadalje u tome. Toliko, zahvaljujem.

Elvedin Okerić (predsjedavajući)

Zastupnik Davor Čičić se javio za riječ.

Davor Čičić (zastupnik)

Zahvaljujem predsjedavajući. Pa evo da se ne bi javio pojedinačno za replike zastupnicima, čisto kratko par stvari, jer sam stekao dojam da ovdje mi imalo generalno brkamo onaj pojam potraživanja i pojam duga i obaveza. Znači ovaj registar potraživanja, evo, nadovezat ću se i na kolegice koje su to rekle je nešto što bi trebalo na jednom mjestu da objedini sva potraživanja koje Kanton Sarajevo ima prema trećim licima, a ne dug koji Kanton ima prema nekome. Znači ovo je registar koji se tiče potraživanja, gdje bi mi npr. na jednom mjestu, što sad trenutno nije slučaj, evo imamo sudske takse gdje mi nemamo na jednom mjestu uopće objedinjeno koliko ima Kanton potraživanja po pitanju sudskih taksi? Koliko Kanton ima potraživanja po pitanju koncesija? Mi nemamo na jednom mjestu jer svako provodi svoje postupke i ovim bi to na jednom mjestu objedinili, zaista znali, i na kraju krajeva, koliko potraživanja imaju sva javna komunalna preduzeća, gdje bi onaj na neki način i ministarstva mogli davati svoje sugestije, uzimati u obzir politike i tražiti naplatu javnih, odnosno prihoda potraživanja Kantona, kako bi i prihodi Kantona oni koji mu pripadaju, naravno, ne oni koji bili adekvatno naplaćeni kako bi se time i održavala likvidnost generalno Kantona Sarajevo. Tako da čisto da razgraničimo potraživanja su jedan, registar obaveza smo usvojili, odnosno Zakon o registru obaveza smo usvojili već, čini mi se prošle godine da je to bilo na dnevnom redu. Ovo nadopunjuje taj registar obaveza nadopunjuje ovaj registar potraživanja. Ja ću se složiti i sa dosta rasprava kolega, a posebno, evo smatram ja mislim da je kolegica Marijela to istakla da bi se trebalo jasnije definisati ko ima tu pristup informacijama, odnosno jasno i striktno definisati ko ima pristupa ovim informacijama jer se dio ovih informacija može smatrati, da tako kažem, povjerljivim i gdje bi se neko mogao pozvati na Zakon o zaštiti ličnih podataka, tako da se apsolutno slažem da treba jasno razgraničiti ko ima ovaj pristup, na koji način ima pristup i šta

može, na koji način mogu se dobiti podaci zbog registra kada se u jednom trenutku on napravi. Bilo je dosta rasprave i po pitanju da li lokalne samouprave se mogu slagati s ovim zakonom, ja samo hoću da kažem da ni ovaj zakon ne ulazi ni u jednu nadležnost lokalnih samouprava, znači ne uzima im nijednu nadležnost. Ovdje se samo želi da se podaci objedine u jednom registru gdje će imati pristup i Kanton Sarajevo kroz Vladu i Ministarstvo financija, a i lokalne samouprave, znači načelnici bi mogla na jednom mjestu imati pregled svih potraživanja koja lokalna samouprava ima prema nekome što bi na neki način moglo olakšati njihov rad, pa ja mislim da tu s te strane treba gledati ovaj zakon, ne na način da bilo ko kome uzima bilo kakvu jurisdikciju i bilo kakvu nadležnost nego da se na jednom mjestu objedine svi podaci koje znači rukovoditelji i nosioci javnih funkcija mogu koristiti u svom svakodnevnom radu u cilju poboljšanja generalno naplate svih potraživanja koje imaju, kako Kanton, tako jedinice lokalne samouprave. Hvala.

Elvedin Okerić (predsjedavajući)

Zahvaljujem se zastupnik Čičiću. Zaključujem raspravu.

U skladu sa članom 94. Poslovnika Skupštine Kantona Sarajevo predlažem da se u ovoj tački izjasnimo odmah.

Molim zastupnik da se izjasne da li su saglasni da se izjašnjavanje po ovoj tački provede odmah? Zaključujem glasanje.

Za glasalo 22 zastupnika, protiv i suzdržanih nije bilo. Konstatujem da je Skupština prihvatila da se izjašnjenje po ovoj tački provede odmah.

Predlažem da Skupština po Nacrtu Zakonu o registru finansijskih potraživanja u Kantonu Sarajevo donese sljedeći zaključak:

1. Utvrđuje se Nacrt zakona o Registru finansijskih potraživanja u Kantonu Sarajevo.
2. Nacrt zakona iz tačke 1. ovog zaključka stavlja se u javnu raspravu.
3. Učesnici u javnoj raspravi su kantonalni organi uprave i jedinicama lokalne samouprave, kantonalne ustanove i javna preduzeća, Općinski sud u Sarajevu, Kantonalni sud u Sarajevu, naučne i stručne ustanove, a trajat će 30 dana.
4. Primjedbe, prijedlozi, sugestije i mišljenja učesnici javne rasprave dostavljaju Vladi Kantona Sarajevo, koja organizuje i provodi javnu raspravu.
5. Vlada Kantona Sarajevo dužna je nakon provedene javne rasprave Skupštini Kantona Sarajevo dostaviti Prijedlog zakona o Registru finansijskih potraživanja u Kantonu Sarajevo, vodeći računa o primjedbama, prijedlozima, sugestijama i mišljenjima kroz izvještaj o javno raspravi.
6. Ovaj zaključak stupa na snagu danom donošenja.

Molim zastupnike da pristup izjašnjavanju o predloženom Zaključku. Zaključujem glasanje.

Za je glasalo 26 zastupnika, protiv i suzdržanih nije bilo. Konstatujem da je Skupština donijela ovaj Zaključak.

Prelazimo na tačku tri.

AD- 3.

PRIJEDLOG ODLUKE O DAVANJU SAGLASNOSTI NA PRIPAJANJE JAVNE USTANOVE „FOND MEMORIJALA KANTONA SARAJEVO“ JAVNOJ USTANOVI „MEMORIJALNI CENTAR SARAJEVO“

Materijal sam dobili uz poziv za sjednicu, zamolio bih predstavnika predlagača da podnese uvodne napomene.

Ja se izvinjavam, zamolio bih službu da uključi ministra Osmanovića, je li ubačena kartica. Uključite ministra Osmanovića. Sekretar ministarstva će podnijeti uvodne napomene. Zamolio bih vas da se predstavite zbog Stenograma.

Belma Adilović (sekretar Ministarstva za boračka pitanja KS)

Ok, hvala. Ja sam. Belma Adilović, sekretar Ministarstva za boračka pitanja Kantona Sarajevo i dat ću kratak uvod u ovu tačku dnevnog reda. Kako bi se omogućilo efikasnije upravljanje bogatom baštinom, te uskladilo djelovanje sa novim zahtjevima i potrebama Skupština Kantona Sarajevo osnovala je Odlukom o osnivanju Javnu ustanovu "Memorijalni centar Sarajevo". Navedena Javna ustanova, kao pravni sljednik Javne ustanove "Fond Memorijala Kantona Sarajevo", preuzela je sve dosadašnje obaveze, prava, imovinu i odgovornosti, čime su stvoreni zakonski okviri za nesmetano poslovanje i unapređenje kulturno historijske misije Javne ustanove "Memorijalni centar Sarajevo", a sve radi stvaranja boljeg, fleksibilnijeg i usklađenijeg pravnog entiteta za upravljanje kulturnim dobrima. Tokom postupka upisa u sudski registar Odluke o osnivanju Javne ustanove "Memorijalni centar Sarajevo", postupajući sud je prvenstveno valorizirao formalnu činjenicu ostvarivanja osnivanja nove javne ustanove, međutim nije adekvatno primijenio odredbe član 26. i 27. predmetne odluke, koji uređuje pravne aspekte statusne promjene i pravnu povezanost između pravnog sljednika i njegovog prednika, te postupak brisanja pravnog prednika, odnosno Javnu ustanovu "Fond memorijala Kantona Sarajevo" iz sudskog registra. Navedenim postupanjem je izostavljena pravilna primjena relevantnih pravnih normi, što je dovelo do procesnog previda uslijed kojeg Javna ustanova "Fond Memorijala Kantona Sarajevo" nije formalno prestala postojati jer njeno brisanje iz sudskog registra nije izvršeno, što je izazvalo pravnu nesigurnost u vezi sa statusom obje javne ustanove. Pokretanjem odgovarajućih pravnih postupaka, uključujući ponovljeni postupak pokrenut pred nadležnim sudom s ciljem razrješenja pravnog statusa i brisanja Javne ustanove "Fond Memorijala Kantona Sarajevo", postupajući sud je predmetnu situaciju pravno kvalifikovao kao statusnu promjenu pripajanja. Iz tog razloga donijet je i zaključak suda, imajući u vidu Zakon o registraciji poslovnih subjekata u Federaciji Bosne i Hercegovine, pri čemu je, pardon, samo da nađem, pri čemu je naloženo predlagatelju Javnoj ustanovi "Fond Memorijala Kantona Sarajevo" da u roku od 8 dana od dana prijema zaključka dopuni prijavu za upis u sudski registar i dostavi sudu potrebne isprave i to, između ostalog, popuni prijavu za registraciju kojim se traži pripajanje pravnog lica Javne ustanove "Fond Memorijala Kantona Sarajevo" Javnoj ustanovi "Memorijalni centar Sarajevo", a što prethodi, naravno, brisanju Javne ustanove "Fond Memorijala Kantona Sarajevo". Iz svih navedenih razloga predložili smo Vladi donošenje ovakve odluke i stoga je i Vlada prosljedila Skupštini Kantona Sarajevo da se ovakva odluka donese. Hvala vam.

Jelena Pekić (dopredsjedavajuća)

Zahvaljujem. Otvaramo diskusiju. Zastupnik Mahir Dević, izvolite imate riječ.

Mahir Dević (zastupnik)

Hvala lijepo. Naravno, mi smo kao Klub često puta ovdje vama malo izgledali i čudni kada smo upozoravali na zakonitosti, na vođenje računa i postavljali pitanje šta radi taj Ured za zakonodavstvo pri Vladi Kantona Sarajevo? Šta rade ta ministarstva i danas ponovo nalazimo u jednoj takvoj situaciji. Znači jesmo li mi donijeli Odluku o osnivanju ustanove Memorijalni centar Sarajevo? Jesmo je donijeli? Jeste li je vi predložili ovdje da donesemo? Jesmo li to uradili? Jesmo, jel tako? Znači ova pitanja postavljam svima vama zastupnicima zato što podizanje ruke u Skupštini ne podrazumijeva nikakvu lojalnost logici ili bilo čemu drugom, već podrazumijeva da se ponašate odgovorno i da i ovu tačku danas ponovno skinete s dnevnog

reda jer ovo ne može ići ovako na dnevni red. To vam je kazano i na Zakonodavno-pravnoj komisiji. Iz obrazloženja predlagača, ako sam vas razumio, sada je još sud kriv što smo mi ušli u ovakvu situaciju. Gledajte u kakvu vi situaciju nas dovodite ovdje kao zastupnike u Skupštini? Znači, ova tačka ne može ovakva ići na dnevni red, treba je povući sa dnevnog reda, riješiti neke druge pravne predradnje, o ovome se ne može glasati. Mislim, vi možete sve i prošli put ste to uradili, možete vas 18 mahati rukama i praviti pravni kaos, pravnu nesigurnost u Kantonu Sarajevo. Radi se o sljedećem. Prijedlogom sada nove navedene odluke koju ste nam predložili daje se saglasnost na pripajanje javnih ustanova tako što se Javna ustanova, pazite sada, "Fond memorijala Kantona Sarajevo" pripaja Javnoj ustanovi "Memorijalni centar Sarajevo", upisano u registar privrednih društava Općinskog suda u Sarajevu. Postavlja se pitanje kako je moguće da se predlaže pripajanje nečega što formalno pravno više i ne postoji, a što je i predlagač pravilno naveo u obrazloženju Prijedloga ove odluke, jer je članom 27. Odluke o osnivanju javne ustanove i Memorijalni centar Sarajevo, precizirano je da je stupanjem na snagu Odluke o osnivanju Javne ustanove Memorijalni centar Sarajevo stavlja se van snage Odluka o osnivanju ustanove Fond memorijala Kantona Sarajevo. Znači, mi smo ovdje napravili pravnu radnju prošli put da smo prilikom Odluke o osnivanju ustanove Memorijalni centar Sarajevo stavili van snage Odluku o osnivanju ustanove Fond memorijala Kantona Sarajevo, a vi nama danas predlažete pripajanje tih ustanova. I još treba sada da nas ovdje ubjeđujete, da je to ispravno. Znači, to je objavljeno u Službenim novinama Kantona Sarajevo broj 28/18, 11/19, na način da je Javna ustanova "Fond Memorijala Kantona Sarajevo" formalno prestaje postojati kao pravni subjekt, a sve njene poslove i obaveze preuzima Javna ustanova Memorijalni centar Sarajevo. I to je rekla i kolegica sada u obrazloženju. Pa čekajte, ako smo nešto ugasili, ako je neka druga ustanova preuzela sva prava i obaveze, šta mi danas pripajamo to ljudi? Šta radite vi ovdje u ovoj Skupštini Kantona Sarajevo? Također članom 26. Predmetne odluke je propisano da je Javna ustanova "Memorijalni centar Sarajevo" pravni slijednik Javne ustanove "Fond memorijala Kantona Sarajevo". Znači ono što se je nekad zvalo "Fond Memorijala Kantona Sarajevo", što ste vi preimenovali u "Memorijalni centar" pa ste izbrisali i one nišane da vas podsjetim tamo šta ste uradili radi građana, to je ono što ste vi donijeli, što je sada na snazi. Tako ste to uradili. Naravno navedeno obuhvata preuzimanje radnika, arhive, dokumentacije, poslova, sredstava za rad, čime se osigurava pravni kontinuitet i nastavak, nesmetano funkcionisanje Javne ustanove u skladu sa zakonskim okvirom. Sve navedeno ukazuje da ne postoji, gospodo zastupnici i predlagači, pravni osnov za donošenje Prijedloga odluke, da je nedopustivo da Skupština Kantona Sarajevo, koja je osnivač i koja je svojom Odlukom o osnivanju Javne ustanove "Memorijalni centar Sarajevo" stavila van snage odluku o osnivanju Javne ustanove "Fond memorijala Kantona Sarajevo", Službene novine Kantona Sarajevo, broj 28/18, 11/19, na način da Javna ustanova "Fond memorijala Kantona Sarajevo" formalno prestaje postojati kao pravni subjekt, a sve njene poslove i obaveze preuzima Javna ustanova Memorijalni centar Sarajevo. Kako je onda moguće da Skupština sada usvaja Prijedlog odluke o davanju saglasnosti na spajanje ovih ustanova, odnosno s ustanovom koju je Skupština prethodno ugasila? Znači, povucite u tačku dnevnog reda. Konsultujte se sa ozbiljnim ljudima ili onda stavite onu odluku, prethodnu van snage koju smo mi usvojili o osnivanju te ustanove, pa proširujte djelatnost, mijenjajte imena idite nekim drugim pravnim putem kojim ste već trebali davno otići, jel, ali ovo danas glasati za ovo je vrlo neozbiljno. Znači, prijedlog Kluba SDA je da se ovakva nezakonita odluka povuče sa dnevnog reda da se za nju uopće ne glasa inače, pravimo od Skupštine Kantona Sarajevo jednu neozbiljnu igraonicu. Gdje su ti pravници? Ja nisam pravnik po struci, ali ovo je jasno. Ako ste nešto ugasili kako ćete ga danas pripajati na samoj sjednici? Također je nedopustivo da Vlada Kantona Sarajevo, a imajući u vidu sve navedeno, na sjednici održanoj 06.02. 2025. godini, utvrđuje ovakav Prijedlog odluke i šalje ga prema Skupštini Kantona Sarajevo, ako je prethodno ista ta Vlada predložila Odluku o

osnivanju potpuno nove ustanove u kojoj je propisala gašenje prethodne i sva prava i obaveze da preuzima ova nova ustanova. Znači, ljudi, uozbiljite se, povucite ovu tačku dnevnog reda, nemojte nas ubjeđivat da je sud pogriješio, očigledno ste vi i pogriješili i nemojte nam praviti dvostruku grešku. Znači, vi nas sada ovdje uvodite Skupštinu Kantona Sarajevo u dvostruku grešku koju mi, naravno, kao Klub nećemo podržati, kao što nismo podržali ni onu prethodnu. Podsjetit ću vas šta smo tada diskutovali, evo ovo smo diskutovali što danas imate. I, naravno, dotakli smo se i onih izmjena u kojim ste pobrisali nišane, pa ste onda nakon pritiska javnosti u Kantonu Sarajevu, koji je izazvao kaos, ustvari to vratili, pa ste dezavuirali javnost da to niste uradili, a u zvaničnoj vašoj korespondenciji, odnosno vašeg direktora Kulanića, tada i drugih, je jasno postojalo da ste tu proceduru u radu. Znači, ovo je nedopustivo. Povucite tačku s dnevnog reda, ukoliko to ne uradite, naravno, mi ćemo glasat protiv, jer ovakva odluka je ustvari nezakonita. Hvala.

Jelena Pekić (dopredsjedavajuća)

Idemo dalje. Uvažena zastupnica Vedrana Vujović, izvolite.

Vedrana Vujović (zastupnica)

Zahvaljujem predsjedavajuća. Pa evo, kolega Dević je, mislim, dobro pretresao i jednu i drugu odluku, odnosno ova koja je danas nama na prijedlog na dnevnom redu i onu koju smo usvojili prilikom osnivanja Javne ustanove "Memorijalni centar". Slažem se sa njegovom diskusijom, naročito u stavu da ovu Odluku o davanju saglasnosti na pripajanje javnih ustanova Fonda memorijala i Javne ustanove Memorijalni centar Sarajevo ne možemo usvojiti bez izmjene Odluke o osnivanju Javne osnove Memorijalni centar. Ja isto nisam pravnik, ali i vi ste ovdje u preambuli predložene Odluke o pripajanju pozvali se na članove 26 i 27. Odluke o osnivanju Javne ustanove Memorijalni centar, da ne bih ponovno čitala, kolege Dević je detaljno to pročitao, gdje jasno piše da je pravni nasljednik fonda nova Javna ustanova koju smo formirali, to je Memorijalni centar. Također, podsjetit ću vas da je izvještaj o radu Fonda Memorijala, odnosno Memorijalnog centra za 2023. godinu upravo je dostavljen nama kao takav i Skupština ga je razmatrala na jednoj od prethodnih sjednica, čini mi se na 19. Radnoj, gdje tamo i stoji, da je došlo do promjene naziva. Tako od, evo, meni zaista nije jasno kako ćete uopće donijeti, mislim, donijet ćete vi odluku, imate 18 ruku, to nije stvar uopšte, nego kako će se i Odluka o pripajanju Javne osnove Fond memorijala Javnoj ustanovi Memorijalni centar realizovati bez izmjene osnivačkog akta Memorijalnog centra koji tačno piše, koji tačno precizirao da je, evo članom 27 da "Stupanjem na snagu ove odluke", ona je već stupila na snagu, "prestaje da važi Odluka o osnivanju Javne ustanove Fond memorijala Kantona Sarajevo". Evo ja bih voljela pojašnjenje iz Ministarstva ili ne znam, evo od kolega pravnika, čisto onako detaljno, ali u svakom slučaju ova Odluka o pripajanju ne može da bude bez odluke, bez izmjene osnivačkog akta, odnosno Odluke o osnivanju Javne ustanove Memorijalni centar. Toliko, hvala lijepo.

Jelena Pekić (dopredsjedavajuća)

Uvaženi, molim, replika izvinite nisam vas vidjela. Izvolite zastupnik Dević, replika.

Mahir Dević (zastupnik)

Hvala. Naravno, kolegica Vujović je dobro kazala, ne možemo pripajati nešto što ne postoji. Ono što vam pravno ostaje kao opcija da biste došli do rješenja jeste da intervenišete na Odluku o osnivanju ili da napravite dodatni cirkus na primjer pa da nam dostavite ovdje Izvještaj o radu Fonda Memorijala Kantona Sarajevo za 2023.godinu, nakon što smo usvojili Izvještaj o radu Memorijalnog centra. Ljudi, uozbiljiti se. Znači, ovo naprosto ne može ovako. Ne znam ko je ovo radio, pripremao, ali ovo su stvari, ne možemo pripajati nešto što smo u prethodno

ugasili svojom odlukom o izmjeni odluke, odnosno u konkretnom slučaju donošenje nove odluke osniva u kojoj smo propisali da ova prestaje da važi, da prenosimo sva prava i obaveza, sada to treba nešto da pripajamo, ne može to tako.

Jelena Pekić (dopredsjedavajuća)

Odgovor na repliku zastupnica Vujović.

Vedrana Vujović (zastupnica)

Zahvaljujem. Upravo to i jeste suština i mislim da je vrlo važna institucija ustanova za Kanton Sarajevo, bez obzira, evo Fond Memorijala, da li će ovo biti kasnije Memorijalni centar, mislim da se mora vrlo ozbiljno pristupiti i da se ni u jednom momentu bilo ne smije dovesti u bilo kakav vid pravne ili institucionalne nesigurnosti i uposlenika i svih projekata značajnih za kulturu sjećanja i sve ovo što radi, što je radio Fond Memorijala, očigledno sad radi Memorijalni centar, više ne znamo ni kako da ga zovemo. Stoga zaista, evo, ja apelujem da na Skupštinu i na Vladu da, ukoliko je moguće, zaista povući ovu tačku i da što prije na nekoj narednoj redovnoj sjednici uputi u proceduru izmjenu, dakle osnivačkog akta Memorijalnog centra i eventualno novu odluku o pripajanju ili kako god da, zaista ni u jednom momentu ne bude upitna pravna sigurnost rada ove javne ustanove. Evo to toliko hvala.

Jelena Pekić (dopredsjedavajuća)

Uvaženi zastupnik Selmanović, izvolite. Diskusija.

Faruk Selmanović (zastupnik)

Zahvaljujem predsjedavajuća. Evo prije same diskusije jedna mala digresija. U kvantnoj mehanici postoji pojam super pozicije, čuveni Šredingerov paradoks u kojoj je mačka istovremeno i živa i mrtva. E sad, zahvaljujući vlasti u Kantonu Sarajevo, danas imamo vlastitu varijaciju tog eksperimenta, pa je možemo nazvati Šredingerova ustanova. Naime, Vlada Kantona Sarajevo predlažete pripajanje jedne ustanove drugoj, pri čemu je sada, pazite ovo, druga ustanova pravno ne postoji. Dakle predlažete da se ustanova koja formalno ne postoji pripoji drugoj ustanovi. Imamo instituciju koja postoji i ne postoji u isto vrijeme po ovome što ste vi ovdje predložili. Ovo nije birokratska nelogičnost, ovo je kvantni skok u apsurd. Do sada nije ovo zabilježen ni u fizici ni u pravu. Ali eto imamo '25.-tu godinu, 90 godina nakon originalnog eksperimenta, gdje je vlast uspjela ono što nikome nije pošlo za rukom da kvantnu mehaniku pretoči u upravno pravo. E sad, ne bi me iznenadilo da sljedeće godine upravo ova Vlada predloži budžet koji istovremeno i usvojen i nije usvojen zavisi iz kojeg ugla grada to gledate. Danas imamo odluku pred nama ovdje u kojoj treba da donesemo odluku gdje se daje saglasnost na pripajanju Javne ustanove Fond memorijala Kantona Sarajevo Javnoj ustanovi Memorijalni centar Sarajevo, koji na najbolji način pokazuje, pokazuje meritokratiju na djelu. Naizgled, ovo su radi o formalnosti, međutim, pravna pozadina otkriva zabrinjavajući stepen nekompetencije i institucionalne neodgovornosti. Šta piše u odluci? Stupanjem na snagu Odluke o osnivanju Javne ustanove Memorijalni centar Sarajevo stavlja se van snage Odluka o osnivanju javne ustanove Fond Memorijala Kantona Sarajevo na način da Javna ustanova Fond memorijala Kantona Sarajevo formalno prestaje postojati kao pravni subjekat, a sve njegove poslove i obaveze preuzima nova ustanova. Ova je odluka objavljeno u Službenim novinama Kantona Sarajevo broj 45/23, i stupila je na snagu 3. novembra 2023. godine. Od tog trenutka Fond memorijala pravno prestaje da postoji, a Memorijalni centar Sarajevo preuzima sve njegove obaveze, radnike i imovinu. Postavlja se pitanje kako je moguće da Skupština danas odlučuje o pripajanju ustanove koja više ne postoji? Kako da odlučujemo o saglasnosti za proces koji je već formalno, pravno i institucionalno okončan i evidentiran u sudskom

registru? U skladu sa članom 26. Odluke nova ustanova je pravni slijednik stare, a članom 27 je izričito navedeno da Fond Memorijala prestaje postojati. Po Poslovniku Skupštine, član 119. Odluka se donese radi izvršavanja ili konkretizacije zakona, a ovdje niti imamo zakonitosti niti konkretizaciju, već kontradiktornost. Vrhunac apsurdna ogleda se i u činjenici da Pravobranilaštvo Kantona Sarajevo se izuzelo iz cijelog procesa, uz obrazloženje da se radi o pojedinačnom aktu, iako se s njim odlučuje o statusu i brisanju javne ustanove. Pitam vas zar osnivanje, gašenje i pripajanje javne ustanove nije imovinsko pravno pitanje? I zar to nije baš oblast za koju je Pravobranilaštvo nadležno? Da stvar bude gora, Opštinski sud u Sarajevu je u julu 2024. godine odbacio prijavu za brisanje Fonda iz registra jer dokumentacija nije bila u skladu sa propisima. Dakle, čak ni sud nije mogao procesuirati ono što Vlada pokušava retroaktivno, mimo svakog pravnog reda da uradi. Ova odluka je ogledni primjer kako izgleda meritokratija na djelu koja je ova vlast obećala građanima, umjesto znanje i stručnosti imamo amaterizam i improvizaciju. E sad, pošto ste nam ovim Poslovníkom ukinuli pitanja na početku same tačke, evo da pitam ovako javno. Ko u ime Fonda Memorijala, koji više ne postoji, može donijeti Odluku o pripajanju? Kako će biti dostavljene identične odluke o pripajanju od obje institucija, što traži i sud ako jedna nema organa upravljanja ni zakonski subjektivitet? Da li će Upravni odbor Javne ustanove Memorijalni centar Sarajevo sad donositi odluke u ime obje ustanove, postojeće i nepostojeće? Jako, još važno pitanje, zašto se ovaj proces pokreće uopšte 2024. godine, ako je sve bilo formalno riješeno '23. godine? Ako je bilo potrebno odlučivati o pripajanju zašto nije učinjeno kada je osnovan Memorijalni centar Sarajeva? Ovdje više ne govorimo o formalnim greškama, ovdje govorimo o potpunom institucionalnom rasulu koji je ozbiljno kompromituje i sjećanje i dostojanstvo na žrtve koje ovaj Fond treba da štiti. Ovo nije samo jedini problem koji institucija ova ustanova ima. Pa da se prisjetimo: pokušaj izmjene historijskog grba s ljljanima, simbola državnosti i otpora, javne izjave direktora koji negiraju pravne činjenice o genocidu, čak suprotno, ono što piše u presudama Međunarodnog suda da je genocid izvršen nad Bošnjacima, on kaže da je izvršen nad bosanskohercegovačkim narodom. Prijave za mobing, šikaniranje, kažnjavanje neistomišljenika i sve se to dešava, a ova Vlada to zna. Poštovane kolegice i kolege, ovdje više nije riječ o jednoj ustanovi, ovdje vidimo već jedan obrazac ponašanja ove Vlade jer slanje ovako neutemeljenog prijedloga, Vlada ignoriše zakonske procedure i samim tim gubi i povjerenje. Zato danas predlažemo da se ova Odluka hitno povuče iz procedure jer ne postoji pravni osnov za njeno donošenje, da se zatraži pismeni izvještaj Pravobranilaštva o razlozima izuzeća, da znamo zašto su se oni izuzeli iz ovako bitne odluke, da Skupština zatraži detaljan izvještaj o radu i financiranje Javne ustanove Memorijalni centar Sarajevo, da se konačno preuzme i politička i institucionalna odgovornost za stanje u ovoj instituciji i da se razriješi dužnosti direktor i Upravni odbor ove ustanove, jer je to najmanje što dugujemo prema onima koji su živote dali za državu Bosnu i Hercegovinu. Zbog ovakvog postupanja moramo iskazati ozbiljnu zabrinutost za očuvanje tekovina odbrambeno- oslobodilačkog rata, jer ako oni koji rukovode i upravljaju Memorijalnim centrom lutaju u pravnim procedurama, postavlja se ozbiljno pitanje kako će očuvati ono što im je povjereno u amanet, a to je spomen na najsvetije stranice naše pravedne borbe. Ova ustanova ne pripada nijednoj Vladi, ona pripada svim onima koji su za Bosnu i Hercegovinu dali svoje živote i zato je naša odgovornost kao zakonodavne vlasti da ne dozvolimo pravni haos, institucionalni nered i političke improvizacije kada su u pitanju svetinje. Narod koji ne pamti svoju historiju, osuđen je da je ponovo preživi. Ako ovo danas prešutimo, sutra ćemo i ne samo biti suodgovorni, nego i svjedoci da se briše historija, ako se gube vrijednosti i ako se i kako se gasi dostojanstvo, ako to sebi kao ljudi i kao zastupnici ne smijemo dozvoliti.

Jelena Pekić (dopredsjedavajuća)

Uvaženi zastupnik Kapidžić izvolite.

Faruk Kapidžić (zastupnik)

Jel može bez tog' uvaženi, to stvarno, mislim uvaženi, više uvaženi, svi smo uvaženi, a vidite šta radimo. Mene ovaj interesuje jedna druga stvar. Član 1, dakle, ovo sad na Skupštini nam dajete, član 1. Ovom odlukom daje se saglasnost na pripajanje javnih ustanova tako što se Javna ustanova Fond memorijala Kantona Sarajevo, sa sjedištem na adresi Stari Grad Sarajevo, ulica Širokac broj 22, Kovači, upisana u Registar privrednih društava Općinskog suda u Sarajevu, pod brojem taj i taj, MB, taj i taj, pripaja Javnoj ustanovi Memorijalni centar itd. Sve isto sjedište, isto, Stari Grad Sarajevo, Ulica Širokac broj 22. Kovači upisan u Registar privrednih društava Općinskog suda u Sarajevu pod MBS drugi broj i jedinstven MB drugi broj. Šta ovdje fali? Ovdje fali prvo, ko ga predstavlja, ko ga predstavlja i fali upisan u sudski registar tad i tad. E sad kad pročitate ovo, e sad vi ovdje vidite milion problema, naravno, kad vam se nakači sad neko sa krivičnim prijavama i svim ostalim, onda se pita šta je sa tim ljudima, direktorima i ne znam koje sve iza ovoga stoji. Obzirom da ovo je sad dokaz da dvije institucije postoje, ovo su registri i postoje. Ono što je moje pitanje ko je direktor jedne institucije, a ko druge? Po onome što vidim, kako ste uradili, direktor je isti čovjek, zaposlenici su isti ljudi, vlasništvo nekretnina koje imaju su identične. E, sada ovo traje godinu dana, godinu dana, neko potpisuje i isplaćuje plate, jel isplaćuje dvije plate, je li moguće da je čovjek istovremeno zaposlen na dva mjesta, jel plaća doprinose duple i za jedne i za druge ili neko upravlja sa jednom institucijom tako što ne plaća ništa od toga nikome. Pazite ovo što ste vi napravili iz nama sada nepoznatih razloga, je krivično djelo, ovo podnosi sankcije, ovo je nemoguće, da je ovo trajalo godinu dana. Procjep gdje je neko zaposlen u dvije institucije. Kako je to moguće? S druge strane, razlog, razlozi koji navodite uopšte za formiranje novog pravnog subjekta, pa kasnije spajanje s ovim subjektom ne postoji, vi razloga nemate zato što novi subjekt preuzima sve, apsolutno sve, samo dobiva drugo ime, nije više Fond Memorijala, nego je Memorijalni centar. Pri tome obrazlažete zbog boljeg, efikasnijeg poslovanja itd. I ja kada sam na Komisiji za boračka pitanja onda problematizirao i postavio pitanje zašto, kaže da se promijeni naziv. Pa naziv se mijenja jednom odlukom koju stavite ovdje na kojoj piše tačka 1. Mijenja se naziv Fond Memorijala Kantona Sarajevo u Memorijalni centar Sarajevo. Pod tačkom 2. Sve ostaje nepromijenjeno i mi to usvojimo. Obrazloženje za to je ovo što ste napisali ovdje. E sad, zašto ste vi krenuli u ovo? To je nešto što ćemo vrlo vjerojatno saznati mnogo kasnije, iz nekih stvari gdje vam je trebalo da se formira nova institucija stara ukine. Smijete li reći zašto ste to uradili? Zna li iko? Jeste li vi skupštinski zastupnici pitali vaše tamo u izvršnoj vlasti zašto? Zna li vi razlog? Šta se to priprema samo izmjenom naziva nova institucija? I pritome, naravno, pa neće sud to tako nikad ni prihvatit, ako ste vi diletanti, pa nisu ljudi u sudu diletanti. Sve i da ste krenuli ovako, ovako nije moglo, ja sam to rekao na Komisiji za boračka pitanja. Rekao sam ministru zašto to radite? Neki razlog ima, neki razlog koji ne treba da se zna, da li je to mjesto direktora, da li je to problem da se direktoru omogući nove 4 godine ili ne znam ni ja kako ide. To se sada može ustanoviti, a i vrlo brzo će se ustanoviti. Samo što sada ne možete ni naprijed ni nazad. Mislim, možete, povucite ovo pa onda izbrišite ono, a formirajte ovo, ali je problem što ste već napravili propust. Evo, nek mi pravници kažu, nek mi sudije kažu, recite mi vi zastupnici, ako se ne razumijete, onda ne ulazite u to dok vam neki ekspertni tim ne kaže. Zašto oni da vas ubacuju tu i kriju se iza vas jer vi imate imunitet pa ćete im odraditi to, zbog toga da vas šef stavi na listu na idućim izborima. Jel to princip skupštinskog zastupnika? Ako je to princip kod zastupnika SDA taj ćemo princip presjeći, to se tako ne radi, ne radi se ovdje zbog lista. Ako ja nešto kažem pogrešno, potpuno i ako tražim neki kriminal, ja hoću da moji zastupnici u Skupštini to odbiju, da me ne poslušaju. Zašto vi to slušate? Zbog listi, zbog nove 4 godine mandata? Pa jeste li vi ovdje zbog mandata ili zbog građana? Jeste li vi ovdje zbog plate ili zbog toga da Fond memorijala radi i prenosi kulturu sjećanja? Pa vam je onda taj isti direktor pokušao provući da skine nišan, dokle ste došli. U onom znaku je i nišan i bašluk. Jeste dotle došli zbog 4 godine mandata? Ili ćete fino reći nećemo ovo usvojiti, ovo nije u redu jer

ste svjesni da nije u redu. Vi ste debelo svjesni, ne treba vam velika, velika pamet za ovo pravno stanje, samo nek mi odgovore ko je jedan i ko je drugi direktor i kako je mogao biti godinu dana ili koliko već isti čovjek, direktor dva pravna subjekta? Halo, pa to je nemoguće. To se u privatnom sektoru ide u zatvor odmah, Porezna uprava i inspekcija sve. Da sad ima dvije čovjek dvije privatne firme i da je na obadvije direktor. Jeste li vi svjesni da privatni ljudi ne mogu to ni pomisliti, a vi ovdje to možete? Zašto? Zato što vi donosite vlast i zakone, ti zakoni trebaju, prvo vas da spriječe u lopovluku, u kriminalu, u ovim zaobilaženjem procedura, pa onda tek ljude u privatnom sektoru. Vi privatnom sektoru ovdje sad pokazujete kako možete jednog čovjeka u dvije institucije. Pa osnujte još 10, pa nek prima 10 plata. Šta ja znam sada jel on primao dvije plate? Jel ko zna. Zaposleni, jesu li zaposleni u dvije firme? Jesu li sad svi zaposleni u problemu?

Jelena Pekić (dopredsjedavajuća)

Vrijeme Kolega.

Faruk Kapidžić (zastupnik)

Hvala.

Jelena Pekić (dopredsjedavajuća)

Zastupnica Vujović replika, izvolite.

Vedrana Vujović (zastupnica)

Hvala predsjedavajuća. Pa evo replika kolegi Kapidžiću. S obzirom da se zaista slažem sa njegovom diskusijom, glavno pitanje se ovdje postavlja u kojem su statusu radnici Memorijalnog centra, ali Fonda memorijala. Dakle, za koju javnu ustanovu su oni zaposleni u budžetu, prijedlogu budžeta, odnosno u budžetu koji je usvojen za 2025 godinu. Postoji samo javna ustanova Memorijalni centar Sarajeva. Mene zanima i meni je žao što mi poslovnički više nemamo tu mogućnost da postavljamo pitanja, ali evo, ako predsjedavajuća bude raspoložena, može dati riječ sekretarki ministarstva da nam pojasni neke stvari jer zaista mnogo je neodgovorenih pitanja, a ključno je ključno je zaista u kojem su statusu i za koju javnu ustanovu rade ovi radnici koje prema prijedlogu, odnosno prema usvojenom budžetu, njih ima 85? U kojem su statusu, koje je direktor jedne, a koje je direktor druge javne ustanove, jer koja očigledno nije izgašena formalno, pravno.

I koji su dalje i koraci? Da, zaista se ne dovede ni u kakvu pravnu nesigurnost. Uposlenici, uprava, ali i generalno sve ovo što godinama radi, što je radio Fond memorijala danas radi, evo očigledno Memorijalni centar.

Jelena Pekić (dopredsjedavajuća)

Odgovor na repliku zastupnika Kapidžić. Izvolite.

Faruk Kapidžić (zastupnik)

Pa mislim da su već oni svih 85 je dovedeno i u pravnu nesigurnost i dovedeno u jedan jako nezgodan položaj. Pri tome je pri tome je tu je najodgovorniji direktor toga, nisu odgovorni zaposlenici, ko da oni mogu nešto, direktor je tu najodgovorniji, direktor nije smio ovo dozvoliti, na kraju krajeva, trebao je doći ovdje reći ja se ne slažem s ovim, ako nije dio tog procesa i ako nije on uopće razlog zbog čega sve ovo radi, a ako nije, nek dođe, ne kaže nisam, ja nisam za ovo. Inače, direktor je najodgovorniji, a onda po dubini dolazi i do Vlade i do ministarstva i do nas u Skupštini, i mi smo odgovorni, naravno, mi koji smo bili protiv prije

godinu dana te ludosti nismo, a vi koji ste bili za odgovorni ste i vi. Šta me briga za imunitet? Vi ste odgovorni za tih 85 ljudi ili bilo koga ko će doći u problem, a nema pojma šta se radi.

Jelena Pekić (dopredsjedavajuća)

Zastupnik Dević replika?

Mahir Dević (zastupnik)

Naravno da je direktor uključen u ovo sve i politička stranka koja se zove NiP, a ovo je sad se malo crvene iz SDP-a, i iz Naše stranke, a trebali bi se više crveniti, evo zašto. Znači sva su ministarstva popolovljen sa financijama u odnosu na '24. i '25.godinu, budžet ove ustanove koju dvaput osnivate i gasite, '21 godine iznosio 3,8 miliona, u 25 godini 15,9 miliona. Ima li sad malo dobro da se malo više zacrvenite oko ovoga? To, to je nevjerovatno šta ste vi uradili s ove Vlade, kako ste vi te interesne vaše zone politički podijelili; nemojte ti se petljati u moje, neću se ja petljati u tvoje. Ako treba i nezakonito idemo izglasati da provodimo politike. Vjerujte da ćemo se pozabaviti radom ove ustanove do igle zato što ste je stavili na dnevni red svojim ponašanjem, već duži vremenski period je stavljate na dnevni red i ovo je alarm predsjedniče Kantonalnog odbora SDA Sarajevo, gospodine Kapidžiću, ovakav budžet da se ova ustanova stavi po dodatnu lupu, ovo je, ništa se slučajno ovdje ne dešava. Samo što se sada ponovo stavlja onaj samar Skupštini Kantona Sarajevo kao da smo mi neki konji lipicaneri koji treba da ponesu sav teret ovih vaših pravnih i kriminalnih stvari koje provodite u Kantonu Sarajevo. Klub SDA neće staviti sebi za vrat taj teret, a vi kao trojka ako hoćete da se natovarite tim samarom bujrum, to uradite. Naše je da upozorimo sve građane u Kantonu šta radite? Znači 4 puta je taj budžet veći. Treba vam malo promijeniti ime našminkati ga i ići u neke druge stvari. A zanimljivo će biti sljedeće, ovo radi građana, kada uporedimo konstitutivne akte u smislu uslova za izbor direktora u instituciji koja se zvala Fond memorijala i koja se zove Memorijalni centar, pretpostavljam da neće biti isti ili, bolje rečeno, tvrdim da neće biti isti zato što se nema odgovarajuće dokumentacije, ali to vama nije strano, to ste vi uradili u 15 poduzeća u Kantonu. Fala.

Jelena Pekić (dopredsjedavajuća)

Odgovor na repliku Kapidžić, izvolite.

Faruk Kapidžić (zastupnik)

Pa evo da odgovorim Mahiru, naravno da neće reagovati ovdje. Ja, evo, sada očekujem da se javi, kao što se znaju javiti Belma Kapo, kolegica iz SDP-a, ili evo, Davor Čičić, on vrlo dobro zna, on je bio ministar financija, zna on sve šta se dešava, što se ne jave, a naravno, neće glasati ni protiv ovoga. Ja ne očekujem od NiP-ovih zastupnika, oni će možda i izaći, ali, ali ne očekujem da oni odgovori, ali SDP znam zašto neće glasati protiv ovoga, pa zato što će mu onda NiP glasati protiv ovih Štetnih užasa. Šteta što radi i naravno, NiP glasa, ništa ih nije briga, sada šta radi.

Jelena Pekić (dopredsjedavajuća)

Kolega Kapidžiću, molim vas da se držite teme. Trenutno tema nije saobraćaj, tako da ovaj.

Faruk Kapidžić (zastupnik)

Očekivao sam.

Jelena Pekić (dopredsjedavajuća)

I vodite računa o vremenu, imat ćete kasnije priliku diskutovati o saobraćaju.

Faruk Kapidžić (zastupnik)

Vi se javite za ove NiP-ove ludosti tek kada spomenem Štetu. Zato sam i spomenuo. Odmah ste javili, hvala, ali bih volio da se vi javite po ovom pitanju, a ne po pitanju

Jelena Pekić (dopredsjedavajuća)

Vrijeme vam je isteklo.

Faruk Kapidžić (zastupnik)

a ne po pitanju Štete, po ovom se pitanju javite.

Jelena Pekić (dopredsjedavajuća)

Selmanović je prije bio. Kolega Čičiću, nemojte zaboraviti, prije se javio kolega Selmanović, izvolite, Selmanović.

Faruk Selmanović (zastupnik)

Zahvaljujem predsjedavajuća. Kolega Kapidžiću, vi ste kazali da obje institucije u svom izlaganju postoje iako stupanjem na snagu Odluke o osnivanju, Memorijalni centar Sarajeva stavlja se na snage Odluka o osnivanju Fonda Memorijala Kantona Sarajevo na način da Fond Memorijala Kantona formalno prestaje da postoji kao pravni subjekt, a sve njegove poslove obaveze preuzima ova nova institucija. Postavlja se pitanje ko će odgovarati za ne provođenje odluka koje su objavljene u Službenim novinama Kantona Sarajevo 45/23. ?Ne samo da ovdje imamo pravni propust, dvije institucije postoje, pa ko je, što je direktor, ko je kriv da ne provođenje odluka koje donosi najviša zakonodavna vlast u Kantonu Sarajevo? Ko će odgovarati za to i da li će iko odgovarati za ovakve i slične stvari? Kada, evo, vidimo da se ne odgovara u trenutku kad nam pacovi kolo vode po gradu ili kad su novorođene bebe na Kliničkom centru zaražene, šta onda očekujemo za ovakve stvari? Što očekujemo od ove Vlade? Ovo je vrijeđanje kulture sjećanja, da raspravljamo o ovakvoj instituciji koja treba da bude iznad svih Vlada, iznad svih stranaka, danas ovdje. Ovo je sramota, jer ako ovaj direktor i sramota je što direktor nije ovdje danas sa nama, ako on na ovakav način radi ovakve pravne egzibicije, koji ni sud ne može da pozna, ni sud ne zna šta da radi sa njim, kako se onda odnosi prema kulturi sjećanja, prema onome što treba ova institucija da baštini i da gaji, to je sramota.

Jelena Pekić (dopredsjedavajuća)

Odgovor na repliku zastupnik Kapidžić. Izvolite.

Faruk Kapidžić (zastupnik)

Zahvaljujem. Pa u tome je problem zato što ne shvataju ljudi ovdje da objavom u Službenim novinama skupštinske odluke ne znači da prestaje sa radom tako institucija, nego tek sa sudskom odlukom. Naravno da ste išta znali o tome, onda bi ta odluka skupštinska, zavisila, ne od objave, nego od sudskog zatvaranja privrednog subjekta, ali vi niste tako postavili i naravno, sud to zatvara, pa firme je teže zatvoriti sto puta nego otvoriti, pa firme nije lako to zatvoriti, pa vi da išta znate i iz sfere života ljudi i građana znali bi da je zatvaranje firme proces od 2, 3 godine, a vi ste to tako uradili i kao po službenim glasniku, e od tada ne postoji, nije tačno, nego se ostavi, to se u ovoj skupštinskoj odluci treba tako postaviti da tek sa sudskim

zatvaranjem prestaje ovaj preduzeće i počinje novo. Inače, vi ste napravili rupu od 2, 3 godine, pa neće sud mijenjati zbog vaših ludosti da sad oni prave ludost. Naravno.

Jelena Pekić (dopredsjedavajuća)

Zastupnik Čičić replika, izvolite.

Davor Čičić (zastupnik)

Zahvaljujem predsjedavajuća. Evo kada je kolega Kapidžić već spomenuo, prozvao ne znam kako. Sačekajte da kažem kolega, Mahire, ako imate kakvih prijedloga slobodno predložite. Kolega Kapidžiću to, ako ste vi SDA prema svojim koalicijskim partnerima nekad prije tako postupali, kako vi ovdje insinuirate, to je vaš problem. Znači mi apsolutno djelujemo nezavisno i donosimo odluke kako mi donosimo, tako da to kako ste vi prije radili, kako ste ucjenjivali nekoga, to možete ostati za vaše političko djelovanje. Mi, naravno, tako ne djelujemo, nit ćemo djelovati, a što se tiče ovoga, želim nekad i kao skupštinski zastupnik imati povjerenje, eto i u Ministarstvo i institucije, i u pravnike, i u Pravobranilaštvu i Ured za zakonodavstvo, da će nam dostaviti materijale koje su adekvatni, koji će na adekvatan način riješiti problematiku koja je u datom momentu bila onaj urađena. S tim u vezi, na taj način smo i podržavali ovo sve što se radi, ali naravno, ako nešto u ovom svemu što ste vi istakli nema smisla i ako nešto nije u redu, naravno da ćemo mi to razmotriti i na taj način postupiti prema našem mišljenju, da li je to nešto u redu ili nije u redu. Još ovdje insinuirano da je ovo bilo, eto, ajde da se vratimo na tu problematiku, da je budžet ove institucije kao jako bitne za Kanton Sarajevo, Fond Memorijala bio 3,5 milijuna za vaše vladavine, a sada je 15,5 miliona za vrijeme trojke. To jasno govori koliko ova i Vlada i skupštinska većina podržavaju i Fond Memorijala, kako god se on zvao, ovdje je samo riječ o nazivu te ustanove ili Memorijalni centar kako god hoćete, koliko mi podržavamo rad ove ustanove, koliko mi podržavamo kulturu sjećanja, znači 5 puta više nego što ste vi podržavali, tako da i u tom kontekstu možemo posmatrati, a da li je sada odluka o nazivu ove ustanove ispravna ili ispravna, ja želim da vjerujem nekad i institucijama i onima koji to predlažu, kao što sam rekao, da to rade sve kako treba, a naravno, mi ćemo se konsultovati, ako nešto nije u redu, naravno da ćemo da ako nešto nije zakonito, naravno da nećemo podržavati takvu odluku. Ali u svakom slučaju odnos naš prema kulturi sjećanja i vaš se može uporediti s te 3,5 miliona, koliko ste vi i 15,5 miliona koliko mi podržavamo. Zahvaljujem.

Jelena Pekić (dopredsjedavajuća)

Odgovor na repliku zastupnik Kapidžić izvolite.

Faruk Kapidžić (zastupnik)

Baš je ovo i suština mog djelovanja. Znači, radi se isto a ali vi sa 15 000 000, a mi nekad sa 3,5. Mene je strah zato što je tu podignuto 15 000 000, jer svaki 1 000 000 u vašem raspolaganju je upitan. Ja ovo sad govorim nakon 5 godina vaše vladavine, a to šta je SDA radila prije, pa jest, radio je, to je tzv. NiP sada, radio je, to bilo prije mene i naravno da se sve ovo i dešava zato što vi kažete vi ste radi tako, a vi sad imate povjerenje. Kome imate povjerenje? Vi to zovete povjerenjem, to što šutite, vi šutite, NiP-u, NiP šuti vama, a svi vide i znaju, evo i vi, jer ne možete reći jel ovo dobro ili nije? Vi ćete glasati, ali nećete reći jel ovo dobro ili nije, jer ću isjeći, pa onda kada se završi staviti ću, evo, rekli ste da je dobro. Nećete da kažete, nego kao provjerit ćete. Šta ćete provjeriti.

Jelena Pekić (dopredsjedavajuća)

Vrijeme kolega.

Faruk Kapidžić (zastupnik)

Nećete provjeriti ništa, kao što ništa ne provjeravate, nego tako jedni drugima gurate ove užase.

Jelena Pekić (dopredsjedavajuća)

Idemo dalje. Kolega Čičić, nemate mogućnost. Diskusija.

S obzirom da je već 12 i 40, molim vas, s obzirom da je već 12 i 40, nakon izlaganja i evo replika koje smo imali našeg uvaženog zastupnika Kapidžića, ja predlažem pauzu u trajanju do 14 i 30 časova, te molim anketu za glasanje kako bi se zastupnici izjasnili o istoj. I također molim vas da svi koji ste prisutni u sali da glasate za pauzu, za pauzu. Dakle, niste me pažljivo slušali kolega.

Molim da se zastupnici i zastupnice izjasne o pauzi do 14:30.

Kolega Kapidžiću, možete li glasati za pauzu? Evo, Adi Kalem će. Možemo zaključiti glasanje. Za je 18 glasalo, 1 protiv, suzdržanih 0.

Vidimo se. Nastavljamo sa radom u 14 i 30.

NASTAVAK NAKON PAUZE

Elvedin Okerić (predsjedavajući)

Nastavljamo dalje sa sjednicom Skupštine Kantona Sarajevo. Nemam više prijavljenih za raspravu, zaključujem raspravu, dajem riječ ministru Omeru Osmanoviću da nam da određena pojašnjenja na neke dileme koje su se javile u raspravi. Izvolite, imate riječ.

Omer Osmanović (ministar)

Hvala vam puno predsjedavajući. Pošto prvi put danas se obraćam, pozdravljam sve gledaoce i gledateljke Kantonalne televizije Sarajevo, kao i zastupnike i zastupnice i tu sam da bih dao određena pojašnjenja po pitanju tačke o pripajanju fonda Memorijala Memorijalnom centru Sarajevo. Upoznat sam od svoje sekretarke koja je ovdje iznijela bila uvodne napomene da je došlo do određene rasprave pa ja bih, ako mogu, da pojasnim u kratkim crtama šta se dešavalo u proteklom periodu. Kao što je i donesena Odluka o osnivanju Memorijalnog centra i da Fond Memorijala bude, da Memorijalno centar bude pravni sljednik Fonda Memorijala, kao što je donijela Skupština svoju odluku sa tačkama 26 i 27 u toj Odluci, nakon toga je došlo, da je tako kažem, najblaže, da li je to propust bio službi u Fondu Memorijala, da li je propust u sudu bio, ali u određenom roku nije se izvršilo gašenje Fonda Memorijala da bi se ta Odluka u tom obimu provela kao što je provela. Nažalost, rokovi su takvi sudski, sud nam je to pojasnio da, ne može se nakon tog roka, nego samo može se ići onda u likvidaciju koja traje veoma dugo i onda bi to trajalo veoma dugo. I na tim razgovorima je bio naš kontonalni pravobranilac i svi pravnici, sekretarka ministarstva i sekretarka Fonda Memorijala i date su upute kako može da se to uradi. Prvi od tih koraka koji treba da uradi to je pripajanje Fonda Memorijala. Pošto je on i sada nije sa Odlukom skupštinskom, on nije ugašen, on je formalno pravno i dalje u sudskom registru živ zato se može izvršiti pripajanje i daje se saglasnost, danas vi dajete samo saglasnost Memorijalnom centru da izvrši pripajanje. Nakon plana reorganizacije i pripajanja, onda taj plan opet dolazi na Vladu Kantona Sarajevo i opet dolazi u konačnu odluku. U toj konačnoj odluci Skupštini, ja se nadam u roku mjesec dana da će to biti sve provedeno, u toj konačnoj ćete promijeniti ovaj dio koji se odnosilo na prethodnu skupštinsku odluku kojom ste vi rekli da je on pravni sljednik, da se gasi i tako na taj način, nego će biti tamo preambula u jednom članu će stajati da se taj Fond Memorijala pripaja i na taj način ćemo dobiti na vremenu. Ja opet kažem čuo sam rasprave i jedan od načina gdje kažu nije logički, nije logički, pravo nije

logika, pravo nije ni pravedno, nekada da tako kažemo, međutim ovo su koraci i u materijalu kaže da je ovo od suda preporuka na osnovu razgovora koji je obavio pravobranilac sa svim pravnicima koji su učestvovali u ovim razgovorima. Hvala vam puno.

Elvedin Okerić (predsjedavajući)

Zahvaljujem se ministru Osmanoviću na pojašnjenju.

U skladu sa članom 94. Poslovnika Skupštine Kantona Sarajevo predlažem da se u ovoj tački odmah izjasnimo.

Molim zastupnike da se izjasne da li su saglasni da se izjašnjavanje po ovoj tački provede odmah.

Zaključujem glasanje. Za je glasalo 18 zastupnika, protiv 4, suzdržanih ništa. Konstatujem da je Skupština prihvatila da se izjašnjenje po ovoj tački provede odmah.

Molim zastupnike da se izjasne o Prijedlogu odluke o davanju saglasnosti na pripajanje Javnoj ustanovi "Fond Memorijala Kantona Sarajevo" Javnoj ustanovi "Memorijalni centar Sarajevo".

Zaključujem glasanje. Za je glasalo 18 zastupnika, protiv 5, suzdržanih ništa. Konstatujem da je Skupština donijela ovu odluku.

Prelazimo na tačku četiri.

AD-4.

Prijedlog Odluke o davanju saglasnosti za zaključivanje ugovora o naknadi troškova na ime plaćenog poreza sa primaocem naknade Kukuljac Zehrom, u svrhu izgradnje dionice „I transverzale“- Poddionica Tunel Kobilja Glava –Hotonj

S obzirom da imamo tačku 4, 5 i 6 koji su povezane materijal ste dobili uz pozivu za sjednicu. Zamolio bih predstavnika predlagача da ukratko podnese uvodne pomene.

Damir Konjičanin (pomoćnik direktora Zavoda za izgradnju KS)

Dobar dan svima. Želim da vas pozdravim u ime Zavoda za izgradnju Kantona Sarajevo kao predlagача ove odluke. Ja sam Damir Konjičanin, pomoćnik direktorice Belme Barlov za imovinsko pravne poslove i registar imovine. Pred vama se nalazi tri odluke. Hoću li ja svako pojedinačno ili? Naime, ovdje se radi o tri odluke o davanju saglasnosti za zaključenje ugovora. U prva dva slučaja radi se o ugovorima kojima bi se regulisalo plaćanje poreza osobama od kojih su eksproprisane nekretnine u cilju izgradnje Prve transverzale dionice Tunel Kobilja Glava - Hotonj u iznosu od 5 %. Znači, svako od ovih korisnika ima pravo da mu se snosi u skladu sa Odlukom Skupštine Kantona Sarajevo troškovi poreza na kupovinu nove nekretnine, znači zamjenske nekretnine u odnosu na onu nekretninu koja je od njega eksproprisana. U ovom konkretnom slučaju za ova prva dva slučaja je pribavljeno mišljenje i Pravobranilaštva Kantona Sarajevo i također Poreske uprave koja je odredila iznose koji bi trebalo da bude isplaćeno ovim korisnicima. Što se tiče treće odluke, treća odluka se odnosi na troškove plaćanja bespravno izgrađenog objekta na zemljištu koje je eksproprisano. I ovo pravo je priznato članom 6. Odluke o usvajanju okvira za otkup imovine koju je usvojila Skupština Kantona Sarajevo i koji se odnosi na plaćanje građevinske cijene bespravno izgrađenog objekta na zemljištu koje je već eksproprisano. I u ovom konkretnom slučaju je pribavljeno mišljenje Pravobranilaštva Kantona Sarajevo, tako da mislim da su ispunjeni uslovi da se ove odluke usvoje ako Skupština da saglasnost.

Elvedin Okerić (predsjedavajući)

Zahvaljujemo se. Vi se možete vratiti na svoje mjesto. Otvaram raspravu. Zastupnik Faruk Kapidžić se javio, izvolite, imate riječ.

Faruk Kapidžić (zastupnik)

Ma zapravo ja imam samo jedno pitanje jer mi nije jasno otkupljuje se objekat sa zemljišta koje je eksproprisano, e sada nije jasno kako se moglo izvršiti eksproprijacija ukoliko je bio objekat bez sve o bez istovjetnog otkupa ili je taj objekat napravljen naknadno. To mi je malo nejasno, ne znam, nisam do sada vidio ovaj slučaj. Uvijek se ekspropriše zemljište se izuzme sa svim objektima na njima, ako može odgovoriti.

Elvedin Okerić (predsjedavajući)

Možete li ponuditi odgovor ajde, izvolite.

Damir Konjičanin (pomoćnik direktora Zavoda za izgradnju KS)

Evo ja ću iscitirati član 6 odluke, pa mislim da će vam nakon toga sve biti jasno samo da nađem. Evo ovako. Znači, član 6 kaže: "Vlasniku bespravno izgrađenog građevinskog objekta pripada pravo na naknadu izgrađenom na zemljištu u tuđem vlasništvu pripada pravo na naknadu u visini građevinske cijene objekta, kako je to propisano ovom odlukom. Znači, pravila propisuju da svako od ovih korisnika ostvari pravo na prosječnu građevinsku cijenu ovog objekta po pravilima EBRD-a, u skladu s kojima je donešena ova Odluka. Po našem zakonodavstvu, niko nema pravo da mu se plati naknada za bespravno izrazeni objekat, ali su ovom Odlukom, koja je urađena prema preporukama EBRD-a, ljudi uvedeni u ovo pravo i to im se omogućava tačkom 6 ove Odluke.

Elvedin Okerić (predsjedavajući)

Hvala. Rasprava zastupnik Faruk Kapidžić. Ostali ste na diskusiji. Vi se možete vratiti na svoje mjesto.

Faruk Kapidžić (zastupnik)

Ma mislim da smo imali sličan slučaj prije godinu, dvije ili ne znam ni ja, oko IX transverzale i priključka. U svakom slučaju, i tada i sada mi je ta stvar da EBRD faktički je zakonodavno tijelo mi je neshvatljiva, ja ne mogu uopće da razumijem da po pravilu EBRD-a se može kršiti zakon. Jer šta je, drugim riječima, poruka građanima ko god ima zemlju, nek sklepa bilo šta bespravno, ako bude otkup, to će mu se platiti. Mislim, to je nezamislivo. Naravno, naravno, tu problem vučemo i to što nemamo u Zakonu o prostornom uređenju, legalizaciju objekata, jer da ste donijeli Zakon o prostornom uređenju i da je bila legalizacija, ovaj objekat se mogao legalizirati, pa onda otkupiti, a možda i nije, pošto je na trasi napravljen. Tako da u svakom slučaju ovo je poprilično meni grozno da se uopšte ne borite protiv toga. EBRD kaže evo vam kredit, nije samo da su ogromne kamate, nije samo da smo zaduženi u tim kreditima, nego još oni prave zakonski okvir da vi možete raditi nezakonski, samo da taj kredit ne bi stao, da ga vi povučete. Pa stanite malo, to je, mislim ja očekujem da se svaka vlast bori za prava i pravo, a ne da uzima kredite i kreditori sad određuju šta možete, šta ne možete. Čuj EBRD kredit, pa da je bilo koja komercijalna banka to uradila ima li ona pravo da to kaže? Nema. A mislim, ja ne znam. Ako već ne možete, da izbjegnute to kod EBRD-a, ako je to uslov za dobivanje kredita, onda riješite tu parcelu prije, na neki način riješite. Jel? Mislim malo mi je čudno eto, ali u svakom slučaju OK. Ovo je bio slučaj već i na Devetoj transverzali, tako da samo napominjem

za iduće slučajeve da stvarno treba tome stati u kraj, jer ja se bojim da ljudi nisu uzeli graditi sada po toj trasi, graditi objekte da bi se naplatili zbog uslova EBRD-a. Hvala.

Elvedin Okerić (predsjedavajući)

Zahvaljujemo se. Za riječ se javio zastupnik Haris Zahiragić.

Haris Zahiragić (zastupnik)

Zahvaljujem se. Pa eto slična diskusija kao kod kolege Kapidžića. Jednostavno ova argumentacija koja nam je došla iz Zavoda i koja često za različite teme dolazi kao da je nešto zahtjev EBRD-a. Dakle, EBRD nema zakonodavnu ulogu u našem društvu i meni je zaista frustrirajuće i čuti da direktor kaže prema našem zakonodavstvu mi ne možemo isplatiti, ali EBRD je stvorio uslove s kreditom nas natjerao da donesemo neku odluku kojom smo derogirali zakon. Dakle ugovor sa EBRD-om ne može derogirati zakon, ljudi. Ovo što mi radimo je anarhija, to nije vladavina prava, to nije pravna sigurnost i, što je najgore, na ovakav način rada zapravo podstiče ilegalnu gradnju na trasama. Evo, ja pozivam građane Kantona Sarajevo ove malo dovrtljivije neka na svakoj ucrtanoj trasi svake transverzale, svake longitudinale i svakog javnog projekta koji je ucrtan već 50 godina, na svakom centimetru izgrade po jedan objekat i Kanton Sarajevo će im to platiti, bez obzira, recimo, da li je zemljište njihovo ili nije zemljište njihovo. Hoćete li mi reći da ja ukoliko odem i iza tunela, recimo Vogošća, na trasi Prve transverzale, podignem kuću na tuđem zemljištu, na javnom zemljištu, da ćete vi obešteti mene u slučaju rušenja te kuće? Ja ne znam da li je u konkretnom slučaju neko tu ranije napravio, ali nije mogao nikada napraviti jer ta je trasa odavno ucrtana. Da li mogu dobiti odgovore od bilo koga, od kolega iz Ministarstva, iz Ministarstva, od bilo koga, da, ukoliko ja napravim kuću lično, evo zainteresiran sam, vidim da postoji poslovna šansa u Kantonu Sarajevo, ako ćete mi to omogućiti, recite mi i recite i drugim ljudima u Kantonu Sarajevu, pa hajdemo na zemlji Zavoda za izgradnju praviti objekte, a onda kada dođe to na red da naplatimo to, po toj kako kažete, realnoj tržišnoj cijeni. Ne može ilegalan objekat se po realnoj cijeni prodati nikako. Nema tog EBRD-a i tog inkluzivnog pristupa građanima da oni budu zadovoljni da na ilegalnim objektima dobivaju novac od Kantona Sarajevo. I evo, konkretno je pitanje za direktora za predstavnika Zavoda, ukoliko ja, Haris Zahiragić, odlučim napraviti nekoliko objekata na trasi Prve transverzale ili drugih javnih objekata na zemlji koju nemam, da li ćete vi meni platiti ovakvom odlukom troškove realne vrijednosti tog ilegalnog objekta? Ukoliko nećete, onda ne znam zašto ćete sada platiti, ukoliko hoćete, onda je to jedna sistemska korupcija kojoj treba stati na put u korijenu i nemojte, molim vas, govoriti da EBRD može promijeniti zakone kod nas, on to ne može raditi. Nema te nadležnosti. Hvala.

Elvedin Okerić (predsjedavajući)

Replika, evo prvo replika, pa onda. Sačekajte samo, jel vi želite da replicirate? Hajde, replicirajte.

Faruk Kapidžić (zastupnik)

Zahvaljujem. Ma htio bih da repliciram na ovo, obzirom da stvarno i iz naše ironije neko može i da sutra nešto počne da gradi na tim zonama koje su planirane trase. Moja replika je da građanima da kažem da ne rade to zato što neće stići, jer do '26.-te ako mogu šta napraviti i uzeti pare od ove vlasti, mogu, poslije ići lex specialis zakon koji će rušiti bez prava žalbe svaki bespravni objekat koji je na trasi, koji je na trasi saobraćajnica, dakle, i to i vi možete riješiti, napravite zakon, donesite ga ovdje i ne treba vam EBRD praviti zakone. Hvala.

Elvedin Okerić (predsjedavajući)

Odgovor na repliku za zastupnik Zahiragić.

Haris Zahiragić (zastupnik)

Kolega Kapidžu zaista jesam bio djelimično ironičan, ali ne mislim zaista da bi građani trebali to raditi, ali evo, ukoliko postoji mogućnost, zašto ne bi uradili? Zašto bi neki ljudi pravili građevinske objekte na trasama ilegalno, a neki drugi to ne bi radili? Zašto bi Kanton Sarajevo oni koji to rade plaćao, a one koji to nisu uradili ne plaćao? Zašto bi ljudi kojima je ucertano, recimo, poljoprivredno zemljište na njihovoj parceli, na njihovoj dedovini, nemaju pravo napraviti kuću, a neko napravio kuću na trasi koja stoji 50 godina ucertana? To je bezobrazluk, to je bahatost i to se ne smije plaćati. To je uvod u anarhiju i naravno, možete donijeti lex specialis o Prvoj transverzali zakona ili u bilo kojoj drugoj i riješiti sve te imovinsko pravne odnose, bez obzira šta je EBRD rekao, ponavljam i naglašavam, EBRD je jedna banka obična koja nama ništa ne znači, nemojte nas se pozivati na te međunarodne...

Elvedin Okerić (predsjedavajući)

Vrijeme kolega Zahiragiću.

Haris Zahiragić (zastupnik)

...na te međunarodne špekulante, hohštaplere i kamatare. Hvala.

Elvedin Okerić (predsjedavajući)

Vrijeme. Zaključujem raspravu. Vrlo kratko.

Damir Konjičanin (pomoćnik direktora Zavoda za izgradnju KS)

Ma vrlo kratko, ja ću pročitati član 1. Odluke o usvajanju okvira za otkup imovine i naknade radi realizacije projekata izgradnje gradskih saobraćajnica u Kantonu Sarajevu, koje je donijela ova Skupština 2021. godine. Kaže ovako: "Usvaja se okvir za otkup imovine i naknade radi realizacije projekata izgradnje gradskih saobraćajnica u Kantonu Sarajevo, odnosno izgradnji i rekonstrukcije dionica primarnih gradskih saobraćajnica, a koja se finansiraju iz kreditnih sredstava Evropske banke za obnovu i razvoj, i to: Prva transverzala poddionica Tunel Kobilja Glava, Kobilja Glava Hotonj, 2,9 km i Deveta transverzala u ulici Safeta Zajke, zajedno sa vezom sa 9. Transverzalom i 10. kao i Sarajevskom zaobilaznicom. Ova odluka se donosi radi rješavanja imovinsko pravnih odnosa u skladu sa principima i praksama o naknadi radi ispunjavanja obaveza iz Međunarodnog ugovora zaključenog između Bosne i Hercegovine, Federacije Bosne i Hercegovine, Kantona Sarajevo i Direkcije za puteve Kantona Sarajevo kao provedbenog entiteta zaključenih sa EBRD-om, kojima je preuzeta obaveza implementacije društvene politike EBRD-a iz 2014. godine".

Znači, ovo je propisano skupštinskom odlukom, što se danas nalazi pred vama.

Elvedin Okerić (predsjedavajući)

Hvala vam velika. I vrlo je izvjesno da je to možda tad SDA bila većina kada je to usvojena, ali evo, a ne znam kada je to usvojeno '21. Hvala vam velika.

U skladu sa članom 94. Poslovnika Skupštine Kantona Sarajevo predlažem da se o ovoj tački odmah izjasnimo.

Molim zastupnike da se izjasne da li su saglasni da se izjašnjenje po ovoj tački provede odmah. Zaključujem glasanje. Za je glasalo 19 zastupnika, protiv 2, suzdržanih ništa. Konstatujem da je Skupština prihvatila da se izjašnjenje po ovoj tački provede odmah.

Možete li samo služba pozvati zastupnike iz hodnika da uđu?

Molim zastupnike da se izjasne o Prijedlogu odluke o davanju saglasnosti za zaključivanje ugovora o naknadi troškova na ime plaćenog poreza sa primaocem naknade Kukuljac Zehrom, u svrhu izgradnje dionice „I transverzale“- Poddionica Tunel Kobilja Glava –Hotonj.

Zaključujem glasanje. Za je glasao 21 zastupnik, protiv 3, suzdržanih ništa.

Konstatujem da je Skupština donijela ovu odluku.

Tačka pet.

AD- 5.

Prijedlog Odluke o davanju saglasnosti za zaključivanje ugovora o naknadi troškova na ime plaćenog poreza sa primaocem naknade Kukuljac Džibom, u svrhu izgradnje dionice „I transverzale“ - Poddionica Tunel Kobilja Glava – Hotonj

Ovo su sve tačke koje ste dobili u materijalu. Nema potrebe da nam ponovno isto objašnjava. Otvaram raspravu, zaključujem raspravu.

U skladu sa članom 94. Poslovnika Skupštine Kantona Sarajevo predlažem da su ovo tački odmah izjasnimo.

Molim zastupnika da se izjasne da li su saglasni da se izjašnjenje po ovoj tački provede odmah? Zaključujem glasanje. Za je glasao 21 zastupnik, protiv ništa, suzdržanih ništa. Konstatujem da je Skupština prihvatila da se izjašnjenje provede odmah.

Molim zastupnike da se izjasne o Prijedlogu odluke o davanju saglasnosti za zaključivanje ugovora o naknadi troškova na ime plaćenog poreza sa primaocem naknade Kukuljac Džibom u svrhu izgradnje dionice Prve transverzale poddionica Tunel Kobilja Glava - Hotonj.

Zaključujem glasanje. Za je glasalo 20 zastupnika, protiv 2, suzdržanih ništa. Konstatujem da je Skupština donijela ovu odluku.

Prelazimo na tačku 6.

AD-6.

Prijedlog Odluke o davanju saglasnosti za zaključivanje ugovora o kupoprodaji bespravno sagrađenog objekta na parceli označenoj kao k.č. broj 767/1 K.O. SP_Koševo, što po novom premjeru odgovara k.č. broj 686 K.O. Hotonj, radi rušenja, vanknjižno vlasništvo Klanco Al Mulki Fatime u svrhu izgradnje dionice „I transverzale“ - Poddionica Tunel Kobilja Glava – Hotonj

Materijal ste također dobili uz sjednicu. Nema potrebe da nas ponovo uvodne napomene se podnose. Otvaram raspravu, zaključujem raspravu.

U skladu sa članom 94. Poslovnika Skupštine Kantona Sarajevo predlažem da se o ovoj tački odmah izjasnimo.

Molim zastupnike da se izjasne da li su saglasni da se izjašnjavanje po ovoj tački provede odmah? Zaključujem glasanje. Za je glasao 21, zastupnik protiv 2, suzdržanih ništa. Konstatujem da je Skupština prihvatila da se izjašnjenje po ovoj tački provede odmah.

Molim zastupnike da se izjasne o Prijedlogu Odluke o davanju saglasnosti za zaključivanje ugovora o kupoprodaji bespravno sagrađenog objekta na parceli označenoj kao k.č. broj 767/1 K.O. SP_Koševo, što po novom premjeru odgovara k.č. broj 686 K.O. Hotonj, radi rušenja, vanknjižno vlasništvo Klanco Al Mulki Fatime u svrhu izgradnje dionice „I transverzale“ - Poddionica Tunel Kobilja Glava – Hotonj

Onako kako sam pročitao naziv tačke broj 6.

Zaključujem glasanje. Za je glasao 21 zastupnik, protiv 2, suzdržanih ništa. Konstatujem da je Skupština donijela ovu odluku.

Prelazimo na tačku sedam.

AD- 7.

Prijedlog odluke o imenovanju članova Vijeća nacionalnih manjina Kantona Sarajevo

Materijal ste dobili uz poziv za sjednicu. Zamolio bih predstavnika predlagača da podnese kratko uvodne napomene.

Onahti Čerkez (pomoćnik za upravu u Ministarstvu pravde i uprave KS)

Poštovani zastupnice i zastupnici, moje ime je Onahti Čerkez, pomoćnik za upravu u Ministarstvu pravde i uprave. I po ovoj tački dnevnog reda izvještavam kako slijedi. Na osnovu Zakona o zaštiti prava pripadnika nacionalnih manjina u Kantonu Sarajevo Vlada Kantona Sarajevo putem Ministarstva pravde i uprave Kantona Sarajevo je objavilo i provelo javni poziv da se izaberu članovi Vijeća nacionalnih manjina Kantona Sarajevo. Pristiglo je 15 prijava, od kojih 3 nisu bile uredne, te ovim putem predlaže Vlade Kantona Sarajevo predlaže Skupštini Kantona da donese Odluku o imenovanju 12 predstavnika nacionalnih manjina Kantona Sarajevo, a kada se riješi prethodno pitanje ove 3 prijave, Ministarstvo će pripremiti prijedlog dopune odluke kojim se imenuje novi predstavnici. Toliko hvala.

Elvedin Okerić (predsjedavajući)

Zahvaljujem se. Otvaram raspravu. Zastupnik Zahiragić. Kolega Zahiragić jeste li se greškom javili? Jeste, zaključili raspravu.

Zaključujem raspravu.

Haris Zahiragić (zastupnik)

Predsjedavajući, dobar pokušaj.

Elvedin Okerić (predsjedavajući)

Molim?

Haris Zahiragić (zastupnik)

Dobar pokušaj, dobar, dobar, (nerazumljivo).

Elvedin Okerić (predsjedavajući)

Hoćete li diskutovati kolega?

Haris Zahiragić (zastupnik)

Hoću naravno, javio sam se. Zahvaljujem se.

Elvedin Okerić (predsjedavajući)

Uozbiljite se kolega Zahiragiću, pomislio sam da nećete da uzmete učešće u ovakoj važnoj tački. Ajde, izvolite, imate riječ.

Haris Zahiragić (zastupnik)

Pa tačka nacionalna manjina nije ni nevažna tačka, složiti ćete se. To što mi nacionalne manjine ovdje ne shvatamo na dovoljno ozbiljan način govori o jednom stepenu loše inkluzije nacionalnih manjina u našem društvu, koje je odveć etnički podijeljeno po svim osnovama i ljudi samo zato što pripadaju nacionalnoj manjini, ne mogu ostvariti druga od svojih prava u našem sistemu i našem društvu. Tako da ja se ne bi zaista šalio s nacionalnim manjinama, specifično ne u Sarajevu, koje je poznato po tome što je nacionalne manjine od jevrejske pa do romske, i preko nekih drugih stoljećima unazad štitilo od različitih vrsta inkvizicija itd. Pa evo, bilo bi lijepo da u tom duhu sa Sarajevu nastavi ophoditi prema tim nacionalnim manjinama. Suštinski, mislim da je potrebno da se ova Odluka donese, međutim imao bih jedan konstruktivan prijedlog za predlagачa, pa tada bih glasao za ovu odluku. Vidimo da ima tu zanimljivih imena. Neki od ovih ljudi su prepoznati javni djelatnici, evo imamo, čini mi se, i pjevača i neke ljekare itd. Uglavnom su ljudi koji su ugledni u različitim sferama ovog društva i većina njih zaslužuje da bude u ovom Vijeću za nacionalne manjine. Međutim, ja bih imao jedan prijedlog koji je simboličke naravi, mislim da će me kolege razumjeti u tom mom prijedlogu i vjerujem i podržati. Imajući u vidu činjenicu da se danas o tome malo govorimo na svim mjestima, pa evo, nikada nije loša prilika da o tome mi govorimo, dešava jedan genocid nad Palestincima u cijeloj Palestini u kontinuitetu, a sada specifično na području Gaze, da mi kao Kanton Sarajevo, a ni Bosne i Hercegovine, nažalost, zbog mnogih okolnosti naše pozicije u međunarodnim okvirima nismo u mogućnosti pomoći na neki ozbiljniji način tim ljudima, podsjetit ćemo se inicijativu koja je ova Skupština uputila i usvojila da pozovemo da primimo na liječenje svu palestinsku djecu koja je i da organizujemo i transport, tada smo izglasali to na moju inicijativu. Nažalost, ministar Hasanović tim povodom, čini mi se, ništa nije uradio, ministar zdravstva koji je bio zadužen za realizaciju te inicijative, to nek služi njemu na čast, to je njegova stvar. Međutim, evo, imamo priliku sada da među ovih 12 ljudi imamo tu predstavnika italijanske nacionalne, rumunjske, njemačke, austrijske, crnogorske, mađarske, romske, makedonske, palestinske, češke, albanske i slovenske. Ovdje je prijedlog da gospođa Katica Zamboni, predstavnik talijanske nacionalne manjine, uz sve dužno poštovanje prema italijanskoj nacionalnoj manjini, general prema Italijanima kao jednoj velikoj europskoj naciji, ja bih predložio da ipak gospodin Mađid Maruf, predstavnik palestinske nacionalne manjine, bude na čelu ovog Vijeća nacionalnih manjina Kantona Sarajevo, a da gospođa predstavnica italijanske nacionalne manjine bude član tog Vijeća. Simbolični, simboličnim tim gestom bismo eventualno mogli dati i poslati poruku iz Sarajeva da pogotovo Sarajevo i mi kao Bošnjaci koji smo proživjeli genocid, osjećamo bol koji Palestinci danas provode pod cionističkom agresijom pod izraelskom agresijom, da genocid koji se nad njima čini iz dana u dan, gdje se ubijaju na desetine i stotine djece koji mi ne primjećujemo, postali smo tupi nažalost, na to, gledamo to kao statističke podatke, a to su mala djeca, to su sudbine, to su životi itd. Ova odluka, ukoliko prihvatite moj prijedlog, neće promijeniti, naravno, omjer snaga u Izraelu i Palestini, neće možda ni promijeniti ovaj ništa u Kantonu Sarajevo, ali će sigurno poslati simboličku poruku, a tim prije jer je palestinska zajednica u Sarajevu, čini mi se, dosta i brojnija nego što je to italijanska. S tim u vezi mislim da bi i predstavnik na čelu ovog Vijeća, u slučaju da bi bio Palestinac, imao veći legitimitet jer ima više predstavnika palestinske nacionalne manjine, a vjerovatno će u budućnosti, nakon svega što se dešava, biti još više predstavnika palestinske nacionalne manjine koji će nakon svih zala koje su prošli, sigurno neki od njih potražiti možda svoju hidžru i u Sarajevu, koje je uvijek bilo spremno primiti i bit

će spremno primiti sve one progonjene na cijelom svijetu. Pa evo, ja predsjedavajući i vas molim da podržite moju inicijativu i da generalno sve kolege zajedno se složimo da promijenimo tu odluku na jednoj simboličkoj ravni. Mislim da to ne znači ništa gospođi koja je predložena za predstavnicu, možda ni tom gospodinu lično, možda ni Kantonu Sarajevo, ali kao ona priča koja je možda već izlišna, ali ponovit ću je: kada je Sulejman alejhi selam ili Solomon, zavisi iz koje perspektive ga gledate, poznato je da je on bio kralj ljudima i demonima, i džinima, i životinjama i insektima, itd. Kada je bio neki rat, to je predaja Hikaja jedna, kada je bio rat da su mravi trčali, nosili kapljicu vode da bi ugasili neki veliki požar, pa su pitali mrave, što vi nosite tu kapljicu vode, Ne može ona pomoći ni na koji način tom velikom požaru, nit će ga ugasiti, oni su rekli želim da Dragi Bog vidi na čijoj smo strani. Evo ja želim da ovim simboličnim aktom Kanton Sarajevo pokaže na čijoj je strani. Toliko. Hvala.

Elvedin Okerić (predsjedavajući)

Replika, replika kolegi Zahiragiću. Naravno, ja vas razumijem što vi ovako diskutujete i možda kada vas drugi ne razumiju. Međutim, ovdje se danas radi o utvrđivanju Prijedloga odluke o imenovanju članova Vijeća, mi kao Skupština ne biramo predsjednika ovog Vijeća, oni među sobom biraju predsjednika Vijeća nacionalnih manjina, tako da mi nemamo mandat da biramo njima predsjednika, oni međusobno biraju, a mi danas onako kako je u skladu sa provedenom procedurom, kao Skupština Kantona Sarajevo utvrđujemo prijedlog odluke o imenovanju svih njih u Vijeće nacionalnih manjina Kantona Sarajevo. Eto, to je moja replika bila uz dužno poštovanje i vaš prijedlog koji ste iznijeli, međutim to nije moguće provesti, to što vi kažete. Izvolite, imate riječ.

Haris Zahiragić (zastupnik)

Pa evo, možda će ova moja diskusija i ove naše diskusije dobronamjerna, polučiti time da ovi članovi dvanaest članova procijeni da je takvu odluku dobro donijet. A mi da bismo im olakšali, hajdemo onda pošto sam pratio ovo, niti abecednim redom poredano, ni države, ni po državama, ni po imenima i prezimenima. Broj 1 je gospođa K koja se preuzima na Z. Dakle, ni k ni z nisu visoko postavljena slova abecede predstavnica italijanske nacionalne manjine, nije ni italijanska, i slovo nije ispred slova, recimo, A koja je austrijska, to je broj 4. Tako da s obzirom da nemamo abecedni red ovdje, hajdemo barem simbolično staviti gospodina Mađida Marufa na broj 1 i evo zamoliti Ministarstvo pravde da ove diskusije prenesete ovom Vijeću ili da eventualno predložim jedan zaključak da pozivamo Vijeće nacionalnih manjina da Skupština Kantona Sarajevo daje podršku gospodinu Mažidu Marufu da ga oni imenuju. Možda je to bolja opcija, da mu damo podršku zaključkom jednim.

Elvedin Okerić (predsjedavajući)

Evo članovi koje će danas imenovati Skupština su čuli vašu diskusiju i oni će, naravno, odlučiti ko će biti predsjednik.

Haris Zahiragić (zastupnik)

Pa evo ja bih da se izjasnimo možda zaključkom.

Elvedin Okerić (predsjedavajući)

Nemojte, ne možemo se izjasniti o vašem zaključku zato što to nije poslovnički?

Haris Zahiragić (zastupnik)

Pazite, nećemo.

Elvedin Okerić (predsjedavajući)

A isteklo vam je vrijeme.

Haris Zahiragić (zastupnik)

Možemo ih pozvati zaključkom.

Elvedin Okerić (predsjedavajući)

Isteklo vam je vrijeme. Ne može ni pozvati.

Haris Zahiragić (zastupnik)

Zašto ne možemo?

Elvedin Okerić (predsjedavajući)

Ne možemo? Ne možemo. Pozvati nekoga telefonom, pismom, ali zaključkom ne možemo. Kolega Čičić ima repliku.

Davor Čičić (zastupnik)

Zahvaljujem predsjedavajući.

Elvedin Okerić (predsjedavajući)

Molim vas, tiše malo.

Davor Čičić (zastupnik)

Evo uvažavajući ovo, ja sam htio ovo isto tako da kažem znači da ovdje niko od ovih svih članova nije postavljen za predsjednika, nego su svi predstavnici, tako da oni sami međusobno donose odluku. A evo ja simbolično nemam ništa protiv ove vaše inicijative da mi kao Skupština, mislim, ne možemo utjecat, ali evo da damo sugestiju da bi bilo lijepo da po vašem prijedlogu bude predsjednik palestinske nacionalne manjine, da bude i predsjednik ovog Vijeća. Ali eto, isto tako ne želim da utičem na ostale članove, oni neka svako odluči po svojoj sugestiji, a ja bih, da se ja pitam, bio saglasan sa ovom vašom, s ovim vašim prijedlogom. Druga stvar, kada nekoga prozivate nekorektno znači da nije ništa učinio za palestinsku djecu i za liječenje palestinske djece, bilo prvo korektno da tog čovjeka pitate šta je učinjeno i šta je urađeno prije nego što ga osudite ovako javno, tako da nije korektno da ste prozvali ministra Hasanovića da nije ništa učinio po tom pitanju. Naravno, on ne može sam to učiniti, mi smo poslali sve, odnosno ministar je poslao sve, našu dobru volju i sve što mi možemo učiniti prema palestinskoj ambasadi. Očekivalo se od njih da nam da sugestiju što mi možemo učiniti, ali evo, o tome može dati puno više informacija ministar Hasanović. A jako je nekorektno od vas da nekoga ko nije ovdje prisutan na ovaj način prozivate i etiketirate. Hvala.

Elvedin Okerić (predsjedavajući)

Odgovor na repliku zastupnik Zahiragić.

Haris Zahiragić (zastupnik)

Pazite, ja u rezultatu nisam vidio ništa od te inicijative. Ako ćete me uvjeriti da je pismo Ambasadi Palestine koja znate u kakvim uslovima radi, koji je njihov stvarni kapacitet, je dovoljno što mi možemo uraditi, onda se pitam zašto smo, recimo, kada smo radili Expo, trudili se da na nivou ministara vanjskih poslova takve vrste stvari rješavamo. Gospodin Hasanović

je pripadnik stranke koja participira i kroz Vijeće ministara, pa mogao je tu inicijativu i na državnom nivou obratiti se direktno državi Palestini, barem onome što je od nje ostalo. Dakle, kada postoji volja, nađe se način i pronade se način, a kada se gledamo formalno, onda pošaljemo pismo i na tome ostane. Nisam imao nikakvu namjeru da gospodinu Hasanoviću, niti mislim da on ne bi volio da ta inicijativa bude realizovana. Samo složite se za različite inicijative neki od nas, ili za različite zaključke, malo više, da se kolokvijalno izrazim, upiremo, a za neke malo manje pa ostane to na nekom pismu...

Elvedin Okerić (predsjedavajući)

Vrijeme zastupniče Zahiragić.

Haris Zahiragić (zastupnik)

U tom smislu sam mislio. i Evo predsjedavajući, poslovnički, imam pravo.

Elvedin Okerić (predsjedavajući)

Nemate pravo, vi ste imali repliku, minut, imate odgovor, a sada dajemo riječ zastupniku Aljoši Čampari. Zastupnik Aljoša Čampara, izvolite, imate riječ.

Aljoša Čampara (zastupnik)

Zahvaljujem predsjedavajući. Pa evo malkice da se i ja uključim u ovu diskusiju što su kolega Zahiragić i kolega Čičić prije mene diskutirali vezano za ovu tačku. Dakle, ja se apsolutno slažem da mi vjerovatno kao Skupština, je li nemamo pravo da se miješamo na ovaj način ili da nekome direktno sugeriramo ili nalažemo da bira predsjednika između ovih izabраниh članova Vijeća za nacionalne manjine, ali nije loše da odavde ode glas ispred Skupštine Kantona Sarajevo ili kroz diskusije, pa da to čuju i članovi Vijeća za nacionalne manjine, posebno u ovom teškom trenutku za Palestinu i za palestinski narod i za sve one užase koji se dešavaju i sa ubijanjem djece. Ipak, na neki način dobro bi bilo da ovdje u Kantonu Sarajevo da to prepoznaju i ovi članovi, je li ovaj Vijeća za nacionalnih manjina, da Sarajevo daje svoj glas i dobro bi bilo da na neki način prepoznaju i možda da baš bude predsjednik ili predsjedavajući, kako se to zove, neko ko čini tu populaciju ovaj palestinskog naroda koji živi ovdje u Sarajevu i u Bosni i Hercegovini? Tako da se, evo, ja pridružujem kolegama i Zahiragiću i Čičiću da to bude kao neki glas odavde naš iz Skupštine i iz Kantona Sarajevo ili neka vrsta, možda preporuke, ali naravno da će oni između sebe onako kako je to i zakonski uređeno, izabrati svog predsjednika. Zahvaljujem.

Elvedin Okerić (predsjedavajući)

Zahvaljujemo se zastupniku Čampari. Zastupniče Zahiragić jeste li slučajno ostali uključeni? Izvolite.

Haris Zahiragić (zastupnik)

Evo odgovor na repliku kolegi Čampari. Zahvaljujem se kolegi Čampari koji je podržao ovu vrstu inicijative i zahvaljujem mu se na tome što je spreman podržati eventualno zaključak. Ja sam, uvažavajući nadležnosti, predložio zaključak koji glasi "Skupština Kantona Sarajevo, poštujući nadležnosti samog Vijeća, apeluje na imenovane članove Vijeća nacionalne manjine da imenuje predstavnika palestinske nacionalne manjine na čelo predmetnog vijeća". To je jedan korektan kako da kažem lajt zaključak koji će im sugerisati, neće im narediti, nećemo ih zadužiti, imamo pravo predložiti i sugerisati, zašto da ne? Donosimo razne zaključke, zašto ne bi se mogli donijeti ovakav? Pa neka oni ispoštuje ili ne ispoštuju, to je na njima

predsjedavajući. Evo, ne znam da li ste, da li ste čuli, poslat ću nam e-mail upravo sad. Evo kratak zaključak, mislim da... Skupština Kantona Sarajevo, poštujući nadležnosti Vijeća, apeluje na imenovane članice Vijeća nacionalne manjine da imenuje predstavnika palestinske nacionalne manjine na čelo Vijeća, ukoliko su svi sa tim saglasni". Potpuno.

Elvedin Okerić (predsjedavajući)

Mogu li vas onda zamoliti da se svi isključite, zaključimo raspravu i da ovo stavimo u skladu sa članom 120 Poslovnika...

Haris Zahiragić (zastupnik)

Možete predsjedavajući, slažem se.

Elvedin Okerić (predsjedavajući)

..gdje zaključkom skupština odlučuje o svom radu i o radu radnih tijela Skupštine Kantona Sarajevo. Zaključkom Skupština može zauzeti stav o pitanju koji je razmatrala, uključujući utvrđivanje obaveza za Vladu, kantonalne organe uprave, u pogledu pripreme zakona. Evo, ovaj bi član možda mogli iskoristiti, s obzirom da je ovo specifična situacija, da nismo nikad imali ovako. Zauzimanje stava, eto.

Kome vi replicirate. Kome replicirate, ali nije on diskutovao on. Evo replika, uzet ćemo da vam je ovo bila prva diskusija, a ovo sada replika Zahiragiću. Izvolite, imate riječ. Uključite zastupnika Aljoša Čamparu.

Aljoša Čampara (zastupnik)

Zahvaljujem predsjedavajući. Pa evo ja se slažem isto da možemo prihvatiti i zaključak, možda ja mislim da bismo mogli i u Poslovniku naći možda i neku drugu formulaciju, neke preporuke ili tako dalje, ukoliko bi ovo bilo malo formalno pravno, ali nemam problem ni da prihvatimo jednu vrstu, jednu vrstu zaključka, evo po prijedlogu, kako je iznio kolega Zahiragić i predsjedavajući, kako ste vi iščitali ovaj član 128, čini mi se, kako ste ovaj rekli.

Elvedin Okerić (predsjedavajući)

Hvala. Želite još svi da date doprinos diskusiji? Dobro, mislio sam da hoćete da se isključite na moj prijedlog. Faruk Kapidžić zastupnik se javio.

Faruk Kapidžić (zastupnik)

Samo da iskoristim, ovo je rijetka prilika da se slažem sa gospodinom Čamparom, tako da bi to da podržim njegovu podršku Zahiragiću. To je sve.

Elvedin Okerić (predsjedavajući)

Zastupnica Miomirka Melank se javila za riječ, izvolite.

Miomirka Melank (zastupnica)

Zahvaljujem predsjedavajući. Ja želim da kažem da, dakle, na ovakav jedan prijedlog i zaključak vjerojatno neće protiv njega neće moći glasati. Dakle, želim da kažem da je osjećanje saučesća prema Palestincima i nesreći koju oni podnose ovdje jednostavno i da svi jednako osjećamo koliko je načinjeno nad njima nepravde i mislim da jednostavno ovo nije adekvatan način da mi operemo svijest od toga šta nismo ili jesmo, svako od nas ponaosob ili ovo tijelo ili uopće Kanton Sarajevo učinilo za Palestinu, ali da sada donosimo odluku preko

tijela koje je nezavisno i savjetodavno tijelo Skupštine Kantona Sarajevo, mislim da nije adekvatno. Istina je ako taj zaključak postavite i ja ću glasati za njega, međutim, radi se o tome da mi ipak time vršimo neki pritisak na neko nezavisno tijelo koje treba da bude savjetodavno nama. Mi zaista svi istom dušom dišemo i saosjećamo sa Palestinom i ovo, dakle, neće skinuti naš dug prema Palestincima. Hvala.

Elvedin Okerić (predsjedavajući)

Apel nije nikakva obaveza, tako da članovi nemaju nikakvu obavezu, ali evo, neka imaju jedan stav Skupštine Kantona Sarajevo u odnosu i na osnovu svih ovih dešavanja i patnje i agresiju koju preživljavaju Palestinci, odnosno narod Palestine u Gazi. Zastupnica Belma Kapo izvolite, imate riječ.

Belma Kapo (zastupnica)

Hvala. Evo, obzirom da je zastupnik Zahiragić optužio ministra Hasanovića da, jeste, optužili ste ga da nije ništa uradio u povodu inicijative vezano da za pomoć Palestini. Ministar Enis Hasanović je uradio sve što je bilo i više nego u njegovoj moći po tom pitanju, od kontakta preko Svjetske zdravstvene organizacije, preko Ambasade Palestine, preko Ministarstva vanjskih poslova, preko Kliničkog centra Univerziteta u Sarajevu. Opće bolnice, Opća bolnica i Klinički centar u Sarajevu su potvrdile spremnost da imaju kapacitete da prime pacijente. O svemu tome je potvrdio i Svjetskoj zdravstvenoj organizaciji u stalnoj su komunikaciji. Pri tome, ovdje je ministar Enis Hasanović pa bih ja voljela predsjedavajući onako kako ste davali riječ danas i nekim drugim i u prethodnim sjednicama, da, čovjek sam iznese sve što je urađeno po tom pitanju jer je krajnje nekorektno nekoga lažno optužiti da nije uradio ništa. Vrlo su spremni ovi iz opozicije da pričaju ovdje neistine i u javnosti i jako je ružno da ode poruka i sa ove skupštine da nije ništa urađeno po pitanju Palestine, što apsolutno nije tačno, pa vas molim da ministru date riječ.

Elvedin Okerić (predsjedavajući)

Uvažena zastupnice Kapo, obraćate mi se opet kao da ja ne dozvoljavao ministru Hasanoviću da se obrati, ministar se nije ni javio. Izuzetno ga poštujem, možda puno više nego što vi to mislite, ali evo, ja predlažem jednu drugu stvar. S obzirom na ovo što ste vi naveli, ja pozivam našeg uvaženog zastupnika Zahiragića da povuče ovo što je kazao i da izrazi i zadovoljstvo za ovo što je uradio naš ministar Hasanović zajedno sa zaključkom. I da, ova priča nas ujedini kod nekog konačnog stava, ali da nam ne ostane ova, neka ovaj zarez, da kažem neka mrlja u vašoj diskusiji. Možemo li ovo da vi to kažete i idemo dalje? Zastupnik Zahiragić, izvolite, imate riječ.

Haris Zahiragić (zastupnik)

Dakle, gospođa Belma Kapo ima uvijek potrebu, praviti tenziju i svađu. Ja sam već ranije u replici gospodinu Čičiću se izvinuo ministru Hasanoviću i rekao sam da nisam mislio da ništa nije uradio, ponavljam, niti sam rekao, niti sam mislio da ništa nije uradio. I ako jeste i koliko jeste, čestitam i apelujem na njega i na sve nivoe vlasti da podrže inicijativu Skupštine Kantona Sarajeva i ministra Hasanovića da se ta inicijativa realizira. Gospođu Kapo, složiti ću se ovaj put sa kolegom Okerićem, previše politizirate i zaista jeste jednim tonom koji možda nije primjeren se obratila predsjedavajućem. I nemojte da ja moram na takav način intervenisati. Slažem se, izvinjavam se ministre, ako sam pogriješio, molim vas uložite još neki napor jer taj zaključak je davno usvojen.

Elvedin Okerić (predsjedavajući)

Hvala velika i volio bih da ovaj zapisnik iz stenograma nam službe svi isprintaju, da imamo i pa jedan primjerak kako smo se složili. Hvala vam.

Zaključujem raspravu. Idemo prvo zaključak. Hoćete li poslati? Evo vi pročitate, a mi se izjasnimo. Zamolio bih zastupnika Zahiragića da u skladu sa Poslovníkom, članom 120 pročita prijedlog zaključka na osnovu kojeg će se Skupština izjasniti. Izvolite, imate riječ.

Haris Zahiragić (zastupnik)

Zahvaljujem se predsjedavajući. Evo ja sam ga još korigirao i poslao sam kao takvog Skupštini radi dilema gospođe Melank, ja razumijem da je strah danas od trgovine utjecajem, da je to opasno i da ona možda zbog toga tako apeluje, pa sam ga dodatno ja ublažio.

Skupština Kantona Sarajevo, potpuno poštujući nadležnosti samog Vijeća nacionalnih manjina Kantona Sarajevo, apeluje na imenovane članove i članice Vijeća nacionalnih manjina Kantona Savo da razmisle o tome da na čelo Vijeća imenuje gospodina Mađida Marufa, predstavnika palestinske nacionalne manjine.

Dakle, apelujemo da razmisle, to je najniži stepen mogući apela i mislim da za to može čak i gospođa Miomirka Melank, čiste savjesti glasati.

Elvedin Okerić (predsjedavajući)

Molim zastupnike da se izjasne o zaključku koji je pročitao zastupnik Zahiragić. Zaključujem glasanje. Molim službu da objavi rezultate glasanja.

Za glasalo 26 zastupnika, protiv i suzdržanih nije bilo. Konstatujem da je Skupština jednoglasnim glasanjem usvojila zaključak, prijedlog zaključka zastupnika Zahiragića.

U skladu sa članom 94. Poslovníka Skupštine Kantona Sarajevo predlažem da se o ovoj tački odmah izjasnimo, pa zamolio bih zastupnike da se izjasne da li da se u ovoj tački odmah izjasnimo? Zaključujemo glasanje. Za je glasalo 27 zastupnika, protiv i suzdržanih nije bilo.

Konstatujem da je Skupština prihvatila da se izjašnjenje po ovoj tački provede odmah.

Molim zastupnike da se izjasne o Prijedlogu odluke o imenovanju članova Vijeća nacionalnih manjina Kantona Sarajevo.

Zaključujem glasanje. Za je glasalo 28 zastupnika, protiv i suzdržanih nije bilo.

Konstatujem da je Skupština donijela ovu odluku.

Prelazimo na tačku osam.

AD- 8.

Prijedlog odluke o dopunama Odluke o utvrđivanju osnovica, stopa i načinu obračunavanja i uplate naknada za obavezno zdravstveno osiguranje na području Kantona Sarajevo.

Materijal sa dobili uz poziv za sjednicu. Molim predstavnika predlagača da podnese uvodne napomene, ministar Hasanović. Izvolite, imate riječ.

Enis Hasanović (ministar)

Zahvaljujem predsjedavajući. Imate u materijalima odluku, razloge za donošenje odluke odnosi se na to da će biti ovom odlukom pokriveno zdravstveno osiguranje za djecu do 15 godina koja ne pohađaju redovnu školu i za druge neosigurane osobe. Mogu vam pročitati ako trebamo ali mislim da imate u materijalima. Imamo mišljenje, pozitivno mišljenje Upravnog odbora Zavoda zdravstvenog osiguranja i Ministarstvo socijalne zaštite će snositi troškove za ove osobe da jedan mali dio osoba koje nisu osigurane po drugom osnovu da po ovome ih osiguramo. Hvala.

Elvedin Okerić (predsjedavajući)

Zahvaljujem se uvaženom ministru Hasanoviću. Otvaram raspravu, zaključujem raspravu.

U skladu članom 94. Poslovnika Skupštine Kantona Sarajevo, predlažem da se u ovoj tački odmah izjasnimo. Molim zastupnike da se izjasne da li su saglasni da se izjašnjenje po ovoj tački provede odmah. Zaključujem glasanje. Za je glasalo 25 zastupnika, protiv i suzdržanih nije bilo, konstatujem da je Skupština prihvatila da se izjašnjenje po ovoj tački provede odmah.

Molim zastupnike da se izjasne o Prijedlogu odluke o dopunama Odluke o utvrđivanju osnovica, stopa i načinu obračunavanja i uplate naknada za obavezno zdravstveno osiguranje na području Kantona Sarajevo.

Zaključujem glasanje. Za je glasalo 25 zastupnika, protiv i suzdržanih nije bilo. Konstatujem da je Skupština donijela ovu odluku.

Prelazimo na tačku devet.

AD- 9. Prijedlog odluke o davanju saglasnosti na izmjene i dopune Financijskog plana prihoda i rashoda za 2024 godinu Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe

Materijal ste dobili uz poziv za sjednicu.

Imamo dvije vezane tačke 9 i 10, tako da pozivam predstavnika. Ima li potrebe? Nema potrebe. Otvaram raspravu, zaključujem raspravu.

U skladu sa članu 94. Poslovnika Skupštine Kantona Sarajevo predlažem da se u ovoj tački odmah izjasnimo odmah.

Molim zastupnike da se izjasne da li su saglasni da se izjašnjenje po ovoj tački provede odmah? Zaključujem glasanje. Za je glasalo 24 zastupnika, protiv i suzdržanih nije bilo. Konstatujem da je Skupština prihvatila da se izjašnjenje po ovoj tački provede odmah.

Pozivam zastupnike da se izjasne o Prijedlogu odluke o davanju suglasnosti na izmjene i dopune Financijskog plana prihoda i rashoda za 2024 godinu Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe

Zaključujem glasanje. Za je glasalo 23 zastupnika, protiv ništa, suzdržana 2. Konstatujem da je Skupština donijela ovu odluku.

Tačka deset.

AD- 10. Prijedlog Odluke o davanju saglasnosti na Program rada Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe za 2025. godinu

Materijal ste dobili uz poziv za sjednicu, nema potrebe za uvodne napomene, otvaram raspravu, zaključujem raspravu.

U skladu sa članove 94. Poslovnika Skupštine Kantona Sarajevo, predlažem da se u ovoj tački izjasnimo odmah. Pozivam zastupnike da se izjasne o ovom prijedlogu. Zaključujem glasanje. Za je glasalo 25 zastupnika protiv i suzdržanih nije bilo. Konstatujem da je Skupština prihvatila da se izjašnjenje po ovoj tački provede odmah.

Pozivam zastupnike da se izjasne o Prijedlogu Odluke o davanju saglasnosti na Program rada Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe za 2025. godinu

Zaključujem glasanje. Za je glasalo 25 zastupnika, protiv i suzdržanih nije bilo. Konstatujem da je Skupština donijela ovu odluku.

Tačka jedanaest.

AD- 11.

Prijedlog Odluke o davanju saglasnosti na Finansijski plan prihoda i rashoda za 2025. godinu Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe

Materijal ste dobili uz poziv. Nema potrebe za uvodne napomene. Otvaram raspravu, zaključujem raspravu.

U skladu sa članom 94. Poslovnika Skupštine Kantona Sarajevu, predlažem da se u ovoj tački izjasnim odmah. Zaključujem glasanje. Za je glasalo 24 zastupnika, protiv i suzdržanih nije bilo.

Konstatujem da je Skupština prihvatila da se izjašnjenje po ovoj tački provede odmah.

Pozivam zastupnike da se izjasni o Prijedlogu Odluke o davanju saglasnosti na Finansijski plan prihoda i rashoda za 2025. godinu Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe.

Zaključujem glasanje. Za je glasalo 24 zastupnika, protiv i suzdržanih nije bilo. Konstatujem da je Skupština donijela ovu odluku.

Tačka dvanaest.

AD- 12. Izvještaj o radu sa finansijskim izvještajem, na koje je prethodno dato mišljenje ovlaštenog revizora, Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe za 2023. godinu

Materijal se dobio uz poziv za sjednicu. Nema potrebe za uvodnim napomenama, otvaram raspravu, zaključujem raspravu. U skladu sa članom 94. Poslovnika Skupštine Kantona Saravo predlažem da se o ovoj tački odmah izjasnimo. Molim zastupnike da se izjasne odmah.

Zaključujem glasanje. Za je glasalo 24 zastupnika, protiv i suzdržanih nije bilo. Konstatujem da je Skupština prihvatila da se izjašnjenje po ovoj tački provede odmah.

Pozivam zastupnike da se izjasni o Izvještaju o radu sa finansijskim izvještajem, na koje je prethodno dato mišljenje ovlaštenog revizora, Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe za 2023. godinu

Zaključujem glasanje. Za je glasalo 24 zastupnika, protiv i suzdržanih nije bilo. Konstatujem da je Skupština usvojila ovaj Izvještaj.

Tačka trinaest.

AD- 13. NACRT STRATEGIJE RAZVOJA TURIZMA U KANTONU SARAJEVO DO 2030. GODINE

Materijal ste dobili uz poziv za sjednicu. Ima li potrebe da se podnesu uvodne napomene? Ima. Pozivam predstavnika predlagača da kratko podnese uvodne napomene. Izvolite, imate riječ, samo nam se predstavite zbog stenograma.

Elma Perteši Žunić (sekretar Ministarstva privrede)

Dobar dan, ja sam, Elma Perteši Žunić, sekretar ministarstva privrede, i ovim putem ću ukratko reći o ovoj tački, obzirom da je ministar privrede na službenom putu. Evo, ukratko ću vam malo ovoj tački, a zamolila bih nakon mog kratkog izlaganja, pozvala bih profesore sa Ekonomskog instituta, obzirom da su oni bili zaduženi za izradu ovog Nacrta tako da oni će kratko prezentovati kroz par slajdova o ovoj tački. Programom rada Skupštine '24. godine planirana je izrada Strategije razvoja turizma Kantona Sarajevo do 2030. godine. Vlada je '22 godine donijela Odluku kojom je dala saglasnost da se zaključi Sporazum između Ministarstva privrede, SERDE i GIZA da se radi na ovoj izradi strategije. Tim Sporazumom je definisano da će SERDA provesti javnu nabavku prema međunarodnim standardima GIZA i izrada ove strategije znači, apsolutno nije iziskivala finansijska sredstva po pitanju Kantona, odnosno Ministarstva privrede obzirom da je troškove snosio GIZ. Ministar privrede je formirao radnu grupu koja je imala zadatak, između ostalog, da sačini projektni zadatak i da prati sam rad Ekonomskog instituta i da se to realizuje na ispravan način. Nacrt strategije je sačinjen, strateška platforma je u nekoliko navrata kroz razni fokus radne grupe puštena u javnost, tako da je u Europskoj kući 22. i '23 godine održano nekoliko tih konsultacija. Također su sva pozitivna mišljenja prema ovoj Uredbi o izradi strategije federalnoj također smo poslali ovu strategiju, odnosno Nacrt na mišljenje Uredu za planiranje Kantona Sarajevo koji je dao pozitivno mišljenje. Obratili smo se i Federalnom ministarstvu okoliša i turizma koji je rekao isto pozitivno mišljenje su dali, rekli su da je ovaj Nacrt strategije u skladu sa također federalnom strategijom. Tako da evo ova Strategija je u skladu sa Zakonom o turizmu, prva strategija Kantona Sarajevo za turizam. Do sada smo imali sve pohvale i pozitivna mišljenja na ovu Strategiju. Ići će u javnu raspravu. Tako da, evo, ja bih sada prepustila profesorima kratko da ne oduzimam vrijeme da vam predstavim osnovne crte ovog Nacrta. Hvala.

Elvedin Okerić (predsjedavajući)

Zahvaljujemo se na podnesenim uvodnim napomenama. Vi se možete vratiti na svoje mjesto, a ja sada pozivam službu da pripremi tehnički, da profesor Halilbašić može da izvrši prezentaciju.

Muamer Halilbašić (profesor)

Ovo je čudna pozicija, profesori su navikli da hodaju. Lijep pozdrav svima prisutnim, želim da vas pozdravim ispred tima Ekonomskog instituta koji je radio na pripremi ovog dokumenta. Pored profesora sa Ekonomskog fakulteta u Sarajevu, tu su još bili također i profesori sa Prirodno-matematičkog fakulteta u ovom dijelu, posebno onaj prirodnog kulturnog historijskog naslijeđa pa dalje, imali smo određene eksterne eksperte koje smo također angažovali, posebno kada se radi o outdoor turizmu, kada se radi o zimskom turizmu itd. Čitava jedna ekipa stoji iza ovog dokumenta. Kako je kolegica kazala, mi imamo Zakon o razvojnom planiranju, imamo odgovarajuće uredbe koje su na neki način normirale red koraka koji trebamo proći, ovaj kako bismo došli u fazu u kojoj se danas nalazimo i ono što u stvari možete vidjeti na ovom slajdu, to su stvari, koraci koje smo prošli do sada. Mi smo imali prvu fazu izrade dokumenta koja se odnosi na pripremu strateške platforme, gdje smo u prvom dijelu uradili detaljnu analizu globalnih trendova, posebno onih koji su nam bitni iz perspektive Kantona Sarajeva, odnosno turizma u Kantonu Sarajevo, detaljnu analizu kretanja znači kada je u pitanju turizam u Bosni i Hercegovini, Federaciji Bosne i Hercegovine, onda sa posebnim naglaskom na Kanton Sarajevo. Analizirali smo pitanja ponude i tražnje, pitanja ljudskih resursa itd. Posebno smo analizirali ovu dimenziju raspoloživog financijskog okvira, obzirom da je kod nas vrlo česta praksa da kažemo je li da imamo boravišnu taksu, imamo članarinu u Turističkoj zajednici i to su nam sredstva, je li ovaj, odnosno to je okvir u okviru kojeg bi se trebali kretati. Ono što ću vidjeti nešto kasnije, da su to nedostatni iznosi novaca ako želimo napraviti ozbiljniji iskorak kada se radi o turizmu u Kantonu Sarajevo. Kako je kolegica kazala mi smo imali zaista široko definisane radne grupe, par desetina ljudi od eksperata iz javnog, privatnog, civilnog sektora je participiralo u tim radnim grupama. Kada smo završili prvi dio dokumenta, uradili smo jednu, odradili smo javne konsultacije u trajanju 30 dana. Sve što smo zaprimili u tom periodu smo na odgovarajući način obradili, inkorporirali u sam dokument, ono što nije bilo moguće, da li smo odgovarajuću refleksiju prema inicijatorima prijedloga, komentara, sugestija. U drugom dijelu smo prešli na utvrđivanje prioriteta, odnosno mjera ključnih strateških projekata, analizu je li ovaj potrebnih sredstava da bi se isfinancirala strategija razvoja Kantona Sarajevo. Napravili smo ocjenu usklađenosti i ovo što je kolegica kazala znači mi smo se unaprijed pripremili da budemo usklađeni sa drugim relevantnim dokumentima, prije svega kada govorimo o Strategiji razvoja Kantona Sarajevo, Strategiji razvoja turizma u Federaciji Bosne i Hercegovine. Znači, taj smo dio istestirali, odradili dio koji se odnosi na pitanje praćenja, monitoringa, izvještavanja po ovom dokumentu, definisali ključne korake, nosioce tih aktivnosti i na kraju ponovo odradili 30 dana javnih konsultacija. Vlada je utvrdila nacrt, jel tako i pribavljena su potrebna mišljenja u skladu sa zakonom. Mi se sad nalazimo u fazi razmatranja Nacrta na Skupštini Kantona Sarajevo. Ono što je jako bitno da napomenemo da se radi još uvijek na neki način o živom dokumentu. Mi imamo još uvijek 30 dana konsultacije, mi smo to pokušali da definišemo, odnosno da obradimo na način da bude fleksibilno i da se svi prijedlozi, komentari i sugestije koje dobijemo u narednih 30 dana u dobroj mjeri očekujem da će se moći implementirati u sam dokument. Ono što mi je jako važno, vidim, neka i poznata lica ovdje, članovi Skupštine ste participirali u ovim našim radnim grupama, tu smo imali predstavnike iz različitih turističkih djelatnosti, različitih udruženja itd, različitih međunarodnih organizacija, kolegica je neke od njih pomenula. Tu su Njemačka organizacija za razvoj, posebno Europska delegacija, zatim UNESCO itd. Sve ono što smo dobili kao neku vrstu komentara, sugestija smo uključili u materijal koji je pred vama. Ono što bih želio da naglasimo ovdje, to je jedna dimenzija o kojoj smo vodili računa. Naravno, mi imamo principe koje promovira sam Zakon o razvojnom planiranju koji kaže transparentnost, otvorenost, horizontalna i vertikalna koordinacija itd. Sve smo mi to uobzirli, međutim, ono što je ključno, o čemu smo vodili računa, znači šta je bila vodilja za sam tim u procesu izrade,

a to je da turisti i turizam su važni, ali su prirodne, kulturne i druge vrijednosti Kantona Sarajevo važnije, dok su stanovnici Kantona Sarajevo, odnosno kvalitet njihovog života najvažniji. Otuda smo mi otvorili određena pitanja, kao što su pitanja održivog turizma, kao što su pitanja prihvatnog kapaciteta itd. I mogu sa zadovoljstvom kazati da su mnogi od tih elemenata prepoznati u Zakonu o turizmu na nivou Federacije BiH, gdje imamo u toku javne konzultacije, gdje ti elementi koje smo spomenuli ovdje su inkorporirani u tu verziju, novu verziju Zakona o turizmu na nivou Federacije BiH-a. Što se tiče samih struktura dokumenta, kako sam kazao, imamo 2 ključna dijela, imamo stratešku platformu, imamo operativni dio, struktura dokumenta nam je propisana Zakonom o razvojnom planiranju i uredbu uredbom koja definiše izradu ove vrste ove vrste dokumenata. I mi smo slijedili. Znači, ovaj standardni red koraka i standardnu ovu strukturu dokumenta. Dakle, vi morate na kraju prvog dijela definirati ključne strateške fokuse, strateške ciljeve, iz njih izvesti prioritete, odnosno mjere, definirati ključne, ovaj ključne projekte, finansijski okvir itd. Znači, to je ono što smo u potpunosti slijedili u skladu sa našim ranijim ranijim iskustvima. Ono što je znači naglasak u samom dokumentu jeste da smo mi na bazi analize postojećeg stanja, znači kako je to stanje kada govorimo o turizmu Kantona Sarajevo i ključnih izazova koje smo konstatovali, a to su kratki boravci turista, izrađena sezonalnost, neuvezana atomizirana ponuda, reaktivni ad hoc pristup turističkom tržištu, odsustvo sistemskog upravljanja destinacijom, razvoj bazirana inicijativama privatnog sektora, primarno do sada. Mi smo na osnovu tog definirali je li koje je to stanje, odnosno šta je to što mi vidimo kao budućnost turizma u Kantonu Sarajevo? Ono što je ključno, mi turizam vidimo kao integrativnu snagu, kao pokretač održivog razvoja. Ono što nam je jako važno, to je efikasno proaktivno upravljanje turističkom destinacijom, znači integrisana atraktivna cjelogodišnja turistička ponuda, multidestinacijska saradnja, atraktivna, sigurna, uređena i održiva turistička destinacija, prepoznat turistički brend na globalnom na globalnom tržištu. Kako bismo, je li došli do onog što smo definisali kao nekakvo željeno ili očekivano stanje definirali smo određene preduslove koji su neophodni da bi se napravio taj strateški zaokret i oni su nam sadržani u prioritetima, odnosno mjerama koje smo u drugom dijelu dokumenta dokumenta operacionalizirali. Na osnovu urađene analize definirali smo viziju razvoja turizma u Kantonu Sarajevo kao globalno prepoznatljivu i vodeće regionalne turističke destinacije, koja posjetiocima pruža jedinstveni doživljaj kroz široku, autentičnu i cjelogodišnju ponudu baziranu na prirodnim, kulturnim i istorijskim resursima. Ono što smo pokušali jeste da idemo sa jednim jednostavnim pristupom obzirom da se radi o strateškom dokumentu koji je sektorskog karaktera, utvrdili smo samo jedan strateški cilj, a on se odnosi na unapređenje konkurentnosti i održivosti turizma u Kantonu Sarajevo. Da bi se postigao je li taj cilj koji smo definirali i vidjet ćete, tamo smo odredili i određene indikatore, početne ciljne vrijednosti itd. Definirali smo u okviru toga dva prioriteta, odnosno dva ključna područja djelovanja znači odnosno dva ključna fokusa koja pokušavamo tretirati kroz mjere, odnosno strateške projekte. Prvi prioritet odnosi se na uspostavljanje sistemskog okvira za razvoj održivog turizma i tu imamo jedan set set mjera, drugi prioritet je razvoj atraktivne cjelogodišnje turističke ponude. U okviru ovog prvog prioriteta mi smo utvrdili 6 ključnih mjera koje su prezentirane ovdje na slajdu i u okviru njega isto tako smo prepoznali, odnosno mjere oblikovali na način da se vide konkretni koraci, šta je to što je neophodno da se uradi da bi se realizirala svaka od mjera. Pokušali smo biti maksimalno praktično da oblikujemo dokument na način da bude vodilja i Vladi i Ministarstvu privrede i Direkciji za turizam i Turističkoj zajednici itd. Vidjet ćete iz opisa iz opisa mjera da su prilično detaljno elaborirane i da se iz njih vide ključne aktivnosti u kontekstu realizacije svake od mjera. Naravno, tu su određeni strateški projekti; za prvi prioritet imamo ukupno 16 strateških projekata. Naravno, ovdje smo mi komunicirali jako puno sa nižim nivoima vlasti, obzirom da su nam za neke mjere posebno važni Grad Sarajevo i lokalne zajednice i dosta od ovih projekata su ustvari inicijative koje su došle sa nižih, sa nižih nivoa vlasti, od određenih lokalnih zajednica, također

od određenih institucija koje su bile uključene u ove radne grupe. Što se tiče ovog drugog prioriteta, a mi smo prije nego što smo ušli u razvoj mjera koje bi tretirale pojedine aspekte, odnosno pojedine segmente, kada govorimo o turizmu, napravili jednu analizu sa članovima ovih fokus grupa gdje smo testirali, odnosno radili neku vrstu procjene šta su to prioriteta područja razvoja kada govorimo o turizmu u Kantonu Sarajevo, na osnovu 2 kriterija. Prvi kriterij je bio ovaj trenutni značaj te vrste turizma u Kantona Sarajevo i drugi kriterij je bio potencijal za budući razvoj određene vrste, odnosno tipa turizma. Na osnovu ta dva kriterija smo utvrdili određene prioritete koji se fokusiraju na prije svega kulturni turizam, turizam događaja, memorijalni turizam, gastroturizam, avanturistički, odnosno outdoor, turizam, zdravstveni turizam, ruralni turizam, razvoj kreativne industrije kao određenih potpornih, odnosno pratećih djelatnosti, djelatnosti u turizmu. Konačno, u okviru ovog prioriteta imamo ukupno 15, 15 strateških projekata koji su opisani u kratkim, u kratkim crtama. Ono što bi nam mogao predstavljati određeni izazov kod implementacije ovog dokumenta jeste ovaj finansijski okvir. Kako sam kazao, vrlo često smo u situaciji da se fokusiramo isključivo na sredstva koja se osiguravaju u turističkoj zajednici kroz ove boravišne takse, kroz članarine u Turističkoj zajednici, ta sredstva su dobro došla, međutim ta sredstva nisu dostatna. Ono što smo sugerisali jeste da se pokušaju osigurati dodatni izvori financiranja. Nama je drago da je Vlada uvela određene programe, kao što su ovi programi koji se usmjeravaju na povećanje broja letova prema Sarajevu, određene programe koji se zajednički implementiraju sa Turističkom zajednicom, zaista bez da se osiguraju ova dodatna sredstva, prije svega iz budžeta, odnosno kroz saradnju sa lokalnim zajednicama, saradnje sa Gradom Sarajevom itd ovaj mogli bismo se suočiti sa određenim izazovima vezano za samu implementaciju, implementaciju dokumenta. Ono što, na što se ja često vraćam, a to je jedna situacija, odnosno jedna specifičnost Kantona Sarajeva. Molim vas vi ako pogledate zadnjih 10 godina, 8 od 10 novih radnih mjesta je kreirano u ovim na znanju baziranim izvozno orijentisanim djelatnostima. To je ovaj biznis proces outsourcing, to su usluge iz domena informacione tehnologije i usluge koje odnosno djelatnosti u domenu turizma i povezanih djelatnostima, znači 8 od 10 novih radnih mjesta je kreirano upravo u tim. Ako smo to prepoznali kao stratešku djelatnost i ako smo usvojili, odnosno pripremili dokument koji posebno tretira tu djelatnost, mislim da bi on, odnosno programi ili projekti koji se promoviraju ili koji se koji se pripremaju u toj djelatnosti trebali biti prepoznati i kroz budžet, znači svih nivoa vlasti u Kantonu Sarajevo, govorim o općinama, govorim o Gradu, govorim o Budžetu Kantona Sarajevo. Ono što nam je na neki način olakšavajuća okolnost jeste i činjenica da imamo dosta projekata međunarodnog karaktera koji financiraju određene aspekte implementacije strategije, mi upravo, mislim da u saradnji sa SERD-om radimo nešto kada je u pitanju outdoor turizam, povezivanje sa prirodnim bogatstvima Kantona, definiraju iz određene turističke rute. Znači ima jako puno međunarodnih izvora, tako da se ustvari mora osigurati financiranje strategije iz više različitih, iz više različitih izvora. Ono što bi nam jedna novost je moglo predstavljati neku vrstu izazova jeste određeni zaokret koji se desio u federalnom Zakonu o turizmu, a to je ovaj tretman članarine u turističkim zajednicama. Vi ste svjedoci da je ovdje bilo dosta prigovora na članarinu u smislu da se ne pravi dovoljna distinkcija ili da se ne pravi uopšte distinkcija između djelatnosti koje su više ili manje povezane sa turizmom. Otuda smo mi sada kada smo asistirali kod izrade strategije razvoja turizma na nivou Federacije BiH, predložili nekakvih 5 razreda, u zavisnosti od toga koliko je određena djelatnost povezana sa turizmom. Ono što je usvojeno kao rješenje na nivou Federacije BiH moglo bi značiti smanjenje sredstava za Turističku zajednicu Kantona Sarajevo, to je ono što očekujem, definitivno. To bi mogao biti jedan dodatni izazov o kojem se mora voditi mora voditi računa. Otprilike, to je ono što je sadržaj samog dokumenta, kako sam kazao, otvoren, živ dokument, sve ono što zaprimimo kao komentare, prijedloge, sugestije, mi ćemo na odgovarajući način kao tim u komunikaciji sa Ministarstvom, obraditi ili uključiti dokument ili dati odgovarajuću reakciju prema osobi ili

instituciji koja bude predlagač bilo kakvih izmjena u ovom dokumentu. Meni je drago da se nalazimo u ovoj fazi, da konačno prepoznajemo one djelatnosti koje nude najveći potencijal kada je u pitanju otvaranje novih radnih mjesta na području Kantona Sarajeva. Nadam se da ćemo vrlo brzo ugledati, odnosno način se na sličnom događaju koji se odnosi na IT industriju, izvozno orijentisane, izvozno orijentisane usluge. Ono što nam je jako važno, isto tako da razumijemo da sa usvajanjem na Skupštini, tek počinje na neki način pravi posao. Molim vas ukoliko se desi, kao što je česta praksa sa strategijama ili na Kantonu, na nivou Federacije, na nižim nivoima, da usvojimo dokument, a to ne pretvorimo u konkretne akcijske planove, akcijske planove ne povežemo sa programima rada ključnih institucija, akcijske planove ne uključimo u sistem utvrđivanja budžeta, u proces utvrđivanja budžeta, ako ne izvještavamo, molim vas, ovdje pogledajte, zadnja faza u donjem desnom uglu, kaže, godišnje na Skupštinu treba da se pojavi izvještaj Ministarstva privrede o tome šta je implementirano u odnosu na ono što je planirano, ako nije, zbog čega nije, itd. Ko je odgovoran. Znači, to je ono što nam nedostaje. Iskorak smo napravili u razvojnom planiranju sa ovim zakonom sa odgovarajućim uredbama. Međutim, kao da nam nedostaje još uvijek ovaj follow up u smislu povezivanja ovog dokumenta sa onim što su operativna dokumenta na nivou ministarstva, agencija itd. Evo toliko u kratkim crtama što se tiče o samom dokumentu.

Elvedin Okerić (predsjedavajući)

Otvaram raspravu za diskusiju. Prvi se prijavio zastupnik Damir Marjanović. Izvolite, imate riječ.

Damir Marjanović (zastupnik)

Zahvaljujem predsjedavajući, zahvaljujem predstavnici ministarstva, zahvaljujem uvaženom profesoru na u ovoj kratkoj prezentaciji. Nije nimalo lako u par minuta ubaciti 270 stranica, u stvari objasniti 270 stranica i nekih stotinjak slika, grafova itd, itd. Neće mi zamjeriti, mi profesori smo zaduženi da se kritički osvrnemo na svaki dokument, pa čak i ovaj dobar dokument, da odmah u startu kažem, dokument je dobar, ono što definitivno ću ponoviti još riječ, to je nacrt na kojem se treba raditi i nacrt u kojem vjerujem da smo svi sudjelovali nekad obzira za neke strategije, a najteži problem je najveći problem i realizacija same strategije. Ono što je napisano na papiru lijepo može da zvuči, a najčešće, nažalost, kako naše iskustvo govori, 80 % neprovedivo ako se ne sagleda izvan okvira. Ova Strategija sama po sebi ja mogu imati primjedbu na sastav ljudi koji su radili na njoj, vidim da ne na njihovo poznavanje materija, ali između ostaloga na kvalitativni sastav, nešto nisam puno vidio ekologa, biologa i svih ostalih iz jednog prostog razloga više puta ste spomenuli "sustainable developmet" ,održivi razvoj, održivi turizam. Pretpostavljam da su kolege sa PMF-a sa odsjeka za geografiju, ali i sa odsjeka za biologiju imale što da kažu. Kada govorimo o održivom turizmu, ja ću vam odmah postaviti pitanje, ne vama, nego svima onima koji bude realizirali ovu strategiju da li su Smiljevići, ustvari, prvo ću postaviti pitanje o kojem broju turista govorimo sada i koliko povećanje govorimo u odnosu na neki za narednih 10 godina? Koliko to ljudi, u kojim sezonama to očekujemo? Da li je neko napravi analizu otpada, koji će se povećati, saobraćajnog zagušenja i svega onoga šta naša infrastruktura mora da podnese i na koji način treba da se razvija upravo sa ovom, ako želimo realizirati ovu strategiju. Znači ne direktno na sadržaj Strategije, nego na poslije, nego na posljedice sprovođenje ove strategije koje su mnogo šire i mnogo održivije i bitnije. S druge strane, bilo bi jako dobro napraviti analizu povećani broj turista i kakvoga turizma, koliko će utjecati na, evo vidjeli ste probleme u Barseloni koje imamo, probleme koje imamo u zapadnoj Europi. U zadnjih par dana ako prođete Sarajevom, vidjet ćete jednu lijepu sliku, puno mladih ljudi sa ruksacima i puno mladih ljudi koji unose energiju sa različitim jezicima, različitim kulturama. Ali to odmah povlači za sobom da veliki broj stanova, između

ostaloga koji se nude tim mladim ljudima nisu dostupni ljudima koji žive u gradu Sarajevu za iznajmljivanje, za kupovinu itd, itd. Znači, nemojte, molim vas ovo nikako prihvatiti kao kritiku dokumenta koje kao takav jako uredno, jako fino urađen, baš onako kako se strategije prave i vidi se da je tu jedna multidisciplinarna ekipa koja je odradila dobro svoj posao. Ali zamoliti ću vas kao autoritete iz te oblasti, da doslovno zaplaši te ljude u Skupštini i ljude u Vladi i sve one ljude koji budu donosili odluke vezano za ovu strategiju, da mnoge i najbitnije stvari nisu uopće napisane u toj strategiji, nego mnoge i najbitnije stvari su one stvari koje inicira ta strategija u mindsetu tih ljudi. Jer ako želimo da budemo turistički centar, onda mi želimo da razmišljamo par godina unaprijed. Evo vam sad jedna mala banalna stvar, to će vam ekolozi dobro objasniti. Ja sam genetičar i neće mi zamjeriti ako sam nešto promašio u toj cijeloj priči. Svi smo ponosni na Olimpijadu 1984 godine. Svi smo ponosni što se uradilo, kako se uradilo, a ne znam da li je iko ikada razmišljao kako smo uništili floru, faunu, Eko sistem, Bjelašnice, Treskavice i Visočice sa probijanjem puteva i kako smo uništili klimu i mikroklimu Babinog dola i kako smo upravo probijanjem puteva doveli do toga da mi par godina poslije, ne samo zbog toga, ali i dijelom zbog toga nemamo više skijanja na tim nižim nivoima. Znači, od onih koji usvajaju strategije nemojte očekivati da mi gledamo toliko unaprijed, ali onoliko koliko vi nas trebate natjerati, sve one koji budu potpisivali ove dokumente jeste da prije svakoga poteza koji će dovest do toga da smo povećali broj studenata, pardon turista, btw, imamo i taj dio tzv studentskog turizma koji bi trebali jako dobro da razradimo. Pa između ostaloga, kolegama su Univerziteta u Sarajevu ako žele da doprinesu ovoj strategiji i ostvarivanju dobrih rezultata, odmah ću sugerirat da uvedu što više programa, atraktivnih programa na engleskom jeziku, jer na taj način te povećati broj tzv. Turista studenata koji je jako isplativ turizam, recimo u nekim studentskim centrima poput Pavije, sjevera Italije, Graca itd, itd. Još jednom znači dokument kao dokument, normalno, ne mogu pričati toliko detaljno o njemu, pregledao sam onoliko koliko sam imao prilike da pregledam. Mislim da ste sve ono što treba da se uradi u tom dokumentu po pitanju procedura, planova, programa, upisali, zapisali e sada ćete trebati jednu strahovitu i strašnu kampanju da kažete da sve ovo ostaje mrtvo slovo na papiru u narednih 10 godina ako ne riješimo problem Smiljevića, ako ne riješimo problem zagađenja vazduha, ako ne riješimo problem kapaciteta. Evo ja ću postaviti pitanje ako povećamo broj turista za 30 %, 40 %, sad već lupam o brojevima, da li će naše Bačevo to izdržati toliki broj ljudi u jednome danu? Da li će naš elektroenergetski sistem tako nešto održati, izdržati, da li će naš saobraćajni sistem tako nešto izdržati? Dakle, to su stvari koje se baš strateški trebaju razmišljati, promišljati. Ako smo stvarno odlučili da budemo jedan turistički centar, onda ovo što ste sada napisali je jedan mali, mali, mali korak, ali srećom u dobrom pravcu. Želim vam puno sreće, hvala.

Jelena Pekić (dopredsjedavajuća)

Zastupnica Vedrana Vikić Musić, diskusija, izvolite.

Vedrana Vikić Musić

Hvala. Pa ja ću se nadovezati na diskusiju mog kolege Damira Marjanovića i zaista imam potrebu da se zahvalim i da pozdravim, s obzirom da ustvari u ovom stručnom timu koji je radio na izradi strategije su neki i od mojih profesora koje ovom prilikom želim da pozdravim. S obzirom da sam bila jedan, da tako kažem, hajde od aktivnih učesnika, izrade ove strategije, ne ispred Kantona Sarajevo, nego kao predstavnik Međunarodnog aerodroma Sarajevo, jer vrijeme kad se počela raditi aktivnosti na izradi ove strategije, ja još uvijek nisam bila ni zastupnica, ali sam, evo, do samog kraja učestvovala i bila aktivan sudionik i bila i u nekim radnim grupama i fokus grupama, gdje smo razmatrali sve bitne aspekte. I složit ću se sa onim što je rekao i kolega Damir i za strategiju i za planove, jel, planovi su ništa, planiranje je sve,

jer strategija može da bude ništa, ali strateški pristup evo razvoju turizma je jako bitan i ono što mene raduje, dakle ovaj nam je dokument jako bitan i zaista bih željela da se što prije usvoji, pogotovo što u njemu su prepoznati svi neki bitni aspekti za daljnji značajniji rast turizma u Kantonu Sarajevo. Ja sam prije dva dana bila i panelista na Sarajevo biznis forumu, a tema je upravo bio strateški pristup ovaj i prakse u cilju ovaj daljnjeg rasta ekonomije i impakata na ekonomiju. Želim da kažem da mi, bez obzira što je li, još uvijek, evo, nismo usvojili ovaj dokument, zaista smatram da Vlada Kantona Sarajevo i Skupština Kantona Sarajevo zaista ima strateški proaktivan pristup, samim tim da smo usvojili inicijativu koju nam je donosio Međunarodni aerodrom Sarajevo i intenzivno uz veliku podršku Turističke zajednice Kantona Sarajeva, realizujemo aktivnosti u cilju povezivanja glavnog grada Bosne i Hercegovine sa što većim brojem destinacija u fokusu djelovanja su svakako Europske destinacije. Zašto je to? Bitno je upravo iz razloga što su aerodromi jedni od ključnih infrastruktura, posebno evo za našu zemlju koja nije kroz neke druge vidove transporta povezana sa ostatkom svijeta, jer bez te povezanosti, jednostavno, to nam je jedan od ključnih preduvjeta da bi mogli ovaj da intenzivno radimo na razvoju, unapređenju turizma. Ono isto što sam vidjela da je prepoznato kroz ovu strategiju, a što je jako bitno, jest da razvijamo ove specifične oblike turizma kao što su kulturni turizam, religijski i sportski, majs, dakle industrijski turizam, medicinski turizam, ekoturizam, gastroturizam, sve su tu različiti segmenti koji nam omogućavaju, dakle, da reduciramo tu sezonalnost, jer zaista glavni grad Bosne i Hercegovine ima potencijal da bude i cjelogodišnja destinacija. Ali da bi on to bio, dakle, mi moramo proširiti ovaj portofolio i imati tu ponudu koja će nam omogućiti da tokom cijele godine imamo turiste. I da je li Kanton Sarajevo, odnosno ekonomije u Kantonu Sarajevo zaista ima te prave benefite koje, dakle, i ovaj prometni sektor i sektor turizma generiraju, a znamo da se tu radi o sektorima koji su jedni od glavnih pokretača ekonomije svake zemlje. S tim u vezi, ja zaista ne bih davala neke kritike. Mislim da jako bitno da što prije imamo ovaj dokument, kao što je rekao kolega Damir, da nam ne bude mrtvo slovo na papiru, nego da iz njega proizađu konkretni akcioni planovi i aktivnost i da u stvari nastavimo ovu jednu pozitivnu priču. Dakle, bilježimo ogroman rast novih aviolinija, ogroman rast prometa, turista. I evo samo da još da naglasim, dakle, jako je bitno da ta infrastruktura i ovaj održivi turizam isto da vodimo računa i o tome, jer ako budemo rasli, a ne ispunimo ove ostale predušlove, onda džaba smo se trošili u ovom nekom dijelu. Evo, samo znači iskreno ovaj pohvale da što prije usvojimo i da nastavimo sa ovom realizacijom. Hvala.

Jelena Pekić (dopredsjedavajuća)

Idemo dalje. Zastupnica Mersiha Mehmedagić, izvolite, imate riječ.

Mersiha Mehmedagić (zastupnica)

Zahvaljujem predsjedavajuća. Zahvaljujem ujedno i svojim profesorima na uloženom trudu i vjerujem da je za sve koji žive turizam i žive od turizma ovo je izuzetno važan dokument i ovo je izuzetno važan dan. U situaciji kada kažemo da nam je ovo prva strategija razvoja turizma u Kantonu Sarajevo, u situaciji kada 10 godina imamo federalni Zakon o turizmu, tek se on negdje krčka u parlamentu, tekstu te konsultacije u toku, u situaciji kada nemamo na državnom nivou tijelo koje će se aktivno baviti turizmom na način da imamo akcioni plan ili neki sličan dokument za planiranje razvoja turizma, nego tu neku koordinacionu funkciju vrši Ministarstvo vanjske trgovine i ekonomskih odnosa putem neke svoje radne grupe, ovo je izuzetno važan korak za jedan kanton koji je do sada, nažalost s jedne strane, a s druge na sreću preuzimao prerogative nepostojeće Turističke zajednice Bosne i Hercegovine i nekako okupljao sve turističke zajednice svih Kantona u pokušaju da predstavimo Bosnu i Hercegovinu, ne samo Kanton Sarajevo, nego Bosnu i Hercegovinu kao destinaciju. S te strane izuzetno važno da konačno imamo jedan strateški akt koji će nas voditi kako i na koji način trebamo razvijati

turizam u Kantonu Sarajevo, a vjerujem da će ovo biti vodilja i drugim Kantonima da preslikaju dobre prakse i da na isti način prilagode, naravno svojim, onaj svojim situacijama kada je turizam u pitanju i donesu ovaj strateški dokument. Naslonit ću se dobrim dijelom na diskusiju kolege Marjanovića i hvala mu na ovom osvrtu zato što smatram da je izuzetno važno, osim ovog cilja, da povećavamo značajno i broj gostiju i broj noćenja i prosječnu dužinu boravka turista u Kantonu Sarajevo, izuzetno je važno da u svemu tome ne izgubimo taj korak, da ne ponovimo greške svijeta, regiona, onih koji žive od turizma, da se razvijamo, a da to nije na način da je taj razvoj održiv. Mi već, nažalost, osjećamo posljedice tog nekog stihijskog razvoja turizma. Turizam nam se dešavao više negoli što se on sistemski, kroz sve nivoe vlasti onaj razvijao, ali već znači, imamo te negativne posljedice u smislu da vi ne možete sada više po nekim pristojnim cijenama naći stan u Kantonu Sarajevo, iznajmiti ga jedna četveročlana porodica. Znači, to već izlazi izvan našeg standarda zato što se nije vodilo računa sistemski, na koji način i kako da se razvija naš turistički sektor. Zato je izuzetno važno ono što stoji u ovoj strategiji, a što je usmjereno na proširenje obuhvata, odnosno procenta zaštićenih područja, što je opšti europski i svjetski trend. Mislim da ćemo na taj način, tako da kažem razvući turističku ponudu izvan kulturnoistorijskog jezgra, znači centar, prevashodno Stari Grad, pa ćemo to razvući na rubne općine koje itekako imaju šta da ponude kad je outdoor u pitanju, outdoor turizam. Znači potpuno slabo smo dosada valorizirali i naše kulturno istorijsko naslijeđe i te ljepote koje imamo u okolini Sarajeva, sve se nekako fokusiralo na uže gradsko jezgro i nekako najdalje je razvučeno do Ilidže, koja je pored Starog Grada epicentar i vodeća općina po broju noćenja. Ovom strategijom se jasno ukazuje na koji način mi trebamo da razvijamo turizam u Kantonu Sarajevo i dobro je što je kroz jedan dokument naznačeno, sa više aspekata je to dobro da povećavamo procenat teritorije pod nekim vidom zaštite, odnosno zaštićenih područja. Šta znači zaštićena područja za lokalne zajednice najbolje vam pokazuju zaštićena područja Bijambare i Skakavac, posebno Vrelo Bosne, gdje vidite posebno po Bijambarama i po Vrelu Bosne koliki je to broj posjetilaca, a da nisu u jezgri užoj gradskoj jezgri. Izuzetno je važno da se i kada proglasimo određenim određeno područje zaštićenim, da se i tu ophodimo i da i tu turizam razvijamo na održiv način kako ne bismo ugrozili kulturno istorijsko naslijeđe. I, naravno, izuzetno je važno ono što stoji pored niza važnih stvari i smjernica za koje se nadam da ćemo ih adekvatno implementirati i budžetirati, izuzetno je važno tamo da stoji onaj osvrt i apostrofi smjernica za povećanje tog portfolija turističkih proizvoda i pri tome je izuzetno važan apostrof na kulturno-istorijskom naslijeđu koje u Kantonu Sarajevo, evo iz nekog mog, onaj slobodnog suda, nije dovoljno valorizirano i može se uraditi puno bolje. I kad i ta valorizaciju u pitanju, možemo dosta učiti iz manjih sredina, od manjih sredina, koji itekako dobro valoriziraju svoje kulturno-istorijsko naslijeđe, kulturno-istorijske spomenike, čak znači imaju koncesije da gazduju tim kulturno-istorijskim naslijeđem, pa najčešće upravljaju ili nekim srednjovjekovnim tvrđavama. Nažalost, u Kantonu Sarajevo taj slučaj nemamo i trebamo da idemo, posebno kad su ove tendencije na federalnom nivou sa novim zakonom u pitanju, trebamo da idemo na to da širimo tu neku bazu iz koje možemo izvlačiti novac za razvoj, bazu tih poluga iz kojih možemo izvlačiti novac za razvoj turizma i pri tome je izuzetno važno kako se ova strategija osvrnula na kulturno-istorijsko naslijeđe i njegovu valorizaciju. Iskreno se nadam da ćemo i kroz javnu raspravu dobiti dosta nekih novih prijedloga, kao što je ovaj prijedlog koji me je izuzetno obradovao vezano za tematske parkove i za Pionirsku dolinu, odnosno zoološki vrt. Odavno nisam, u stvari, nisam do sada nikad čula da se neko na takav način posvetio turističkim proizvodima u Kantonu Sarajevo. I izuzetno, izuzetno mi je važno i sa aspekta tih nekih novijih turističkih proizvoda, s obzirom da radim u turizmu, ne možemo samo više prodavati jednu te istu priču, moramo diverzificirati naš portfolio proizvoda koje nudimo turistima upravo da bismo mogli ostvariti ove ciljeve i da povećamo broj dolazaka i da produžimo broj onaj dana koliko turisti ostanu i mislim da to jedino možemo uraditi na ovaj način da širimo paletu proizvoda koje nudimo turistima. Nadam se da će na ovaj način i lokalne

zajednice što više izvući iz ovog dokumenta i kapitalizirati, jer suština i najveći benefit će itekako osjetiti lokalne zajednice ukoliko se turizam bude razvijao zato što će više i smještaja u domaćinstvu i neki malih gazdinstava, neki malih proizvoda i onaj turističkih djelatnika. Van uže gradske jezgre zasigurno doprinijeti i boljem osjećaju i doživljaju turiste koji dođu ovdje jer turista želi da doživi autentičan doživljaj jedne destinacije. Znači, nije više zanimljivo, samo ne znam neki poslovni centar ili šta već, on želi da doživi nešto autohtono, a upravo to autohtono, nažalost je najmanji, što trenutno Kanton Sarajevo u svom turističkom proizvodu nudi. Još jednom hvala svima koji su uzeli učešće u izradi ovog dokumenta i evo, radujem se da ću bar do kraja ovog mandata biti onaj dijelom nekih pozitivnih promjena i da ćemo vidjeti pozitivne efekte na razvoj turizma u Kantonu Sarajevo, održiv razvoj turizma u Kantonu Sarajevo. Hvala.

Vibor Handžić (dopredsjedavajući)

Zahvaljujem kolegice Mehmedagić. Zastupnik Selmanović, diskusija izvolite.

Faruk Selmanović (zastupnik)

Zahvaljujem predsjedavajući. Turizam kao privredna grana je jako bitan za razvoj jedne zajednice, za razvoj jedne ekonomije jednog društva, pa samim tim predstavlja jako bitan turističku, odnosno privrednu granu za sam Kanton Sarajevo. Ova strategija je jedan ambiciozan projekat koji ima visoko postavljene ciljeve i kao takav i mi iz opozicije možemo da ga pohvalimo, s tim da se Sarajevo postavlja na globalno tržište, da bude vodeća turistička destinacija u regionu, sve je to pohvalno i pohvalno je što je prepoznat potencijal Sarajeva kao turističke destinacije, nešto što Sarajevo baštini i Sarajevo je bogato u kulturno istorijskim nasljedstvom. Imamo, evo, i posebne uslove za zimske sportove, za ljetne avanture, ekstremne sportove. Tako da je taj, što se tog tijela tiče, evo, pohvale dolaze i iz opozicije. Međutim, naravno, ovdje ima i pohvala i za međunarodnu promociju koju je ovdje navedena u samoj strategiji, jer u Sarajevu trebaju međunarodni turisti iz radnih dijelova svijeta, samo, eto, ja bih zamolio da ta međunarodna promocija ne bi samo u Dubaiu, ima još ovih arapskih zemalja. U jednom dijelu same strategije, koja je jako opširna i velika, pa ponekad onako, ako je iščitavate i gledate, pomislite da je ovdje, išlo se na kvantitet, a ne na kvalitet, ali evo, vidjet ćemo, to je samo strategija, ona treba dalje da se razvija, pa evo da damo taj priliku za dalji razvoj, ali ono što sam primijetio jeste tamo da se stavlja i da kaže ravnomjerni razvoj više turističkih oblast i više turističkih grana. Pa jedna od tih, ja ovdje želim pošto nemamo pravo pitanje i odgovora, ali evo jedno javno pitanje i da se razmisli o onome u daljem razvoju same strategije, jeste da li se uzela, recimo, u obzir ta neradna nedjelja? Jer recimo, šoping turizam je jako razvijen u arapskim zemljama i on su poznati po velikoj potrošnji, a ako se poredimo sa gradovima u regionu, to nema baš u ostalim gradovima, pa kako ćemo taj dio uklopiti u sve to? Pomenuto je i zdravstveni turizam, pa se ja usudno nadam da po zdravstveni turizam nismo pomislili kako ćemo čekati po 2,5 sata u čekaonici ili biti zaraženi nekim od bolesti koji su iskorijenjeni prije 100 godina. Ono što mi je posebno interesantno jeste da nema okvir da nema finansijskih sredstava, da nisu tačno poreza, na koja su to finansijska sredstva potrebna da se realizuje ovako jedan ozbiljan projekt, dato je nešto to okvirno ozbiljno za sve stavke, nekih 250 miliona, možda ne bi bilo loše da se u daljnjem razvoju ove strategije Tačno definišu po godinama po ovlastima koliko je to sredstava, jer, pazite, dolazimo ovdje u jedan apsurd gdje se samoj strategiji to piše. Kada govorimo o zimskim sportovima, zimski sportovi su nešto što je po čemu je Sarajevo prepoznatljivo, zimski olimpijski gro 84. sva ta borili športska borilišta koja, evo, žao mi je ovdje što nema možda i obnavljanje, neki, dodavanje nekih sportskih. To je nešto na što možemo graditi, pogotovo turizam i privlačiti turiste u tom dijelu godine. Apsurdno je da se navodi u samoj strategiji da nema dovoljno sredstava, odnosno da sredstva

koja su potrebna nisu čak planirana samom strategijom, pa možda treba tu razmisliti kako i na koji način se to može poboljšati. Lokalne zajednice mora se uključiti, definitivno sa lokalne zajednice moraju uključiti u ovu strategiju, u njen razvoj, jer ono što će se na kraju i svesti na razvoj samog turizma, gdje ste na lokalnim zajednicama. Evo, neke od kolega i kolegica su spominjali taj duh Sarajeva pa je jako bitno da i lokalne zajednice učestvuju u samom tome. Ono što je bitno u svemu ovome jeste i koordinacija svih institucija, ministarstava, svih javnih, Kantonalnih komunalnih preduzeća. Jer, pazite, u mnogim putopisima, emisijama tog turističkih destinacijama. Sarajevo je definisano kao europski Jerusalem, mi na tome trebamo da poentiramo i ne smijemo dozvoliti da Sarajevo postane jel europski Vuan. Ako nastavimo ovako, da održavamo higijenu u Kanton Sarajevu. Ono što je potrebno, evo i što predlažem i što savjetujem predlagачa ovog materijala jeste detaljna finansijska analiza gdje ćemo staviti da svaki od segmenata, svaki od elemenata, da vidimo šta je to okvirni plan, finansijski, naravno, kako ga možemo zatvoriti, kako to možemo financirati po godinama, šta očekujemo u kojoj godini, koliko sredstava da se potroši, koje su to institucije koje trebaju da učestvuju u svemu tome kako bi mogli imati mjerljive pokazatelji napretka? Jer ovo je doista jedna od turističkih grana od kojih Sarajevo može da profitira, a svaki napredak u tom segmentu je dobrodošao. Nemojte da ovaj dokument, kao mnogi dokumenti koje je donijela i ovaj saziv, i mnogi i mnogi drugi ostanu u mrtvo slovo na papiru, to je ono čega se ja bojim, jer doista ovaj dokument, ako pogleda, a to je fino formatiran sam, jako puno nekih podataka, informacija, slika, izgleda to onako opširno, ali bojim se da sama suština da ono što je doista nama potrebno, da je ona izostala. Strategija razvoja za 2023. to je nekih 5 godina razvoja je vrlo ambiciozan dokument, vrlo ambiciozan dokument i čestitam na hrabrosti onim koji su uzeli da pripreme taj dokument. Ali nemojte da to bude u praksi samo zbirka dobrih djela, odnosno dobrih želja bez ikakve finansijske i institucionalne osnove. Moramo imati jasne budžetske garancije kako ćemo ove stvari realizovati. Naravno, ima tu dosta i međunarodnih organizacija, ima tu dosta i međunarodnih projekata na koje možemo aplicirati, koje možemo tražiti, ali ono što je nama potrebno jeste da znamo i prilikom kreiranja novih budžeta šta koliko mogu očekivati za razvoj ove grane privrede. Ako ne budemo imali konkretne mjere za razvoj turizma van sezone, za dodatnim nekim malim turističkim lokacijama, gdje lokalne zajednice ne mogu učestvovati, onda će ovo samo ostati jedan dokument od tristotinjak stranica koji će tamo voditi da je negdje doveden, a da ništa po tom pitanju nije urađeno. Stoga apelujem da sva ministarstva, sve organizacije, sva javna Kantonalna komunalna preduzeća uzmu učešće u ovoj, jer ovo može biti jedan od dokumenata koji možda će neke stvari riješiti i u komunalnoj privredi, pa da grad bude čišći i da bude uređeniji, da vodimo više računa o snabdijevanju vode u Kantonu Sarajevo, da nam saobraćajnice budu bolje organizovane, gradski prijevoz bolje organizovan. Sve to može se provesti možda kroz ovu strategiju, pa i da građani Sarajeva imaju beneficije od ovoga. I evo još jednom apelujem da se ozbiljno pozabavimo dijelom finansijske razrade ovoga dokumenta sa jasnim ciljevima po resorima, kako ovo ne bi samo ostalo mrtvo slovo na papiru. Zahvaljujem.

Vibor Handžić (dopredsjedavajući)

Replika zastupniku Selmanoviću zastupnica Mehmedagić, izvolite.

Mersiha Mehmedagić (zastupnica)

Hvala predsjedavajući. Repliciram kolegi Selmanoviću u dijelu njegove diskusije da je turistička promocija da turistička promocija ne treba biti samo u Dubaiju. Tu vam moram zaista odgovoriti da kad smo već i kod Dubaija, Dubai je jedna od najvećih turističkih berzi i u Dubai dođe cijeli svijet da prezentuje svoju turističku ponudu, tako da je itekako poželjno otići u Dubai i sa svojom turističkom zajednicom naš turistički djelatnici u najvećem broju imaju

odziv kada je ovaj sajam u pitanju, sajam u Dubai. Dalje da kažem, ne samo da se predstavljaju naš turistički djelatnici u Dubaiju, nego se predstavljaju u Parizu, u Londonu, u Istanbulu, u Milanu, u Pragu, Madridu, odu i do Pekinga, Singapura, Indije, znači nema gdje ne idu sa svojom turističkom zajednicom i to je pohvalno i tako treba da se predstavlja turistička ponuda Kantona Sarajevo, pa i u Dubai, koji je, ponavljam, jedna od najvećih turističkih berza. I druga stvar na koju vam želim replicirati u onom dijelu kada ste rekli da nisu sredstva precizirana, okvirno jesu i to vrlo dobro precizirana, a dalje će, naravno, biti preciznije razrađena i po godinama, kako ste rekli, kada se, ako Bog da, donese nakon ovog akta i akcioni plan. Hvala.

Vibor Handžić (dopredsjedavajući)

Odgovor na repliku zastupnik Selmanović.

Faruk Selmanović (zastupnik)

Zahvaljujem. Naravno, ja sam kazao da su sredstva alocirana zbirno i da je neki 250 miliona i da je potrebno ta sredstva da se razrade, da vidimo kako po kom resoru će se trošiti. Što se tiče samog Dubaia, hvala vam za pojašnjenje. Ja se nadam, kada dokument više ne bude tajan, kada ne bude po tajnom, pod velom tajne da ću i mi ostali zastupnici znati šta se radilo u Dubaiju, kako ste novac trošio, pa vjerojatno ćemo vidjeti da se možda i prezentirala turistička ponuda Kantona Sarajevo. Što se tiče ostalih destinacija, to je pohvalno i kazao sam da ne bude samo u Dubai, nego i sve ostale destinacije. Zahvaljujem.

Vibor Handžić (dopredsjedavajući)

Zastupnica Hašimbegović, diskusija.

Marijela Hašimbegović (zastupnica)

Zahvaljujem se dopredsjedavajući. Bila mi je čast biti dijelom radne grupe prilikom izrade ovog ključno važnog dokumenta za Kanton Sarajevo i moram priznati da sam u ograničenim okolnostima pružila možda svoj skromni doprinos, ali sam bila dovoljno dugo da prepoznam i da vidim jednu fantastičnu energiju, stručnost, kompetentnost, spremnost i izvanrednih profesora na Ekonomskom fakultetu, što je pokazala je li ova prezentacija u Skupštini Kantona Sarajevo. I posebno mi je drago vidjeti njihova lica da su zajedno sa nama danas. Tako da kao plod i rezultat tog rada ja mogu istaći i reći da je ovaj nacrt, dakle, Strategije razvoja turizma u Kantona Sarajevo, za mene jedan izvanredan temelj koji će na neki način osnažiti i ojačati i poboljšati sve ono što treba da bude turistički centar, odnosno turistički sektor u našem Kantonu. Ono što je ključno prilikom izrade ovog strateškog dokumenta ustvari jeste taj održivi razvoj, jer suština dokumenta u konačnici jeste da sve aktivnosti koje su sublimirane ovom strategijom treba ustvari da donesu korist našoj zajednici. Ta korist se ogleda u raznim aspektima. Tako možemo govoriti je li i o ekonomskoj održivosti koja će u konačnici dobiti koja se bude ostvarila, ja vjerujem biti raspodijeljena na pravi način kada se govori o održivosti. U tom kontekstu moramo na neki način naznačiti okolnosti gdje i dalje moramo voditi kontinuiranu brigu o našoj prirodi, o našim kapacitetima i prirodnim resursima. No već tu nailazimo na raznu vrstu prepreka. Jer, evo, da vas podsjetim da javna ustanova za zaštićena prirodna područja jeste da zakon ima definisanu klauzulu gdje treba da vodi brigu o zaštićenom području i o šumama. Međutim, oni nemaju kapacitete za izvršavanje takvih aktivnosti i za njih u njihovo ime ove aktivnosti obavlja Sarajevo šume, no, to su neke druge okolnosti. Kada sam ovo spomenula po pitanju prepreka. Naravno da se tu pojavljuju i razne druge situacije, ali se treba djelovati multisektorski, dakle svi nivoi vlasti trebaju djelovati zajedno, moramo raditi što više na uvezivanju zakona, tu su, nažalost, okolnosti gdje sam se, evo, kao zastupnica u skupštini Kantona uvjerila i evo, često svjedočim da imamo stalnu koliziju među zakonima i

naravno, prepreke koje se nalaze u okolnostima gdje nemamo razvijenu infrastrukturu koja bi ja omogućila bolju mobilnost turista u Kantonu Sarajevo. Kolegica Vedrana je istakla da je, evo, zračna infrastruktura na neki način dobila i da je zaživio i određeni progres, što nas, evo, sve zajedno jako raduje, no, međutim, još uvijek cestovna infrastruktura, naravno i željeznička, stagniraju i očekujemo da će u tom pravcu biti određenih iskoraka po pitanju prepreka. Naravno, moramo govoriti i o okolnostima koje se tiču sigurnosti. Sigurnost možemo čitati na više načina. Evo danas cijeli dan sve društvene mreže i dakle portali bruje o epidemiji koja se nalazi u Kantonu Sarajevo. Sve su to okolnosti koje odbijaju potencijalno i turiste koji bi došli u naš grad. Znači komunalna higijena koja se mora izvršavati na najboljem mogućem nivou. To su problemi sa kojima se, evo, već duže vremena suočavamo. I, naravno, politička sigurnost. To su okolnosti gdje, evo, svi zajedno trebamo raditi da stvorimo jedan ambijent koji će biti jedna topla dobrodošlica za sve one koje žele posjetiti Sarajevo i evo naš Kanton. Dakle, ovo je bio samo mali jedan pregled prepreka na koji ćemo, naravno, naići prilikom realizacije ovog strateškog dokumenta, naravno kada se on bude usvojio, ali evo, ovom prilikom želim da još jednom podsjetim na sjajne resurse koje, naravno, naš Kanton ima, naše kulturno historijsko naslijeđe koje trebamo pametno koristiti. I ova strategija na zaista kanališe i daje nam te alate kako i na koji način što bolje i kvalitetnije da se implementiraju ono što je bolja budućnost razvoja turizma u Kantonu Sarajevo. Evo, ovo će biti od mene za ovaj put i evo, tokom javne rasprave pokušat ćemo još možda doraditi ovaj dokument. Hvala lijepa.

Vibor Handžić (dopredsjedavajući)

Zastupnica Bešlija, diskusija sljedeća izvolite.

Vildana Bešlija (zastupnica)

Hvala, pa evo, ja ću reći na početku svog prvog mandata ovdje u Skupštini, uočivši da u Zakonu o turizmu stoji obaveza izrade strategije nekako sam bila opredijeljena, je li i svjesna da se to treba pokrenuti i da se treba uraditi jedan takav dokument, naravno zato što je to i zakonska obaveza. U skladu s tim sam, evo nekako možda i simbolično, u maju 2019., tačnije 14. maja 2019. pokrenula inicijativu za izradu Strategije turizma u Kantonu Sarajevo i danas, evo nakon 6 godina, zaista mi je drago, jeste potrajalo i jest da moramo priznati da nekako u proteklom periodu, ne samo zadnjih ovih 6 godina, to je već bio neki ovaj procvat, odnosno porast te industrije na način na koji mi nismo mi nešto tu, odnosno privredne grane, i nismo mi nešto tu specijalno uradili, niti smo nešto mi doprinijeli, jednostavno se to desilo. Uzimajući u obzir činjenice i sve one statističke, turističke i sve moguće, druge pokazatelje koje imamo trenutno; porast broja turista, infrastrukturu i sve ono s čim se suočavamo u Kantonu Sarajevo, mislim da je ovo u krajnje vrijeme i drago mi je da danas raspravljamo upravo o Nacrtu strategije razvoja turizma u Kantonu Sarajevo jer zaista, moralo se na neki način zaista pristupiti adekvatno i posebno ozbiljno. Znamo da je Sarajevo krajem godine, odnosno već za ovu godinu, proglašeno i najpoželjnijom turističkom destinacijom, svjetskom i da smo ostavili nekim slučajem i većim metropole iza sebe, imamo divnu zemlju, imamo najljepši grad u Europi i ono što nam je bilo potrebno je upravo ovakav jedan dokument i koji će u suštini zadovoljiti da jednostavno počnemo rukovoditi ovim procesom, a koji će zadovoljiti i biti u korist i radnika u turizmu, turista, ali i građana Kantona Sarajevo i, naravno, u skladu sa zaštitom okoliša. Vjerujem da je ozbiljan pristup Vlade Kantona Sarajevo, prof. i Ekonomskog instituta čiji rad, evo, imam dodatno još jednom naglasiti i lično, iako smo to čuli već više puta danas u diskusijama, jer je ovo jedan u nizu dokumenata koji smo u posljednjih dana uspjeli da, odnosno koji su predstavili javnosti su upravo ti ljudi sa Ekonomskog instituta i mislim da su na ovaj način dali značajan doprinos i, naravno, doprinos kolegica i kolega koji su direktno i profesionalno i u svom zastupničkom djelovanju kroz rad u ovim grupama dali svoj doprinos

da danas imamo jedan ovakav dokument. Mislim da je znači obavezno da uspostavimo samoodrživ sistem, da brendiramo Sarajevo kao neizostavnu turističku destinaciju i zato nam je također neophodna i digitalizacija podataka i statistike, a to je, moramo priznati, nešto što se danas baš u tom polju ne možemo, da je to nešto s čim se baš i ne možemo pohvaliti i zato nam je i tu potreban napredak. Zbog svega navedenog, zaista bih željela još jednom da pozovem sve zainteresovane da uzmu aktivno učešće u javnoj raspravi u narednih 30 dana od usvajanja Nacrta strategije kako bismo imali najbolji dokument na zadovoljstvo svih nas. Hvala vam.

Vibor Handžić (dopredsjedavajući)

Zastupnik Rusmir Pobrić, diskusija. Izvolite.

Rusmir Pobrić (zastupnik)

Hvala dopredsjedavajući. Uvijek me raduje strateški pristup u bilo kojoj oblasti i evo da pohvalim Skupštinu da smo tri dana donosimo drugi strateški dokument. U srijedu smo donijeli Nacrt strategije prema mladima, evo danas Nacrt strategije razvoja turizma za koju vjerujem da će biti izglasana. Ne bih se složio, neko je od kolega spominjao da nam se to tek tako desilo. Mislim da su ljudi koji rade u ovoj oblasti u okviru Kantona Sarajevo i njegovih institucija i djelatnika iz privatnog sektora, privrednog sektora u oblasti turizma velike napore učinili da bismo bilježili rast onakav kakav bilježimo, a evo i u statistikama koje su navedene u ovom dokumentu se govori o brzom rastu. Jasno je da smo mi još uvijek u pionirskoj fazi. Dakle, kada kompariramo s onim što se dešava u regionu, kada vidimo i brojke koje su ovdje nalaze, o konkurentnosti turizma, pa smo na 95. mjestu od 117 zemalja itd. , mi smo još u pionirskoj fazi, ali ohrabruje ta statistika da najbrže rastemo. Dakle, neko se trudi oko toga kako se, narodno rečeno, sve hoće ruke, pa tako i ovaj proces. Podaci su neki navođeni iz anketiranja turista, pa je, recimo, 2017. godine rečeno da turisti su tako rekli, nisu bili zadovoljni te 2017. godine javnim prijevozom. Ja vjerujem anketa ove godine ili prošle ili evo kako se izgradila značajno saobraćajna infrastruktura u Kantonu Sarajevo, da bi to zadovoljstvo ili taj nivo zadovoljstva bio drugačije izražen. Dakle, radilo se i u tom segmentu da se poveća zadovoljstvo turista koji dolaze. Turisti su u toj anketi navodili neke stvari šta su to prednosti u Kantonu Sarajevo, pa između ostalog su hrana se targetira, ali još jedan važan segment, a to je kulturna turistička ponuda, da kažem kultura. 4. decembra 2024. godine UNESCO je uvrstio Sevdalinku na svoju reprezentativnu listu nematerijalnog blaga čovječanstva. Dakle, Bosna i Hercegovina je dobila svoj autentičan kulturni brend, izuzetno važan za jedno polje koje se također u ovoj Strategiji spominje, a to je hijerarhija branda, pa se navode i elementi brenda i čini mi se na prvom mjestu, u onoj tabeli da su tu kultura i historija. U preporuci u toj odluci UNESCO-a se govori, dakle, nije to samo mrtvo slovo na papiru, da nas je neko na tu listu stavio, nego šta bi stavljanje na UNESCO-vu listu nematerijalne kulturne baštine trebalo značiti dalje za razvoj ovog brenda i zašto se sve on može koristiti. Držim, a autori ove Strategije želio bi im se i zahvaliti, ovo je jedan iscrpan dokument, radio sam na dosta dokumenata i znam koji je to trud i zalaganje da se dođe do ovako kvalitetnog dokumenta, s obzirom da je ovo se desilo u decembru 2024. godine, nisu ni mogli prepoznati, je li kao svojevrsan potencijal, dakle ne samo kulturni, istorijski, nego kao i novi turistički proizvod, ono kako je, recimo, uradila Španija, puno je ljudi putovalo i zna da je neizostavan dio jer turističke ponude taj njihov muzički žanr, flamenko, koji nije samo plest, nego muzički žanr u jednoj širini ili fado za Portugal. Držim da imamo jedinstveno kulturno blago u tom smislu, dakle sevdah i sevdalinku, i da bismo je trebali i u tom pravcu razvijati i evo doprinos i javnoj raspravi koja slijedi nakon usvajanja Nacrta ove strategije, da se u tom pravcu da radni timovi pokušaju osmisliti određeni program sa finansijskim okvirom kako da ovu priliku, jel iskoristimo i od Sevdalinke, za koju imamo sada najviše međunarodno priznanje, kako da je brendiramo i kao ili uspostavimo i kao

turistički proizvod. Između ostalog u prilog tome, time ću završiti, zanimljiv mi je jedan naslov bio u medijima nedavno, kada je umro papa Franjo, pa kažu u susretu sa članom Predsjedništva BiH, Denisom Bećirovićem, je rekao: "Bosanska sevdalinka mi je najljepša pjesma na svijetu", dakle, i ta vrsta priznanja, kao jedna ilustracija o mogućnostima koje možemo na tom polju ostvariti.

Vibor Handžić (dopredsjedavajući)

Zastupnica Viteškić, diskusija izvolite.

Smiljana Viteškić (zastupnica)

Zahvaljujem, dopredsjedavajući. I evo, ja ću vrlo kratko o ovoj Strategiji, koja je jako značajna za Kanton Sarajevo. U Nacrtu Strategije za razvoj turizma do 2030 godine, dobili smo niz podataka na mnogo stranica, što nije ni čudo jer je Strategiju radio vrlo respektabilan tim i, naravno, danas nam je i prezentirao. Ono što mene raduje su ljudski resursi koje ima ovaj Kanton pa se na evidenciji za zapošljavanje nalazi od 55,5 hiljada nezaposlenih 1550 lica koja su sa zanimanjima vezanim za turizam, a od toga 90 % kuhari, konobari i ugostiteljsko turistički radnici, što naravno raduje da nećemo morati tražiti tu radnu snagu izvana. 650 lica ima Ugostiteljsko turističku školu i uglavnom su to mladi i žene i nadam se da će se u budućnosti otvoriti radna mjesta za njih jer smo, evo, to prepoznali u Strategiji prema mladima koju smo usvojili prije par dana, a i naravno, žene koje su vrlo vrijedna radna snaga. Ono što ja želim apostrofirati u ovoj Strategiji je zdravstveni turizam. Dolazim iz općine koja ima i simbolično ime iladž, bir iladž, lijek, je li, iz Ilidže i nadam se da će moja općina, bez obzira i na dosadašnja postignuća u zdravstvenom turizmu imati posebno mjesto u budućnosti, a i u ovoj Strategiji. Znači zdravstveni turizam podrazumijeva dentalnu njegu i zdravlje, sportsku medicinu, estetsku hirurgiju i nadam se da će ustanove ponuditi pakete ovih usluga i da će i turisti moći u ostvarenju tih svojih potreba iz zdravstvene oblasti dolaziti u Kanton Sarajevo, s tim da se nadam da će se ove ustanove umrežiti i da će ponuda ovih usluga biti istaknuta u nekom od akcionih planova. Posebno ističem da je potrebno uraditi certifikaciju i akreditaciju banja i lječilišta u Kantonu Sarajevo kako bi se podigao kvalitet zdravstvene usluge, a to su, mislim, već, evo ne znam tačno podatke, uradile neke banje i lječilišta u našem okruženju, mislim Olovo, Teslić, ne znam, imali su tu akreditaciju i znate onaj da ta akreditacija i certifikacija puno znači za korisnike zdravstvenih usluga jer se podrazumijeva da će dobiti sigurnu uslugu, naravno, onaj u skladu sa prostorom i opremom i kadrom koji radi u tim zdravstvenim ustanovama. Za ispunjenje ove Strategije mnogo je i do nas, do ovog zakonodavnog tijela, pa evo, Vlada Kantona Sarajevo je 2021. inicirala izmjene i dopune Zakona o turizmu i te izmjene i dopune još uvijek nisu došle na razmatranje u ovu Skupštinu. Niz slabosti koje su predviđene SWOT analizom je na rješavanju ovoj Skupštini; od zagađenja zraka, od neuređenih turističkih neatraktivnih lokaliteta, znači od nedostajućih i neadekvatnih zakonske regulative, tu je upravljanje otpadom, što su govorili moji prethodnici i ne želim da se ponavljam i da evo na kraju je li ove današnje sjednice uzimam vrijeme. Nadam se da će ova strategija, uz dobre akcione planove koji će, naravno, biti doneseni, onaj pomoći puno u razvoju turizma u Kantonu Sarajevo, u stvari u poboljšanju svih segmenata kojih sada ima, naravno, dobro razvijenijih i nadam se da je ono što je dobro do sad u Kantonu Sarajevo, da će doživjeti još bolje uspjehe i, naravno, onaj poboljšati turističku ponudu u Kantonu Sarajevo. Ono što još želim istaći rekla je naša kolegica Vedrana Vikić. Znači, u Strategiji je navedeno da će biti povećana saobraćajna struktura, pojačana saobraćajna struktura i komunikacije i to se za sada sigurno odnosi na avio saobraćaj, a kako će biti sa ovim radovima u Kantonu Sarajevo i evo, pred nama je da se vidi, naravno, u saobraćajnoj strukturi. Zahvaljujem.

Vibor Handžić (dopredsjedavajući)

Zastupnice Melank, diskusija, izvolite.

Miomirka Melank (zastupnica)

Zahvaljujem. Ja samo želim da također zahvalim autorima i da ih zamolim da dobijemo dokument u PDF obliku koji je moguće pretraživati kako bi nam se olakšalo eventualno sugerisanje i kako bismo lakše mogli pretraživati cijeli dokument. Zahvaljujem.

Vibor Handžić (dopredsjedavajući)

Dobro, zaključujem raspravu. Pošto se niko više ne javlja za riječ, molim službu da pozove zastupnike koji su trenutno van sale da uđu u salu.

Predlažem da Skupština po Nacrtu Strategije razvoja turizma u Kantonu Sarajevo do 2030.godine donese sljedeći zaključak:

1. Utvrđuje se Nacrt Strategije razvoja turizma u Kantonu Sarajevo do 2030. godine.
2. Javna rasprava će se održati u kantonalnim organima, jedinicama lokalne samouprave, naučnim i stručnim institucijama i trajat će 30 dana od objave na web stranici Vlade Kantona Sarajevo i Ministarstva privrede Kantona Sarajevo.
3. Primjedbe, prijedlozi i sugestije zastupnika i mišljenja radnih tijela Skupštine, dostavljaju se Vladi Kantona Sarajevo, koja organizuje i provodi javnu raspravu.
4. Nakon sumiranja rezultata javne rasprave, Vlada Kantona Sarajevo će putem Ministarstva privrede Kantona Sarajevo pripremiti Izvještaj o rezultatima javne rasprave i prijedlog Strategije razvoja turizma u Kantonu Sarajevo do 2030. godine, dostaviti Skupštini Kantona Sarajevo radi donošenja.
5. Ovaj zaključak stupa na snagu danom donošenja.

Molim zastupnike da pristupe izjašnjavanju. Mogu rezultati? Za je glasalo 23 zastupnika, protiv i suzdržanih nije bilo. Konstatujem da je Skupština Kantona Sarajevo donijela ovaj zaključak.

Obzirom da smo iscrpili sve tačke dnevnog reda današnje sjednice zaključujem rad na 22. Radnoj sjednici i zahvaljujem se svim zastupnicima.